


# Info bilten

VISOKO



Informativno glasilo Općine Visoko, br. 02, I - XII 2014. g.





Babić (Muhameda) Amra. Diplomirala i magistrirala na Ekonomskom fakultetu Univerziteta u Sarajevu. Samostalni računovođa, ovlaštani revizor i sudski vještak finansijske struke. U toku radnog vijeka radila u privredi, bankarstvu, osiguranju. Bila Općinski vijećnik općine Visoko u dva mandata, 2004. i 2008. godine. Obavljala dužnost Ministrice finansija u Vladi Zeničko-dobojskog kantona. Na dužnosti Načelnice Općine Visoko od 14.11.2012. godine.

### **Poštovani sugrađani!**

Iza općinske administracije, izvršne i zakonodavne vlasti Općine Visoko, nalazi se još jedna mandatna godina - 2014.

Kao i svaka, i ona je donijela svoje izazove i odgovore na njih. Donijela je uspjehe ali i one malo manje uspješne rezultate.

Ovaj bilten izrađen je kao tematski niz najznačajnijih informacija o našem radu koje su objavljene na web portalu [visoko.gov.ba](http://visoko.gov.ba) i ostalim medijima. Cilj izdavanja biltena jeste sistematsko i hronološko slaganje svih dešavanja, kako bi ocjena o rezultatima našeg rada od strane građana i šire javnosti bila donesena na osnovu objektivnog suda zasnovanog na činjenicama.

Ovo nije izvještaj o radu te tako neke informacije i aktivnosti, zbog obima, nisu u ovom biltenu dobile odgovarajući prostor, što ne umanjuje značaj onoga što je urađeno.

2014. godinu obilježile su prirodne nepogode - poplave i pojave klizišta, februarski protesti, turbulencije u političkom miljeu i radu općinskog vijeća, pokretanje nekoliko važnih strateških procesa, značajne promjene u upravljanju, radu i organizaciji javnog sektora, značajni projekti sportske infrastrukture.

Koristim priliku da se zahvalim svim akterima javnog života na saradnji i spremnosti da daju doprinos zajedničkim aktivnostima stvaranja boljeg ambijenta za život stanovnika općine Visoko. Zahvaljujem se i građanima koji su svojim sugestijama, opaskama, prijedlozima ali i kritikama, učinili naš rad boljim i efikasnijim.

Sigurna sam da ćemo u narednom periodu uspješno realizovati postavljene ciljeve i osigurati da Visoko bude razvijena, uređena lokalna zajednica, ugodna za život i privređivanje.

**Načelnica Općine Visoko**  
**Mr.sc. Amra Babić**

**SADRŽAJ:**

Općinska administracija	4
Strateške aktivnosti i dokumenti	13
Aplicirani projekti	24
Komunalna i putna infrastruktura	25
Političko-ekonomske posjete	38
Posjete, konferencije, predavanja...	51
Projekti za bolje Visoko	52
Najznačajniji datumi	62
Prijemi, čestitke, posjete...	73
Javne ustanove i Javna preduzeća	82
Privreda	92
Kultura	96
Manifestacije	98
Sport	100
Februarski protesti	104
Poplave - maj 2014.	106

**OPĆINA VISOKO**

Ul. Alije Izetbegovića 12A, 71300 Visoko, Zeničko-dobojski kanton, BiH  
tel. +387 32 732 500; fax. +387 32 738 330; e-mail: info@visoko.gov.ba

**CENTRALA OPĆINE VISOKO:** tel. 032/ 732-500  
**OPĆINSKA INSPEKCIJA:** tel. 032/ 732-549

**KONTAKTI:****Služba za poslove Općinskog načelnika**

Broj tel. 032/732-501  
Broj faxes. 032/738-330  
E-mail: nacelnica@visoko.gov.ba

**Služba za poslove Općinskog vijeća**

Broj tel. 032/732-502  
Broj faxes. 032/735-711  
E-mail: vijece@visoko.gov.ba

**Služba za opću upravu i inspekcijske poslove**

Broj tel. 032/732-503  
Broj faxes. 032/738-386  
E-mail: opcauprava@visoko.gov.ba

**Služba za društvene djelatnosti i boračko-invalidsku zaštitu**

Broj tel. 032/732-504  
Broj faxes. 032/738-848  
E-mail: drustvene@visoko.gov.ba

**Služba za privredu, finansije i lokalni ekonomski razvoj**

Broj tel. 032/732-505  
Broj faxes. 032/738-401  
E-mail: privreda@visoko.gov.ba

**Služba za urbanizam, stambeno-komunalne poslove i katastar nekretnina**

Broj tel. 032/732-507  
Broj faxes. 032/736-571  
E-mail: urbanizam@visoko.gov.ba

**Služba civilne zaštite**

Broj tel. 032/735-700  
Broj faxes. 032/735-700  
E-mail: cz@visoko.gov.ba

**Općinsko pravobranilaštvo**

Broj tel. 032/732-513  
Broj faxes. 032/738-330  
E-mail: pravobranilac@visoko.gov.ba



## PUŠTEN U RAD E-REGISTAR ADMINISTRATIVNIH POSTUPAKA

Zvaničnim puštanjem u rad Elektronskog registra administrativnih postupaka u Općini Visoko, implementirana je još jedna faza Projekta regulatorne reforme koju provodi IFC, dio grupacije Svjetske banke, uz pomoć donatora Kraljevine Švedske.

**E**lektronski registar administrativnih postupaka je servis Općine Visoko koji omogućava privrednicima da na jednostavan i transparentan način dođu do informacija vezanih za administrativne postupke koje Općina provodi.

Načelnica Amra Babić je istakla da će ovim projektom najviše dobra dobiti naši građani i poduzetnici, i da je ovaj savremeni elektronski registar rezultat zajedničkog rada ekipe IFC-a i naših stručnjaka.

Klikom na E-Registar, koji se nalazi na web portalu [www.visoko.gov.ba](http://www.visoko.gov.ba), građani i investitori imaju uvid u sve elemente administrativnog postupka za koji su

[visoko.gov.ba/usluge/elektronski-registar](http://visoko.gov.ba/usluge/elektronski-registar)

zainteresovani (liste i forme dokumentacije koju stranka treba da podnese, informacije o tome gdje se pribavlja navedena dokumentacija, koje takse i naknade stranka plaća, brojevi žiro-računa za uplatu... itd). Uspostavljanje ovog Elektronskog registra administrativnih postupaka u Općini Visoko, spada u značajnije rezultate reforme koja se provodi u okviru projekta poboljšanja poslovnog okruženja u BiH.

E-Registar sadrži zahtjeve koje stranka može preuzeti, popuniti i predati zajedno sa pratećom dokumentacijom u Centar za pružanje usluga građanima (zgrada Općine Visoko).



## ODRŽAN SEMINAR O JAVNIM NABAVKAMA

Općina Visoko je bila organizator seminara na temu Zakona o javnim nabavkama. Gost predavač bio je Hajrudin Buza, direktor za pravne, kadrovske i opće poslove BH Pošte, certificirani predavač za javne nabavke sa certifikatom Evropske Komisije u saradnji sa Agencijom za javne nabavke u BiH. Cilj ovog seminara bio je bolje upoznavanje učesnika sa ovim veoma važnim Zakonom, čija primjena u praksi veoma često uslođjava i zaustavlja projekte razvoja.



## ODRŽANA EDUKACIJA "LOD METODOLOGIJA - IZRADA LOGIČKOG OKVIRA (LFA) I PROJEKTOG PRIJEDLOGA"

Komisija za ljudska prava, mlade i ravnopravnost spolova i Vijeće mladih općine Visoko, u saradnji sa Službom za društvene djelatnosti i boračko-invalidsku zaštitu, su u Općini Visoko organizirali edukaciju: „LOD metodologija – Izrada logičkog okvira (LFA) i projektnog prijedloga“, i to u skladu sa Odlukom Općinskog vijeća o načinu odabira projekata nevladinih/neprofitnih organizacija po LOD metodologiji.

Edukacija je bila namijenjena omladinskim udruženjima i nevladinim organizacijama koje djeluju na području općine Visoko, kao i neformalnim grupama i pojedincima, u cilju pripreme budućih aplikacija na javne pozive za podnošenje projektnih prijedloga po LOD metodologiji.



## BESPLATNO SAVJETOVANJE ZA ZADUŽENE GRAĐANE

Općini Visoko započelo je provođenje projekta finansijskog i pravnog savjetovanja zaduženih građana. Cilj ovog programa je da kroz besplatnu uslugu finansijskog i pravnog savjetnika, građanima općine Visoko bude ponuđena pomoć u rješavanju njihovih problema prezaduženosti.

Konkretni savjeti o tome kako upravljati problematičnim zaduženjima, saradivati sa kreditorom ili sudom, te kako se ponašati kada finansijska institucija promijeni uslove kreditnog ugovora, imaju za cilj pomoći građanima kako bi svoje probleme riješili na najbezbolniji način. Općinski uposlenici, educirani za ovu oblast, savjetovanje vrše ponedjeljkom, srijedom i petkom u zgradi Općine Visoko u terminu od 13:00 – 15:00 sati.





## ODRŽANA PREZENTACIJA AKTIVNOSTI OPĆINSKIH ODSJEKA

Ovim povodom prezentirane su aktivnosti Službe za finansije, privredu i lokalni ekonomski razvoj i to: Odsjeka za lokalni ekonomski razvoj i Odsjeka za privredu. Odsjek za lokalni ekonomski razvoj formiran je u januaru 2014. godine, kada je i počeo sa radom i to na osnovu donesenog Pravilnika o unutrašnjoj organizaciji i sistematizaciji u Općini Visoko. Odsjek ima 6 uposlenika, od čega su 2 državna službenika, 1 namještenik i 3 volontera.

Nadležnosti Odsjeka za lokalni ekonomski razvoj su realizacija programa iz budžeta Općine Visoko, realizacija programa viših nivoa vlasti, apciranje na javne pozive domaćih i međunarodnih institucija i organizacija, izgradnja i uređenje poslovnih zona, saradnja sa međunarodnim organizacijama, formiranje baze podataka korisnih za investitore, i ostale aktivnosti koje doprinose boljem poslovnom okruženju.

Aktivnosti Odsjeka za privredu u 2013. godini su: saradnja sa Agencijom za unapređenje stranih investicija u BiH (FIPA), izrada priručnika "Investicijski vodič općine Visoko", realizacija IFC projekta, učešće Općine u GOLD projektu čiji je cilj stvaranje novih radnih mjesta, saradnja sa humanitarnim i međunarodnim organizacijama, u svrhu provođenja projekata za poboljšanje finansijskog stanja socijalno ugroženih porodica na području općine Visoko.

Aktivnosti Odsjeka za privredu u 2014. godini su: formiranje kancelarije za privrednike sa E-šalterom za biznis, formiranje Privrednog i Poljoprivrednog savjeta, aktivnosti na sanaciji šteta od poplava, a planovi za naredni period uključuju aktivnosti na izradi Strategije razvoja općine Visoko, aktivna učešća u raspravi o nacrtu regulacionog plana Poslovne zone Ozrakovići i izradi prednacrta Prostornog plana općine Visoko.

## SVEČANI PRIJEM VOLONTERA U OPĆINU VISOKO

U Maloj sali Općine Visoko 14. aprila 2014. godine, predstavnici Općine održali su svečani sastanak za primljene volontere koji su izabrani na osnovu Javnog poziva za prijem volontera.

Deset volontera potpisalo je Ugovor o volonterskom radu, te su raspoređeni na rad u službe za upravu i posebne službe Općine Visoko. Predstavnici Općine su svim volonterima zaželjeli uspješan rad i dobrodošlicu u službe Općine Visoko.





## PROMOVIRAN PRVI INFO BILTEN OPĆINE VISOKO

**P**rvi Info bilten Općine Visoko promoviran je na press konferenciji 29.04.2014. godine.

Cilj biltena je pružiti građanima informacije o radu i dešavanjima koji su vezani za Općinu Visoko u protekloj godini. Tiraž prvog broja Info biltena je bio 5.000 primjeka. Primjerci su distribuirani većini domaćinstava općine Visoko.

Tim koji je realizirao bilten su činili Naim Kavazić, Amila Koso i Dženan Velispahić. Ovaj projekt Općinu je koštao 5.000 KM, bez PDV-a.

“Bilten predstavlja prvi printani oblik medija u kojem se nalaze najbitnije informacije objavljene na službenom web portalu Općine Visoko. Ideja o biltenu nastala je polovinom 2013. godine.

Bila mi je čast da budem dio ovog projekta.”, rekao je Naim Kavazić u ime tima koji je radio na ovom projektu.

Načelnica Amra Babić istakla je da bilten ima važnu ulogu, jer će, kao dokument koji će ostati, svjedočiti o jednom vremenu, teškoćama kroz koje smo zajedno prolazili i uspjesima koje smo postizali.

## PREDSTAVLJEN EU INFO CENTAR

**U** Općini Visoko održana je prezentacija EU info centra za članove općinske administracije i predstavnike organizacija civilnog društva čija će međusobna komunikacija biti ključna za uspješan razvoj i realizaciju budućih projekata finansiranih od strane EU.



Ovdje se radi o projektu kojeg je nedavno pokrenula Delegacija Evropske unije u BiH s ciljem boljeg razumijevanja iste, njene politike i programa.

Istaknuto je da je ovo još jedan dobar potez EU kojim se nastoji ojačati privatno poduzetništvo i smanjiti nezaposlenost u našoj zemlji. Projekt finansira EU putem instrumenta za predpristupnu pomoć. Pružat će informacije bh. javnosti i drugim zainteresiranim stranama o Evropskoj uniji i svemu što ona nudi građanima.



## OPĆINA VISOKO OLAKŠAVA POSLOVANJE INVESTITORIMA

Slijedom konkretnih mjera i aktivnosti koje je Općina Visoko poduzela procesom pojednostavljenja administrativnih postupaka, potvrdila je da spada u kategoriju općina lidera po pitanju rada na privlačenju investicija i poboljšanju poslovnog okruženja. To konkretno znači da će poduzetnici u narednom periodu dozvole, odobrenja i saglasnosti dobivati brže i jeftinije uz manji obim potrebne dokumentacije i informacija.

Pojednostavljenjem administrativnih procedura, povećana je transparentnost regulative kroz uvođenje Elektronskog registra svih administrativnih postupaka i tako je otvorena mogućnost za dolazak većeg broja investitora u ovu općinu.

„Tokom procesa u kojem su aktivno učešće imali poslovna zajednica i građani, izvršena je detaljna analiza, te značajno unapređenje i pojednostavljenje svih administrativnih postupaka koje provodi Općina Visoko. U prilog tome govori činjenica da se sada sanitarne saglasnosti obavljaju po službenoj dužnosti, bez podnošenja zahtjeva i dokumentacije, te plaćanja takse. Obrt ili slična djelatnost se može osnovati u roku od 6 dana, a Vodna dozvola dobiti u roku od 15 umjesto ranijih 60 dana. Također, pribavljanje dokumenata po službenoj dužnosti, gdje je to moguće, značajno će skratiti vrijeme i pojednostaviti poslovanje“, pojasnila je načelnica Amra Babić.

Elektronski registar sadržava detaljne informacije o svim administrativnim postupcima, kao i mogućnost preuzimanja potrebnih elektronskih zahtjeva putem interneta, što uveliko povećava transparentnost, te time smanjuje rizike poslovanja.

Istovremeno, Općina ima plan izgraditi sistem kontinuirane nadogradnje u radu sa privrednim sektorom i obezbijediti mehanizam pravovremene konsultacije sa privatnim sektorom. Sve navedene aktivnosti realizovane su putem Projekta poboljšanja poslovnog okruženja u BiH koji zajedno provode Međunarodna finansijska korporacija (IFC), članica Grupacije Svjetske banke i Općina Visoko uz pomoć donatorskih sredstava Švedske agencije za međunarodni razvoj (SIDA).

Općina Visoko je, također, značajno smanjila naknade i direktne troškove za privredne subjekte. Konkretni primjer za to je umanjena naknada za sezonsko zauzimanje javnih površina u svrhu postavljanja ljetnih bašti za skoro 50%, a eliminisano je i podnošenje dokumentacije ukoliko se zahtjev podnosi drugi i svaki naredni put.





## OPĆINA VISOKO USPJEŠNO RECERTIFICIRALA "ISO" STANDARDE

Općinu Visoko je posjetio gospodin Mirsad Begić, vodeći auditor za sisteme upravljanja kvalitetom, zaštitom okoline i zaštitom zdravlja i sigurnosti na radu iz certifikacijske kuće TUVadria. Zadatak je bio provjeriti koliko Općina Visoko provodi dva standarda, ISO 9001- Upravljanje kvalitetom i ISO 14001- Zaštita okoline.

„Svi uposlenici Općine su opredijeljeni za stalna poboljšanja i napredovanja. Sve čestitke za Općinu Visoko“, rekao je Begić.

Načelnica Amra Babić je istakla da je zadovoljna što je Općina Visoko uspješno prošla ovaj audit.

„Inače, jedan od mojih programskih ciljeva je transformacija Općine u servis građanima i upravo u tom pravcu smo radili, i ono što svi uposlenici administracije moraju shvatiti jeste da su njihova radna mjesta javna radna mjesta, te da građani mogu uputiti svoje primjedbe na njihov rad i da oni ustvari ovdje rade u interesu građana, i to uz osmijeh i lijep pristup građanima. Drugi standard se uglavnom odnosi na ekologiju i usko je povezan sa smanjenjem troškova papira, troškova električne energije, plina i ostalih energenata. Niz aktivnosti koje Općina radi u posljednjih nekoliko godina je usmjeren ka tome. Kroz budžet se već vide uštede koje su postignute“, rekla je načelnica Babić.

## POTPISAN UGOVOR O PREVOZU UČENIKA I STUDENATA

Plaćanje troškova prevoza učenika osnovnih škola je u nadležnosti kantona, dok za troškove prevoza učenika srednjih škola i studenata ne postoji takva zakonska obaveza. Kako bi se pomoglo ovoj populaciji Općina je preuzela obavezu da participira u tim troškovima. Općinska služba je za školsku 2014/2015. godinu objavila Kriterije za kategorije učenika srednjih škola i studenata koji imaju pravo korištenja participacije u prevozu. Participacija Općine Visoko u cijeni mjesečne karte iznosi 40%. Sa prevoznikom «Centrotrans-eurolines» d.d. Sarajevo, Općina je potpisala ugovor o prevozu učenika i studenata sa područja općine Visoko.



## Potpisani ugovori o dodjeli stipendija djeci boračke populacije



Ministar za boračka pitanja Zeničko-dobojskog kantona Nedžad Lokmić, potpisao je ugovore za boračke stipendije sa 130 korisnika stipendija s prostora općine Visoko, na osnovu pripadnosti boračkoj populaciji. Visina stipendije određuje se u godišnjem iznosu od 800 KM za studente prve godine i 1.200 KM za studente viših godina. Ove stipendije isplaćivat će se u osam jednakih rata, i to po 100 KM za studente prve godine, a za ostale po 150 KM.

## Dodijeljene stipendije za redovne studente

Općina Visoko je provela konkursnu proceduru za dodjelu stipendija redovnim studentima prvog i drugog ciklusa studija sa prebivalištem na području općine Visoko za akademsku 2013/2014. godinu. Konkurs je raspisalo Ministarstvo za obrazovanje, nauku, kulturu i sport ZDK. Podnesena su ukupno 234 zahtjeva za dodjelu stipendija, a u skladu sa kriterijima odobreno je 218 stipendija u ukupnom iznosu od 128.184,00 KM. Po doznačavanju navedenih sredstava iz budžeta ZDK, studentima su do sada uplaćene po dvije rate u iznosu od 588,00 KM.

## Načelnica Općine Amra Babić obezbijedila školski pribor za socijalno ugrožene učenike



Općinska načelnica Babić obezbijedila je 100 paketa školskog pribora za učenike slabijeg materijalnog stanja u svim osnovnim školama sa područja općine Visoko.

Škole su prethodno dostavile spisak učenika, te su paketi podijeljeni osnovcima uz najljepše želje za sretan početak nove školske godine.

## U Općini Visoko na jedan dan uposljeno pet srednjoškolaca

Općina Visoko je na jedan dan uposlila 5 srednjoškolaca, u okviru projekta "Volontiraj-kreditiraj" koji realizuje Udruženje Infohouse u BiH. Učenici iz Gimnazije "Visoko" i MSŠ "Hazim Šabanović" raspoređeni su po općinskim službama gdje su se upoznali s radom općinske administracije.

Srednjoškolce-uposlenike primila je načelnica Amra Babić, te razgovarala s njima o njihovim planovima za budućnost. Cilj ovog projekta je da učenici na jedan dan, nastavu zamjene danom rada u institucijama i firmama, te tako stvore vlastito mišljenje o radu i uspostave kontakt s potencijalnim poslodavcima.

"Volontiraj-kreditiraj" projekat je posvećen srednjoškolcima sa prostora cijele Bosne i Hercegovine, a implementira ga Udruženje "Infohouse" i Federalno ministarstvo obrazovanja i nauke. Ovo je osmi put da se na području općine Visoko realizira ovaj projekat.

Ove godine, kao i prošle, ukupno 25 učenika je imalo priliku da volontira na nekom radnom mjestu u javnim ustanovama i preduzećima na području općine Visoko. U Općini Visoko na jedan dan zaposleni su visočki srednjoškolci Belma Nahić, Melisa Purić, Nermana Suša, Emir Tatar i Amir Jolić.

## KOMEMORATIVNA SJEDNICA POVODOM SMRTI SULEJMANA TIHIĆA

Povodom smrti Sulejmana Tihića, zamjenika predsjedavajućeg u Domu naroda Parlamentarne skupštine Bosne i Hercegovine i predsjednika Stranke demokratske akcije BiH, u Velikoj sali Općine Visoko održana je komemorativna sjednica, te upućeno iskreno saučešće porodici, prijateljima i saradnicima rahmetli predsjednika.

„Predsjednik Tihić ostat će zapamćen kao čovjek koji je unatoč velikim životnim iskušenjima, hrabro iznio teret obaveza i breme jednog složenog političkog trenutka za BiH i sve njene stanovnike, posebno Bošnjake. Sigurni smo da će ovaj gubitak ostaviti trag u srcima svih članova SDA BiH ali i potaknuti nas da se ujedinito i nastavimo započete procese i borbu za jedinstvenu, neovisnu, cjelovitu državu BiH, idući putem kojim nas je poveo rahmetli predsjednik Izetbegović, a nastavio voditi rahmetli predsjednik Tihić. Porodici, prijateljima i saradnicima želimo sabur, a rahmetli predsjedniku Tihiću rahmet duši i lahku zemlju bosansku“, izjavila je ovom prilikom načelnica Babić.



## Načelnica Babić uputila saučešće za poginule rudare u Zenici

Ožalošćenim porodicama nastradalih rudara, predstavnicima rukovodstva Rudnika mrkog uglja Zenica, Sindikatu rudara FBIH, te predstavnicima vlasti grada Zenice, a u ime izvršne i zakonodavne vlasti, uposlenika administracije i građana općine Visoko, kao i u svoje vlastito ime, načelnica Babić je uputila izraze najdubljeg saučešća u velikoj boli koja je pogodila Zenicu pogibijom pet rudara u rudniku Raspotočje.

## Obilazak starih i iznemoglih osoba na području općine Visoko

Omladinski krug Medžlisa IZ Visoko i Centar za socijalni rad Visoko su pod pokroviteljstvom i na inicijativu načelnice Amre Babić pokrenuli projekat obilaska starih i iznemoglih osoba s područja općine Visoko. Samo tokom prošle godine, Omladinski krug je realizovao nekoliko projekata pomoći – podjela humanitarnih paketa tokom Ramazana i nakon Bajrama, kao i uspješno realizovan projekat obilaska slijepih i slabovidnih lica sa područja Visokog. Omladinski krug Medžlisa IZ Visoko ovim projektom nastavlja kontinuiran rad na polju društvenog angažmana i aktivnosti koje su na dobrobit svih stanovnika općine Visoko, a posebno onih kojima je pomoć zaista potrebna. Projekat obilaska starih i iznemoglih osoba sa područja općine Visoko nastaviti će se i u narednom periodu.



## Sindikata policije MUP-a ZDK uručio zahvalnicu načelnici



U Velikoj sali Općine Visoko, Osnovna organizacija sindikata PU Visoko bila je domaćin godišnje Skupštine sindikata policije MUP-a ZE-DO kantona. Sindikat policije MUP-a ZE-DO kantona dodijelio je zahvalnicu načelnici Općine Visoko Amri Babić za doprinos pri pomoći građanima nastradalim u elementarnoj nepogodi 2014. godine. Zahvalnicu je uručio predsjednik sindikata Almir Salkičević, te istakao značaj pomoći koju je Općina Visoko uputila stanovništvu drugih općina ZDK u prvim, najtežim trenucima elementarne nepogode.

## Zahvalnica Općine Žepče dodijeljena Općini Visoko



Na svečanoj sjednici Općinskog vijeća Žepče održanoj povodom obilježavanja 14. oktobra, Dana općine, načelnik Mato Zovko uručio je godišnje nagrade, javna priznanja i zahvalnice.

Općini Visoko je dodijeljeno javno priznanje Zahvalnica općine Žepče za donacije i doprinos normalizaciji života u ovoj općini nakon prirodne nesreće u 2014. godini. Zahvalnicu je primila načelnica Općine Visoko Amra Babić.

## Uručene nagrade za najljepša školska dvorišta

U okviru Konkursa za izbor najljepšeg školskog dvorišta, načelnica Amra Babić uručila je zahvalnice i novčane nagrade predstavnicima OŠ "Safvet-beg Bašagić" Visoko koji su osvojili prvu nagradu, predstavnicima OŠ "Mula Mustafa Bašeskija" Donje Moštre za osvojenu drugu nagradu, te OŠ "Musa Ćazim Ćatić" Veliko Čajno za treću nagradu. Komisija za izbor najljepšeg školskog dvorišta, prethodno je obišla sve prijavljene škole i uzimajući u obzir površinu koja se uređuje (odnos zelenih i asfaltnih površina), način uređenja i trenutno stanje školskog dvorišta, izvršila odabir tri najljepša školska dvorišta. Općinska načelnica je istakla značaj jačanja svijesti učenika o očuvanju životnog okruženja upravo kroz izbor najljepših školskih dvorišta na području općine Visoko.





## STRATEGIJA KOMUNICIRANJA OPĆINE VISOKO S JAVNOŠĆU

Općinsko vijeće Visoko je na 24. sjednici usvojilo Strategiju komuniciranja Općine Visoko s javnošću za period 2015 - 2021. godina, čiji je cilj bolje i efikasnije međusobno komuniciranje građana i organa vlasti općine Visoko. Prethodno je, prema Odluci Općinskog vijeća Visoko, načelnica Amra Babić oformila Koordinaciono tijelo zaduženo za vođenje

procesa s ciljem izrade što efikasnije i obuhvatnije Strategije komuniciranja Općine Visoko s javnošću. Ovo je još jedan od koraka ka opredjeljenju Općine Visoko za unapređenje transparentnosti u radu, političke i društvene odgovornosti u institucionalnom odlučivanju, kao i odgovornog upravljanja javnim dobrima.

## OPĆINA VISOKO PRISTUPILA GOLD PROJEKTU

Općinska načelnica i njeni saradnici su održali sastanak s direktorom projekta GOLD, gospodinom Mark T. McCord-om i ekspertima USAID-a i SIDA-e za Lokalni ekonomski razvoj. Tema sastanka bila je: Pogodnosti pristupanja Općine Visoko GOLD projektu.

Općina Visoko je na adresu USAID BiH i SIDA BiH početkom januara 2014. godine uputila pismo namjere kojim je iskazala zainteresiranost za pristupanje projektu „GOLD - Growth-Oriented Local Development Program“, koji zajednički implementiraju USAID i SIDA.

Općina Visoko jedna je od općina s kojom je USAID i SIDA projekt potpisao Memorandum o razumijevanju i na taj način je uvrštena s još 47 jedinica lokalne samouprave u BiH u projekat unapređenja Lokalnog razvoja GOLD čiji je cilj stvaranje novih radnih mjesta putem integrisanog i sveobuhvatnog planiranja Lokalnog ekonomskog razvoja u općinama. Planirano je da će se cilj provoditi u narednih pet godina.



## SARADNJA USAID, SIDA I OPĆINE VISOKO S CILJEM POVEĆANJA ZAPOSLENOSTI I INVESTICIJA



Predstavници Američke agencije za međunarodni razvoj (USAID) i Švedske međunarodne agencije za razvoj i saradnju (SIDA) potpisali su u Sarajevu Memorandum o razumijevanju s načelnicima 11 partnerskih općina koje gravitiraju Sarajevu za “Projekat unaprjeđenja lokalnog razvoja” (GOLD). Riječ je o općinama Visoko, Goražde, Ilidža, Istočna Ilidža, Istočno Novo Sarajevo, Novi Grad, Novo Sarajevo, Pale, Stari Grad, Vogošća i Zenica.

Savjetnik Švedske ambasade/SIDA-e, Pelle Persson naglasio je da lokalne zajednice moraju iskoristiti svoje jedinstvene prednosti kako bi zadržale postojeće i privukle nove investicije, te da će saradnja s GIZ-om dodatno doprinijeti povećanju konkurentnosti partnerskih općina. Naglašeno je da će za ostvarivanje ciljeva projekta biti angažirani građani, javni i privatni sektor, akademska zajednica, nevladine organizacije, te donatori.

## PRVI EFEKAT USAID SIDA GOLD PROJEKTA: 143 RADNA MJESTA



Općina Visoko kao partner i potpisnik Sporazuma o partnerstvu u realizaciji USAID SIDA GOLD projekta, učestvovala je u stručnom osposobljavanju i zapošljavanju radnika za potrebe kompanija PREVENT BH i Company D&U, radi stvaranja uslova za zapošljavanje nezaposlenih lica sa područja općine Visoko.

Cilj Sporazuma je bolja efikasnost funkcionisanja tržišta rada, jačanja institucionalnih kapaciteta, te povezivanja oblasti rada i oblasti obrazovanja.

U saradnji sa Mješovitom srednjom školom „Hazim Šabanović“ iz Visokog, u prethodnom periodu razvijen je program obuke u neformalnom obrazovanju za sticanje znanja i vještina za posao obučara, nakon čega su kandidati prošli kroz proces obuke.

Nakon što je završena obuka stručnog usavršavanja za zanimanje obučar, u stalni radni odnos u firmu Company D&U primljene su 63 osobe. Također, kroz dokvalifikaciju i školovanje, kao dio projekta implementiranog u Visokom, zaposleno je i 80 osoba u PREVENT BH, što ukupno čini 143 nova radna mjesta.

## OPĆINSKA NAČELNICA AMRA BABIĆ I POTENCIJALNI INVESTITORI OBIŠLI POSLOVNE ZONE U VISOKOM



Općinska načelnica sa saradnicima, u sarajevskom Bosmal City Center-u, prisustvovala je prezentaciji u organizaciji USAID SIDA GOLD projekta i Agencije za promociju stranih investicija (FIPA).

Na prezentaciji su investitorima, koji su iskazali konkretni interes za ulaganje u našu zemlju, a koji dolaze iz cijelog svijeta, predstavljene prednosti ulaganja u BiH.

Nakon prezentacije načelnice Babić na temu "Zašto investirati u Visoko", potencijalni investitori su obišli poslovnu zonu Topuzovo Polje, privredni subjekt Prevent Leather Sarajevo d.o.o. Visoko i slobodne kapacitete KTK Visoko. Općina Visoko u narednom periodu očekuje da zajedno sa zainteresiranim kompanijama iz Visokog uspostavi saradnju s ciljem otvaranja novih radnih mjesta na području općine Visoko.



## U OPĆINI VISOKO FORMIRANA KANCELARIJA ZA PRIVREDNIKE

Kancelarija za privrednike formirana je odlukom općinske načelnice, a cilj joj je pružanje pomoći privrednim društvima i poduzetnicima iz oblasti obrta, ugostiteljstva i trgovine u rješavanju postupaka i upućenih zahtjeva općinskim službama uprave, kao i saradnja sa udruženjima privrednika, poljoprivrednika i drugim udruženjima koja se bave privredno-razvojnim aktivnostima, te stvaranje baze podataka i promoviranje privrednog razvoja na području općine Visoko.

Služba za finansije, privredu i lokalni ekonomski razvoj komunicira sa privrednim društvima putem e-mail adrese: [e-salter@visoko.gov.ba](mailto:e-salter@visoko.gov.ba), a u narednom periodu očekuje uspostavu sistema «elektronske pošte» kako bi se omogućilo elektronsko komuniciranje između ove kancelarije i privrednika.



## Općina Visoko odabrana za učešće u UNDP projektu LOD IV

Općina Visoko je nakon podnesene prijave u okviru javnog poziva za jedinice lokalne samouprave (JLS), odabrana za učešće u sklopu projekta "Jačanje lokalne demokratije/demokratije IV (LOD IV)".

**P**redstavnici Razvojnog programa Ujedinjenih naroda (UNDP) i 6 općina iz BiH (Visoko, Kotor Varoš, Novo Sarajevo, Šekovići, Berkovići, Cazin), odabranih partnera na projektu Jačanje lokalne demokratije IV (LOD IV), potpisali su u Sarajevu Memorandum o razumijevanju.

Učešće u projektu Jačanje lokalne demokratije IV (LOD IV) je rezultat iskazane opredijeljenosti Općine Visoko za unapređenje rada i odnosa sa civilnim društvom, što će rezultirati jačanjem partnerskih odnosa lokalnih vlasti i nevladinog sektora.

*Primjenom LOD metodologije i projektnog pristupa, građani putem civilnog sektora mogu definisati prioritete u koje će javna sredstva biti usmjerena. Nasuprot direktnoj dodjeli sredstava (gdje se sredstva dodjeljuju organizacijama na osnovu njihovog lobiranja i osobnog zalaganja, nezavisno od prioriteta i potreba) korištenje projektnog pristupa obuhvaćenog LOD metodologijom građanima osigurava uključenost u sam proces, te tako na neposredan način doprinosi efikasnijem i bržem rješavanju problema.*

## Nova oprema i digitalizovani planovi za unapređenje rada katastra

U Federalnoj upravi za geodetske i imovinsko-pravne poslove (FGU), predstavnicima Odsjeka za katastar i imovinsko-pravne poslove, predata je geodetska oprema koja je nabavljena za potrebe rada Službe za urbanizam, stambeno-komunalne poslove i katastar nekretnina Općine Visoko. Opremu je uručio direktor FGU, Željko Obradović.

**P**redstavnik Odsjeka za katastar i imovinsko-pravne poslove Općine Visoko Fuad Kukić je objasnio da je nabavku nove opreme finansirala Općina Visoko, a koja uključuje dva instrumenta, GPS Rover - instrument za mjerenje vezan satelitom, te TPS ili totalnu stanicu, elektronski daljinomjer namijenjen za snimanje terena radi prenosa podataka sa terena na planove.

Prethodno je u Federalnoj upravi za geodetske i imovinsko-pravne poslove izvršeno preuzimanje digitalizovanih planova za četiri katastarske općine: Visoko, Ozrakovići, Kraljevac i Alaudin, koji su zajednički uradili Općina Visoko i FGU.

Vrijednost ovih planova i opreme iznosi oko 70.000 KM. Građani mogu preko interneta i uz broj katastarske čestice pristupiti ovim digitalizovanim planovima.



## DELEGACIJA OPĆINE VISOKO POSJETILA CENTAR ZA UPRAVLJANJE KOMUNALNIM OTPADOM U KONJICU



Delegacija Općine Visoko, koju su činili načelnica Amra Babić, pomoćnica načelnice Nidžara Hadžiomerović, šef Odsjeka za stambeno-komunalne poslove Emir Bukurević, rukovodilac Službe za poslove Općinskog vijeća Zekija Omerbegović, predsjednica i potpredsjednica Općinskog vijeća Visoko, Mirela Mateša Bukva i Aida Zerdo, vijećnici Općinskog vijeća, predstavnici mjesnih zajednica, te članovi Nadzornog odbora i direktor JKP "Visoko", posjetili su Centar za upravljanje komunalnim otpadom u Konjicu.

Posjeta Centru za upravljanje komunalnim otpadom organizovana je u skladu sa Zaključkom Općinskog vijeća koji je donesen prilikom razmatranja Informacije o stanju i zaštiti životne sredine na području općine Visoko sa posebnim osvrtom na zbrinjavanje otpada i poslovima na projektovanju i stavljanju u funkciju reciklažnog dvorišta sa transfer stanicama.

Enver Tahirović, direktor JKP „Standard“, naglasio je da je Centar izgrađen na lokaciji bivše deponije.

- "Oдавде ne izlazi ništa što onečišćuje rijeku Neretvu i okolinu, nema neugodnih mirisa. Kapacitet ovog postrojenja je prerada smeća u količini od 5 tona na sat, a proces obrade počinje vaganjem kamiona na kolskoj vagi, zatim kamion ulazi u Centar, te se istresa smeće. Tom prilikom voda iz otpada teče ispod rešetki predviđenih za tu namjenu, ide ka kolektoru i u prečišćivač. Dalje, kranom se kupi smeće i stavlja na traku, pa ide do separatora (rotor koji selektira otpad po veličini). Kad izađe iz separatora, radnici razvrstavaju smeće. Sav obrađeni otpad može se prodavati spalionicama, cementarama i sl. u vidu goriva dobivenog obradom otpada, a koje je suho i stabilno, bez neugodnih mirisa. Korištenjem goriva iz otpada smanjuje se količina otpada koji se odlaze na odlagalištima, time i troškovi energije, manje su emisije stakleničkih plinova odnosno ugljičnog dioksida, a otvaraju se nove mogućnosti za razvoj lokalne privrede", rekao je Tahirović.



### POSTROJENJE ZA OBRADU OTPADA I U VISOKOM

Načelnica Babić je napomenula da su za gradnju ovakve vrste postrojenja u Visokom već odobrena sredstva Fonda za zaštitu okoline, te da postoje i drugi izvori finansiranja.

- „Projektna dokumentacija je skoro gotova, sad smo u fazi određivanja lokacije. Čim odredimo lokaciju idemo dalje, a mogli bi za godinu dana ovakvo postrojenje imati i u Visokom. Pozivam sve građane koji imaju dilemu, da dođu u Konjic i uvjere se u ekološki pristup prerade smeća“, rekla je načelnica Babić.

## Plan izgradnje mini hidroelektrana na vodotocima općine Visoko

U Općini Visoko je održana press konferencija povodom prezentacije projekta "Izgradnja mini hidroelektrana na rijekama Bosna i Fojnica". O aktivnostima na pripremi i realizaciji projekta izgradnje malih hidroelektrana na vodotocima općine Visoko govorili su predsjednik Nadzornog odbora JP „Visoko Ekoenergija“, Doc.Dr. Marin Petrović, dipl.ing.maš. i direktor JP „Visoko Ekoenergija“, Hajrudin Handžić, dipl.ing.maš.

JP „Visokogas“ d.o.o. Visoko je u posljednjih nekoliko godina bilo najuspješnije javno preduzeće na područje općine Visoko. Ovo preduzeće kontinuirano ostvaruje dobit i izmiruje sve svoje obaveze. Ugovorom o prodaji i prijenosu udjela u društvu „Visokogas“, zaključenim između osnivača društva, Općina Visoko je kupovinom udjela drugog osnivača (Energoinvest d.d. Sarajevo) stekla 100% vlasništva nad društvom, čime su se stvorili uslovi za reorganizaciju društva, a sve u skladu s reformom javnog sektora koja se trenutno provodi u javnim preduzećima i javnim ustanovama na području općine Visoko. Reorganizacija društva „Visokogas“ je započeta na osnovu odluke Nadzornog odbora i potvrde Općinskog vijeća pri čemu je promijenjen naziv firme u JP „Visoko Ekoenergija“ d.o.o. i proširena djelatnost.

### RAZVOJ PREDUZEĆA I POBOLJŠANJE KVALITETA ŽIVOTA

Prateći svjetske trendove vezane za rast pojedinih industrijskih sektora, poslovi vezani za energiju i energetska efikasnost imaju poseban tretman. S jedne strane je prisutna sve veća potrošnja energije što vodi ka sve većoj potražnji, a s druge strane postoji sve veća potreba za pojačanom energetska efikasnošću. Preduzeću je proširena djelatnost u segmentu projektiranja, inženjeringa i upravljanja energetska projektima, sa posebnim fokusom na obnovljive izvore energije. Ovakvo proširenje djelatnosti u smjeru mogućnosti korištenja



obnovljivih izvora energije u skladu je s energetska politikama FBiH, obavezama koje država BiH treba ispuniti u pogledu potrošnje energije i smanjenja emisija štetnih sastojaka u atmosferu, te direktivama Evropske unije. Također otvorene su velike mogućnosti za razvoj, kako samog preduzeća, tako i poboljšanja kvaliteta života na općini Visoko.

### HIDROELEKTRANE U 100% VLASNIŠTVU OPĆINE VISOKO

Kao prioritetan energetska projekat Općine Visoko u narednom periodu nameće se iskorištavanje hidropotencijala vodotoka na području općine, odnosno korištenje „čiste“ energije dobivene izgradnjom malih hidroelektrana na rijekama Bosni i Fojnici. Realizacijom ovakvog projekta, općina Visoko bi bila prva općina u Bosni i Hercegovini koja bi izgradila male hidroelektrane na vodotocima svoje općine koje bi bile u 100% vlasništvu općine Visoko i njenih

građana, odnosno koje bi predstavljale javno dobro. Aktivnosti na pripremi ovog projekta su započete u septembru prošle godine kada je naručena „Prethodna studija o istraživanju potencijala za gradnju malih hidroelektrana na vodotocima na području općine Visoko“.

### OSAM HIDROELEKTRANA NA RIJEKAMA BOSNI I FOJNICI

Osnovna ideja je da se grade protočne male hidroelektrane uz glavni uslov da akumulacija i mala jezera ostaju u sadašnjim koritima rijeka. Na rijeci Bosni je predviđena izgradnja 4 male hidroelektrane (tri snage oko 8 MW i jedna snage oko 4 MW), dok su četiri predviđene na rijeci Fojnici (tri snage po oko 2 MW i jedna snage 1 MW). Brane na Bosni bi imale jezera u širini sadašnjeg korita rijeke, a dužina bi bila od 3-5 km. Dužine jezera na rijeci Fojnici bi bile 2-3 km. Na ovim jezerima će biti moguće kupanje, eventualni kavezni uzgoj riba, jezera će biti pogodna

za poribljavanje i sportski ribolov, vožnju čamcima itd. S obzirom na to da bi gornja mala HE na rijeci Fojnici mogla bila izgrađena s općinom Kiseljak, vjerovatnoća je da će i Kiseljak krenuti s izgradnjom kolektora i prečišćavanjem kanalizacije.


### MOGUĆNOST STVARANJA ENERGETSKI NEOVISNE OPĆINE

Realizacijom ovakvog projekta obale rijeka bi bile uređene većinom kao lijeva obala rijeke Fojnice (tzv. Sicilija), dok bi ostali dijelovi obala koje su sada prirodno visoke (Ozrakovići i sl.) bile također uređene, ali vjerovatno ne i potpuno betonirane. Na čitavom toku rijeka, gdje bi postojala potreba, ugradili bi se kolektori za kanalizaciju, čime bi bio završen započeti projekat izgradnje kolektora kanalizacije na općini Visoko. Obale bi bile podignute tako da i tzv. stogodišnje vode prođu koritom, a da ne poplave okolno zemljište. Bilo bi omogućeno bezgranično vještačko navodnjavanje njiva u bližoj i daljoj okolini rijeka.

Uređivanjem bi se obale rijeka prilagodile u turističko-rekreativne svrhe, kao što su izgradnja biciklističkih staza, staza za šetnju, trčanje i slično.

Općina Visoko bi postala energetski neovisna od ostatka države, što je od ogromnog značaja u slučaju eventualne prodaje JP „Elektroprivreda BiH“, koja s obzirom na trenutnu političko - ekonomsku situaciju postaje sve izvjesnija.

Predstudija je pokazala da su ekonomski parametri ovog projekta više nego obećavajući, uz znatnu materijalnu dobit koja ostaje općini Visoko i koja se može usmjeriti na dalji razvoj općine, smanjenje cijene gasa, druge projekte i slično.





## Rezultati kampanje "Sjećanje na drugačiji način - VRATIMO DUG LJILJANIMA"- zaposleno 15 djece šehida i poginulih boraca

U Općini Visoko održana je press konferencija na kojoj su predstavljeni rezultati javne kampanje „Sjećanje na drugačiji način- VRATIMO DUG LJILJANIMA“.

Javna kampanja je pokrenuta da bi se aktualizirao problem zapošljavanja djece šehida, a podržava je Upravni odbor organizacije porodica šehida i poginulih boraca „Visoko 92“, Udruženje građana „Mladi volonteri“, kao i načelnica Općine Visoko. Medijima su se obratili načelnica Amra Babić i Adnan Mević u ime navedenih udruženja.

“Kompanije koje su nam pozitivno odgovorile su Sinerga, Deep reklame i Alma Ras. Postigli smo da od četrdeset troje djece, njih petnaest bude pozvano na intervju za posao, a u Općini Visoko u Službi za društvene djelatnosti, boračko-invalidsku zaštitu jedno dijete šehida primljeno je kao pripravnik. Voljela bih da i ostali privredni subjekti pokažu interes za ovu kampanju. Zahvaljujem se preduzećima koja su se odazvala pozivu kako bismo jedan od dugova prema našim „ljljanima“, koji su svoj život ugradili u našu slobodu, barem simbolično vratili upošljavanjem njihove djece”, rekla je načelnica Babić i istakla da se kampanja nastavlja.

## Općina Visoko potpisala ugovor za provođenje certifikacije i dodjelu certifikata BFC SEE

Općina Visoko je ispunila potrebne kriterije za uključenje u proces dobijanja certifikata, te je odabrana kao jedna od ukupno osam općina u Federaciji BiH za potpisivanje ugovora o implementaciji postupka certificiranja koji bi trebao u konačnici rezultirati BFC SEE znakom za Općinu Visoko. Ovaj projekt podržava Njemačka agencija za međunarodnu saradnju (GIZ), kroz projekat Otvoreni regionalni fond za modernizaciju općinskih usluga u Jugoistočnoj Evropi i Švicarska agencija za razvoj i saradnju (SDC). BFC SEE certifikat je pečat kvaliteta koji je u kratkom roku postao široko priznat pokazatelj efikasne lokalne administracije i povoljne investicione klime u jugoistočnoj Evropi.

## Primopredaja prostorija Dobrovoljnom vatrogasnom društvu



U Vatrogasnom domu u Visokom, nakon više od 20 godina, svečano su predate na korištenje prostorije DVD “Visoko”. Općinska načelnica je podsjetila prisutne da je tradicija vatrogastva u Visokom duga 117 godina. Prostorije će u narednom periodu služiti za sastanke, edukaciju i druženje članova Dobrovoljnog vatrogasnog društva.

## REALIZOVANA IDEJA O SPORAZUMU KOJI SE ODNOSI NA NAJUGROŽENIJE STANOVNIŠTVO OPĆINE VISOKO

Sporazum o implementaciji projekata namijenjen najugroženijem stanovništvu općine Visoko potpisan je u Općini Visoko između Kemala Bakovića, direktora kompanije "Abrax company" i predstavnika Humanitarne organizacije "Muslim Educational Society", te Šaćira Čelebića, direktora JU "Centar za socijalni rad" Visoko.

Riječ je o sljedećim projektima: "Nabavka ogrijeva najugroženijem stanovništvu općine Visoko", "Zaštita zdravlja socijalno najugroženijem stanovništvu općine Visoko" i "Humanitarna pomoć najugroženijem stanovništvu općine Visoko". Ovim projektima najugroženiji stanovnici općine Visoko dobili su po 3 kubna metra iscijepanih i složenih drva, besplatne lijekove posredstvom apoteke „Nera“, te novčana sredstva za porodice sa djecom bez jednog ili oba roditelja.



Kemal Baković je rekao da Humanitarna organizacija "Muslim Educational Society" djeluje pri Vladi Kraljevine Bahrein. Ahmed Alabrax, generalni direktor "Abrax company" je član ove humanitarne organizacije i sa predsjednikom iste je posjetio Visoko gdje se susreo sa načelnikom Babić. Tom prilikom je dogovorena donacija vrijedna 34.000 eura, kao i konkretna pomoć čiji je rezultat potpisivanje Sporazuma o implementaciji navedenih projekata.

Načelnica Amra Babić je istakla da je posjeta dobro namjernih prijatelja Visokom urodila realizacijom tri značajna projekta i milionskom donacijom koja dolazi u Visoko, napomenuvši da će od ovog sporazuma imati korist naši sugrađani koji su u stanju socijalne potrebe, a potpisivanje istog je jedan u nizu projekata koji su dogovoreni prilikom posjete delegacije Kraljevine Bahrein Općini Visoko.

## KUPOVINA PLINSKOG KOTLA OMOGUĆILA RADNICIMA PREDUZEĆA "VITEX" DA ZADRŽE POSAO

Shodno dogovoru načelnice Babić i predstavnika sindikata TI "Vitex", Općinsko vijeće je predložilo Nadzornom odboru i direktoru JP "Visoko Ekoenergija" da razmotre mogućnost sudske kupovine plinskog kotla preduzeća "Vitex" Visoko, obzirom da je isti, predmet sudskog izvršenja, i ako bude otuđen, proizvodnja u ovom preduzeću bi bila dovedena u pitanje.

Direktor JP "Visoko Ekoenergija" i Nadzorni odbor su donijeli odluku da prihvate preporuku Općinskog vijeća, te su na drugoj prodaji u izvršnom postupku realizovali kupovinu plinskog kotla, čime je osiguran dalji rad kotlovnice i obavljanje posla radnika "Vitex"-a.

Hajrudin Handžić, direktor JP "Visoko Ekoenergija" zahvalio se načelnici Babić, Općinskom vijeću i Nadzornom odboru firme "Visoko Ekoenergija" na uspješnom zajedničkom rješenju problema, te naglasio da je najvažnije da će radnici "Vitex"-a moći nesmetano raditi svoj posao.



## PRUŽANJE BESPLATNE PRAVNE POMOĆI GRAĐANIMA OPĆINE VISOKO

Od juna 2013. godine do juna 2014. godine Općina Visoko realizovala je projekat u prostorijama JU Centar za socijalni rad Visoko sa udruženjem „Gram Concordia“ Zenica za pružanje besplatne pravne pomoći. Nakon isteka ugovora sa pomenutim udruženjem, općinska Načelnica je sklopila ugovor sa Kantonalnim zavodom za besplatnu pravnu pomoć Zenica kako bi pomogla licima koji nisu u mogućnosti da plaćaju pravne usluge koje su im neophodne.



Besplatna pravna pomoć pružala se u svim segmentima prava; od pružanja pravnih savjeta, pisanja žalbi, tužbi za pojedine sporove (brakorazvodne, imovinske, radne, obligacione i sl.). Susretljivošću predstavnika udruženja „Gram Concordia“ Zenica i predstavnika Kantonalnog zavoda za besplatnu pravnu pomoć Zenica,

kao i razumijevanjem općinske Načelnice u obezbjeđenju takvog vida pomoći za građane općine Visoko, pružena je mogućnost velikom broju stanovnika kojima su pravni savjeti i usluge neophodni, što je rezultiralo velikim brojem korisnika i njihovim zadovoljstvom korištenja besplatnih pravnih usluga.

## JAČANJE ULOGE ŽENA I MLADIH LIDERA U JAVNOM I POLITIČKOM ŽIVOTU U BOSNI I HERCEGOVINI

Vijeće Evrope, USAID misija u Bosni i Hercegovini i Udruženje izbornih zvaničnika Bosne i Hercegovine, u okviru projekta "Jačanje uloge žena i mladih lidera u javnom i političkom životu u Bosni i Hercegovini", održali su sastanak s ciljem informisanja i daljnjeg motiviranja žena i mladih da preuzmu aktivnu ulogu u bosanskohercegovačkom društvu, te da podignu svijest o važnosti uloge žena u javnom, političkom i društvenom životu.



Sastanku su prisustvovala predstavnice političkih stranaka zastupljenih u Općinskom vijeću Visoko, javnih preduzeća i javnih ustanova s područja općine Visoko, kao i udruženja žena i mladih. One su uzele aktivno učešće u raspravi i pokazale interes za snažniji javni i politički angažman.



Projekat "Jačanje uloge žena i mladih lidera u javnom i političkom životu u Bosni i Hercegovini" promovira integraciju žena i mladih u socijalni i politički život zajednice, podiže svijest o tome kako izbor odgovornih predstavnika može poboljšati uslove života u zajednici, kao i važnost njihove uloge u kreiranju boljeg životnog, društvenog i političkog okruženja.

## ODRŽAN SASTANAK RADNE GRUPE ZA ZAŠTITU DJECE

U Općini Visoko održan je prvi sastanak Radne grupe za zaštitu djece. Inicijativu za formiranje ove Radne grupe dala je načelnica Amra Babić u saradnji sa humanitarnom organizacijom World Vision kroz implementaciju više projekata na istu tematiku.

Cilj Radne grupe je spriječiti bilo koji oblik zlostavljanja, eksploatacije ili zanemarivanja djece, kao i formiranje mehanizama šta konkretno uraditi i kome se obratiti u ovim slučajevima, te implementiranjem projekata potaknuti zajednicu da se uključi u rješavanje navedenih problema.

Zaključak koji je donesen uključuje preventivno djelovanje prema roditeljima i djeci uz sudjelovanje nastavnika.



## USVOJEN ZAKON O OBRAZOVANJU ODRASLIH

Članovi Radne grupe Ministarstva za obrazovanje, nauku, kulturu i sport ZDK Nevzeta Rezaković i Rasim Bajrić, u Općini Visoko su predstavili nacrt Zakona o obrazovanju odraslih.

Tom prilikom istaknuto je da su ciljevi ovog Zakona osiguravanje minimuma obrazovanja, podizanje funkcionalne pismenosti, pomoć licima koja nisu stekla osnovno obrazovanje, dokvalifikacija i prekvalifikacija lica, obrazovanje odraslih u skladu sa ličnim kompetencijama. Naglašeno je da donošenje ovog Zakona pruža nadu da postoji rješenje i da društvo mora omogućiti minimum obrazovanja kako bi se osposobilo što više osoba.

Zakon o obrazovanju odraslih usvojen je na 60. sjednici Skupštine Zeničko-dobojskog kantona, koja je održana 13.08.2014. godine.



## OPĆINSKO VIJEĆE USVOJILO BUDŽET ZA 2015. GODINU

Krajem decembra održana je 23. sjednica Općinskog vijeća Visoko, te je sa 19 glasova "ZA" i 5 "suzdržanih", usvojen prijedlog općinskog budžeta za 2015. godinu.

Cifra od 13.360.000 KM bila je polazni okvir budžeta, koji je predložen u formi Nacrta, a u konačnici nije pretrpio značajnije korekcije i iznosi 13.800.000 KM.





## APLICIRANI PROJEKTI OPĆINE VISOKO U 2014. GODINI

Općina Visoko je tokom 2014. aplicirala na javne pozive domaćih i stranih vladinih i nevladinih institucija. Odsjek za LER (lokalni ekonomski razvoj) redovno prati javne pozive kako ministarstava, tako i svih ambasada u našoj zemlji, te u skladu sa ovim pozivima aplicira na iste. Općini Visoko je tokom 2014. godine odobreno 635.991,04 KM iz domaćih vladinih i nevladinih institucija.

Sporazumom o zajedničkom učešću u realizaciji projekata iz Programa utroška sredstava vodnih naknada za 2014. godinu Ministarstva za poljoprivredu, šumarstvo i vodoprivredu ZDK, ukupna planirana vrijednost za realizaciju odobrenih projekata je 345.000,00 KM. Obzirom da su ugovoreni projekti u vrijednosti od 171.017,73 KM, Općina Visoko je dala prijedlog da se preostali iznos od 173.982,27 KM iskoristi za realizaciju projekta izgradnje kanalizacione mreže u naselju Oštrac, a nedostajuća sredstva će biti obezbijeđena iz budžeta Općine Visoko.

Općini Visoko su odobrena sredstva za izradu studije opravdanosti uspostavljanja javno-privatnog partnerstva za izgradnju reciklažnog dvorišta i transfer stanice u iznosu od 30.000,00 KM od strane Vlade Zeničko-dobojskog kantona.

Za Centar za selekciju komunalnog otpada sa pratećim sadržajima, Fond za zaštitu okoliša FBiH odobrio je 200.000,00 KM.

Za iluminaciju srednjovjekovnog grada "Visoki", Federalno ministarstvo kulture i sporta odobrilo je 10.000,00 KM.

Za rekonstrukciju putne, vodovodne i kanalizacione infrastrukture u ulici Izeta Kurtalića i ulici Visočkih brigada, Ministarstvo za ljudska prava i izbjeglice BiH odobrilo je 41.605,30 KM, a za Projekt rekonstrukcije dijela putne infrastrukture u ulici Rašidovića isto ministarstvo je odobrilo 9.385,74 KM.

Za izgradnju kanalizacione mreže u naselju Oštrac, mjesna zajednica Buci Ministarstvo za poljoprivredu, šumarstvo i vodoprivredu ZDK odobrilo je 100.000,00 KM.

Za rekonstrukciju lokalnog vodovoda „Kučetine“, u mjesnoj zajednici Goduša, sa povećanjem kapaciteta i proširenjem zone vodosnadbijevanja, Ministarstvo za poljoprivredu, šumarstvo i vodoprivredu ZDK odobrilo je 35.000,00 KM.

Za rekonstrukciju mjesnog vodovoda Šošnje, MZ Podvinci, Ministarstvo za poljoprivredu, šumarstvo i vodoprivredu ZDK, odobrilo je ukupno 80.000,00 KM, a za rekonstrukciju sa proširenjem vodovodne mreže u naselju Smršnica, MZ Gračanica, ovo ministarstvo odobrilo je 50.000,00 KM.

Za izradu projektne dokumentacije u vezi sa regulacijom Muhašinovičkog potoka, Ministarstvo za poljoprivredu, šumarstvo i vodoprivredu, odobrilo je 6.700,00 KM.

Za sljedeće projekte: Izgradnju lokalnog puta u naselju Kralupi (od raskrsnice Slatina do stare škole u Čifluku), zatim izgradnju lokalnog puta Zaseok-Grab, projekt izgradnje kanalizacione mreže - fekalni kolektor u naselju Kula Banjer i adaptaciju pravoslavne kapele, donosena je odluka o utvrđivanju rang liste projekata i brojem bodova, te je poslat upit Federalnom ministarstvu raseljenih osoba i izbjeglica o odobrenim sredstvima.



## PRIMOPREDAJA KAMIONA ZA PRIKUPLJANJE I ODVOZ OTPADA

Izvršena je primopredaja kamiona za prikupljanje otpada kapaciteta 9 tona čija je vrijednost 211.768,83 KM, a na osnovu sporazuma između Švedske međunarodne agencije za obnovu i razvoj (SIDA) i Općine Visoko.

Predstavnici Službe za urbanizam, stambeno- komunalne poslove i katastar nekretnina naglasili su da je riječ o donaciji kojom će se unaprijediti i učiniti efikasnijim sistem odlaganja čvrstog otpada.

Program na osnovu koga je realizovan ovaj projekat ima za cilj doprinos u očuvanju životnog okruženja, da olakša rad na terenu Komunalnom preduzeću "Visoko", te da stanovnicima općine Visoko omogući odlaganje otpada u namjenske kante i kontejnere.

Projekat je finansiran od strane Ambasade Švedske posredstvom Švedske međunarodne agencije za obnovu i razvoj, a provodila ga je konsultantska kuća Grontmij iz Švedske i Danske. Dobavljač ovog komunalnog vozila je konzorcij „RESOR“ i „LIV-S“.

## USTUPANJE OPREME ZA PRIKUPLJANJE OTPADA

Općini Visoko potpisan je Protokol o ustupanju opreme za prikupljanje otpada na korištenje između Službe za urbanizam, stambeno- komunalne poslove i katastar nekretnina, i predsjednika mjesnih zajednica, a u cilju proširenja pokrivenosti teritorije općine Visoko organizovanim odvozom otpada.

Predmet ovog Protokola je dio donirane opreme u okviru projekta koji je Općina Visoko realizovala sa Švedskom razvojnom agencijom SIDA, a u skladu sa Planom upravljanja otpadom na području općine Visoko i odnosi se na 39 kontejnera.

Mjesne zajednice u kojima su postavljeni kontejneri, a koje su uključene u projekat ustupanja opreme za prikupljanje otpada su: Liješeva, Radovlje, Podvinci i Vratnica.



## AKTIVNOSTI NA IZGRADNJI CENTRA ZA UPRAVLJANJE KOMUNALNIM OTPADOM SA PRATEĆIM SADRŽAJEM

Cilj projekta izgradnje Centra za upravljanje komunalnim otpadom je da se smanjenjem količine otpada za deponiranje smanje finansijski izdaci za prijevoz i deponiranje otpada na RD „Moščanica“ Zenica, kao i da se selektirani otpad u narednom periodu pretvori u korisnu sirovinu.

Na osnovu Javnog poziva za dodjelu sredstava za realizaciju programa, projekata i sličnih aktivnosti iz područja zaštite okoliša za 2014.g. rapisanog od strane Fonda za zaštitu okoliša Federacije BiH, Odsjek za lokalni ekonomski razvoj Općine Visoko je aplicirao za projekat „Centar za upravljanje komunalnim otpadom sa pratećim sadržajem“, na osnovu čega su Općini odobrena finansijska sredstva u iznosu od 200.000 KM.

Obezbjedenjem navedenih sredstava Općina Visoko je omogućila nastavak ranije započetih aktivnosti na izgradnji „Centra za upravljanje komunalnim otpadom sa pratećim sadržajem“.





## U VISOKOM I SARAJEVU PREZENTIRAN INVESTICIONI PROGRAM VODOSNABDIJEVANJA OPĆINE VISOKO

**Nastavljajući politiku ozbiljnog pristupa rješavanju infrastrukturnih problema, načelnica Općine Amra Babić je u Sarajevu upriličila promociju "Investicionog programa Općine Visoko u oblasti komunalne infrastrukture - vodosnabdijevanje - I faza: Proširenje gradskog vodovodnog sistema".**

**P**romociji su prisustvovali predstavnik Svjetske banke, direktor Sarajevo biznis foruma, predstavnik Evropske investicione banke, predstavnici Turske i Švicarske ambasade, predstavnici UNDP-a, direktor Instituta za hidrotehniku, predstavnik BBI Banke, predstavnica Direkcije za evropske integracije (DEI), predstavnik Zavoda za vodoprivredu, pomoćnica direktora Agencije za unapređenje stranih investicija u BiH (FIPA), predstavnica Usaid-Sida GOLD projekta za BiH, predstavnik Federalnog zavoda za geologiju, predstavnik Ibis inženjeringa, predstavnik IPSA instituta...

Ono što je najvažnije za stanovnike visočke općine, a što je istaknuto na promociji je to da je kapacitet

izvorišta Vrutak 100 litara vode u sekundi, a trenutna eksploatacija je 60 litara, što znači da oko 4000 stanovnika visočke MZ Gračanica čija je potreba 17 litara u sekundi, sasvim realno, realizacijom ovog projekta može očekivati rješenje svog dugogodišnjeg problema nedostatka pitke vode.

Također, voda bi trebala biti obezbijeđena i za stanovnike Moštra koje ima oko 5000 stanovnika, kao i za sve ostale stanovnike općine Visoko.

- "Da krenemo u priču o realizaciji ovog projekta prvo moramo raditi na izvorištu Vrutak. Uraditi revitalizaciju tri bunara, jer u ovom trenutku iz njih možemo crpiti 100 litara vode. Znači, možemo krenuti u realizaciju

projekta sa postojećim količinama vode, a onda paralelno s tim vršiti i aktivnosti na iskorištavanju dodatnih količina, jer istraživanja pokazuju postojanje još većih kapaciteta. Trebamo izbušiti nova dva bunara, uraditi dodatna istraživanja i obezbijediti dovoljne količine pitke vode za građane općine Visoko. Moramo objediniti vodovodni sistem, i to se neće desiti za godinu-dvije, ali nam to mora biti ambicija. Moramo obezbijediti kvalitetnu i ispravnu vodu svakom stanovniku općine Visoko", istakla je načelnica Babić.

Nakon prezentacije u Sarajevu, pred brojnim potencijalnim finansijerima i partnerima, prezentacije ovog projekta su upriličene i u Općini Visoko, te Moštru i Gračanici.

## Završeni radovi na proširenju vodovoda u MZ Zimča

U MZ Zimča završeni su radovi na proširenju vodovoda "Tutnjevac". Izvršena je izgradnja četiri nove kaptaze, sabirnog šahta, novog armirano-betonskog rezervoara zapremine 35 m<sup>3</sup>, kao i polaganje gravitacionog cijevovoda dužine 1460 m koji povezuje novoizgrađeni rezervoar sa postojećim vodovodom.

Ukupna vrijednost projekta je 45.699,33 KM, od čega je Općina Visoko iz Programa kapitalnih ulaganja u vodovodnu i kanalizacionu infrastrukturu finansirala 24.272,15 KM, a Kantonalno ministarstvo za poljoprivredu, šumarstvo i vodoprivredu, iz sredstava vodnih naknada 21.427,18 KM. Izvođač radova je bio „Geo-put“ Maglaj, a nadzor je vršila firma „Perspektiva-inženjering“ d.o.o. Visoko.



## Rekonstruisan lokalni vodovod "Kučetine" u MZ Goduša

Treća faza rekonstrukcije lokalnog vodovoda "Kučetine" uspješno je završena od strane izvođača radova "TB INŽENJERING" d.o.o. Breza. Bitno je istaći da je uz rekonstrukciju vodovoda izvršeno povećanje kapaciteta, kao i proširenje zone vodosnabdijevanja u MZ Goduša. Vrijednost radova iznosila je 89.547,60 KM, a sredstva su obezbjeđena od strane Ministarstva za poljoprivredu, šumarstvo i vodoprivredu Zeničko-dobojskog kantona.

Također, u 2014. godini putem Ministarstva za poljoprivredu, šumarstvo i vodoprivredu Zeničko-dobojskog kantona su obezbjeđena dodatna sredstva za izgradnju rasteretne komore i zaključen je Ugovor sa izvođačem radova u vrijednosti od 34.421,83 KM. Završetkom ovih radova u potpunosti će biti završena rekonstrukcija lokalnog vodovoda „Kučetine“ ukupne vrijednosti 275.000,00 KM.



## Laboratorijska ispitivanja kvalitete izvedenog asfaltiranja

Općina Visoko je, za razliku od prethodnih godina, u realizaciji projekata u oblasti cestovne infrastrukture uvela praksu obaveznog kontrolnog ispitivanja kvaliteta izvedenog asfaltnog sloja.

Ispitivanja će se vršiti u sklopu kontrole izvedenog asfaltnog sloja "kernovanjem", "isijecanjem" i "raskopom u bankini".

U prethodnom periodu Općina Visoko je na osnovu provedenog postupka odabrala i najpovoljnijeg ponuđača za ovaj posao, a to je preduzeće "Putna laboratorija 1957" iz Sarajeva.



## Potpisan ugovor o izvođenju radova na putnoj infrastrukturi

Za izvođača radova na putnoj infrastrukturi na području općine Visoko, a nakon provedene procedure i pristiglih ponuda, odabran je najpovoljniji izvođač - "Mušibegović" d.o.o. Visoko s kojim je i potpisan Ugovor.

Ugovorom je obezbijeđeno održavanje lokalnih i nekategorisanih cesta, te gradskih ulica na području općine Visoko tokom 2014. godine, što uključuje: udarne rupe, pravolinijsko isijecanje asfalta sa odvozom na deponiju, ravnanje dna rupe, premaz spoja sa bitumenskom emulzijom, nabavka, planiranje i valjanje tampona do potrebne zbijenosti, izrada bankina od jalovine 0-32 mm debljine 6 cm u uvaljanom stanju, iskop jarka sa odvozom iskopanog materijala na deponiju i sl.



## Provjera putne infrastrukture rekonstruisane u 2013. godini

Predstavnicima Općine Visoko obišli su putnu infrastrukturu općine radi uvida u stanje na izgrađenim ili rekonstruisanim putnim pravcima u 2013. godini.

Obilaskom terena ustanovljeno je da su ulice na kojima su vršeni radovi u prethodnoj godini (ulica „25. april“, ulica u naselju Vrblje, ulica Varoška, te ulice u naselju Helena) u zadovoljavajućem stanju i da nisu uočeni nikakvi nedostaci.

Provjera putne infrastrukture je izvršena radi važećeg garantnog roka datog od strane izvođača koji su vršili radove u navedenim ulicama.



## U naselju Zbilje završeni radovi na rekonstrukciji dijela puta

Vlada FBiH iz sredstava GSM licence je obezbijedila sredstva za rekonstrukciju dijela puta u naselju Zbilje. Izvedeni su radovi na ucjevljenju potoka radi proširenja saobraćajnice, zemljani radovi i nasipanje dijela dionice tamponom sa valjanjem kao i asfaltiranje ove dionice. Vrijednost radova iznosila je 13.946,40 KM.



## Završeni radovi u Ulici Rašidovića

Radovi na kompletnoj rekonstrukciji ulice Rašidovića zajedno sa izgradnjom ulice III i urađenim bočnim ulicama su uspješno završeni. Izvedeni radovi su jedan od većih projekata koje je Općina Visoko realizovala u prethodnom periodu. Ukupna vrijednost projekta iznosi 139.385,74 KM od čega je Općina Visoko iz budžeta obezbijedila 130.000,00 KM, a Ministarstvo za ljudska prava i izbjeglice 9.385,74 KM.

Općina Visoko je odabrala najpovoljnije ponuđače, firme „Mušibegović“ d.o.o. Visoko i „Asfaltgradnja“ d.o.o. Visoko sa kojim su zaključeni Ugovori o izvođenju navedenih radova.

Također, proveden je postupak javne nabavke i kao najpovoljniji ponuđač za pružanje usluga stručno-tehničkog nadzora odabrana je firma „BauArt“ d.o.o. Visoko, a za vršenje kontrolnog ispitivanja izvedenog asfaltnog sloja i kolovozne konstrukcije zadužena je „Putna laboratorija 1957“ Sarajevo.



## U naselju Tujlići, MZ Radovlje, završeno asfaltiranje

U MZ Radovlje, naselje Tujlići, završeni su radovi na rekonstrukciji dijela ulice iz Programa kapitalnog ulaganja za 2014. godinu.

Izvedeni su zemljani radovi, a preduzeće "Putna laboratorija 1957" d.o.o. Sarajevo izvršilo je ispitivanje deformacionog modula gornjeg sloja saobraćajnice, te je trasa pripremljena za asfaltiranje koje je uspješno završeno. Izvođač radova je bilo preduzeće "Mušibegović" d.o.o. Visoko.



## Asfaltirana ulica Bare u Visokom

Asfaltiranjem ulice Bare u Visokom, završeni su radovi na rekonstrukciji ove ulice, a sredstva za realizaciju projekta u potpunosti su obezbijeđena iz budžeta Općine Visoko za 2014. godinu - na osnovu Programa kapitalnih ulaganja u infrastrukturu Općine Visoko za 2014. godinu. Izvođač radova je privredno društvo „Queen“ d.o.o. Visoko.



## Asfaltirana ulica u naselju Carica

Završeno je asfaltiranje ulice u naselju Carica, koje je planirano Programom kapitalnih ulaganja iz budžeta Općine Visoko za 2014. godinu u cestovnu, vodovodnu i kanalizacionu infrastrukturu i javnu rasvjetu. Sredstva za realizaciju projekta asfaltiranja ulice u naselju Carica obezbijeđena su iz budžeta Općine Visoko za 2014. godinu.



## Završeni radovi na izgradnji puta u Donjem Moštru



Izvođenjem radova na asfaltiranju trotoara i pristupa pomoćnim prostorijama OŠ "Mula Mustafa Bašeskija", okončana je izgradnja puta u naselju Donje Moštre prema ambulanti "Tika".

Ovim radovima je prethodila izgradnja puta ukupne dužine 370 m, a prije polaganja asfalta urađena je nova kanalizaciona i vodovodna mreža, položene su instalacije za gasovod i telekomunikacionu mrežu, te postavljena nova javna rasvjeta.

## Rekonstruiran put Sige - Troholj u MZ Gračanica

Programom kapitalnih ulaganja u infrastrukturu iz budžeta Općine Visoko za 2014. godinu (cestovna infrastruktura) planiran je projekat rekonstrukcije puta Sige -Troholj. Ukupna dužina rekonstruisane dionice iznosi 300 m, širina je 2,5 m, dok je debljina asfalta 6 cm. Svi radovi predviđeni projektom rekonstrukcije urađeni su u skladu s općim tehničkim uslovima, a sredstva su u cijelosti obezbijeđena iz budžeta Općine Visoko za 2014. godinu.



## Sanirane udarne rupe na putnoj infrastrukturi

Završeni su radovi na sanaciji udarnih rupa u užem gradskom jezgru u ulicama: Donje Rosulje, Dahirovac, Ševulje, Muftije Numanagića, Špiljakova, Kadije Uvjesa, Skopljaka, Carica, Oruča i dr., te je saniran kolovoz na lokalnom pravcu Arnautovići - Dobrinje. Radovi su također obuhvatili sanaciju ulice u naselju Luke, ulicu Alije Izetbegovića kao i ulice u naseljima Kula Banjer, Topuzovo Polje, Tušnjići, Kralupi i Dobrinje.



## Asfaltirana putna dionica Ginje - Dvor u MZ Kralupi

U MZ Kralupi završeni su radovi na izgradnji putne infrastrukture dionice Ginje - Dvor. U ovoj fazi urađeno je 175 m puta, prosječne širine 4,5 m sa asfaltnim rigolom i betonskim ivičnjacima, kao i riješenom odvodnjom sa kolovoza i stabilnosti kosine betonskim podzidom. Izvođač radova je preduzeće „Mušinbegović“, a nadzor radova vršila je firma „BauArt“ d.o.o. Visoko. Svi radovi izvedeni su stručno, kvalitetno i uz poštovanje tehničkih normi.



## Načelnica Babić sa saradnicima posjetila lokaciju puta Moštre - Koložići

Načelnica Amra Babić sa saradnicima je posjetila lokaciju na kojoj se izvode radovi na rekonstrukciji putnog pravca Moštre - Koložići. Programom kapitalnih ulaganja u infrastrukturu iz budžeta Općine Visoko za 2014.godinu (cestovna infrastruktura), planiran je projekat asfaltiranja puta Moštre - Koložići. Izvođač radova je bila je firma „Mušibegović“ d.o.o. Visoko, a vrijednost radova iznosila je 67.319,30 KM. Ukupna dužina rekonstruisane dionice iznosi 340 m, širine 5 m, dok je debljina asfalta 7 cm.



## U naselju Grajani, MZ Buci, asfaltirana tri putna pravca

Općina Visoko je realizirala projekt asfaltiranja tri putna pravca u naselju Grajani. Nakon provedenog postupka javne nabavke, kao najbolji ponuđač odabrano je privredno društvo „Cool“ d.o.o. Visoko kao izvođač radova na asfaltiranju tri putna pravca ukupne dužine 950 metara (jedan pravac 350 metara, drugi 500 metara i treći 100 metara).

Sredstva za realizaciju projekta asfaltiranja putnih dionica u naselju Grajani čija je vrijednost iznosila 76.684,85 KM, u cijelosti su obezbijeđena iz budžeta Općine Visoko za 2014. godinu.



## Sanacija odrona na području općine Visoko

Općina Visoko je počela sa realizacijom projekta izvođenja radova na sanaciji odrona na putnoj infrastrukturi na sljedećim lokacijama: Gornji Uvorići, Kula Banjer, Smršnica - Mali Trnovci, Kopači, Grdževac - Skoparinovići, Grajani.

Na osnovu provedenog postupka javne nabavke odabran je izvođač radova firma "TB INŽENJERING" d.o.o. Breza, a za nadzor nad kvalitetom izvedenih radova angažovana je projektantska kuća "BauArt". Svi radovi su urađeni po stručnim standardima.

Sredstva za realizaciju navedenog projekta u potpunosti su obezbijedena iz budžeta Općine Visoko za 2014. godinu - sa namjenskog računa Službe za civilnu zaštitu Općine Visoko.



## Završni radovi na izgradnji mosta u Uvorićima, MZ Gračanica

Postavljanjem armirane betonske ploče, izgradnja novog mosta u Uvorićima je ušla u završnu fazu.

Radovi su izvedeni na osnovu ugovora zaključenog između Općine Visoko, fondacije „Hastor“ i UNDP-a, kao investitora radova, te preduzeća „TB INŽENJERING“ d.o.o. Breza, kao izvođača radova. Sredstva za realizaciju navedenog projekta obezbijedena su od strane UNDP-a, Fondacije "Hastor" i namjenskog računa Službe za civilnu zaštitu Općine Visoko i to u sljedećim iznosima: UNDP - 20.000,00 KM; Fondacija „Hastor“ - 16.000,00 KM; Općina Visoko - namjenski račun Službe za civilnu zaštitu - 17.206,56 KM. Ukupna vrijednost ugovora iznosi 53.206,56 KM.

Svi radovi izvedeni su stručno i uz poštivanje tehničkih normi sa kvalifikovanim radnicima, kvalitetnim i kompetentnim inženjersko-tehničkim kadrom i opremom.

Podsjećamo, Općinski štab CZ Visoko je na 10. redovnoj sjednici prioritarno razmatrao informacije u vezi sa mostom, u zaseoku Rijeka u naselju Uvorići, oštećenog uslijed prirodne nepogode poplave.

Nakon donesenih zaključaka na sjednici, Općina Visoko je odmah pristupila izradi projektne dokumentacije sa projektnom kućom „Musala“, te je napravljen Projekt sanacije mosta.

Nakon novih padavina, most je pretrpio dodatna oštećenja i sanacija više nije bila moguća, te se moralo pristupiti izgradnji novog mosta.

Općina Visoko je odmah pristupila izradi nove projektne dokumentacije za izgradnju mosta čija je vrijednost bila duplo veća od one koja je procijenjena za sanaciju. Prethodno je postavljen privremeni drveni pješački most finansiran od strane Općine.



## Izgrađen trotoar od Konzuma do Vatrogasnog doma

Programom kapitalnih ulaganja u infrastrukturu iz budžeta Općine Visoko za 2014. godinu (cestovna infrastruktura), planiran je projekat izrade trotoara od betonske galanterije, na relaciji od objekta Konzum do Vatrogasnog doma.

Izvođač radova je „MGV gradnja“ d.o.o. Visoko, a ukupna dužina rekonstruisane dionice je 90 m dužine i 2,25 m širine. Vrijednost radova iznosi 12.364,78 KM. Sredstva su u cijelosti obezbijeđena iz budžeta Općine Visoko za 2014. godinu.



## Općina Visoko i VGT osiguranje finansirali postavljanje saobraćajnih ogledala

Općina Visoko i "VGT osiguranje" finansirali su i proveli projekat postavljanja saobraćajnih ogledala na nepreglednim krivinama i raskrsnicama na području općine Visoko. Izvođač radova je bila firma "Timing".

Načelnica Babić je čestitala 20. rođendan preduzeću „VGT osiguranje“, te zaželjela još mnogo uspješnih godina u radu i pozvala ostale privredne subjekte da obilježavanje svojih rođendana ubuduće podijele sa građanima na ovakav način.

Generalni direktor VGT osiguranja Amir Zukić je rekao da je postavljanjem ovih ogledala namjera preduzeća bila pojačati bezbjednost građana, pješaka i djece.

Saobraćajna ogledala postavljena su s ciljem povećanja bezbjednosti učesnika u saobraćaju na spojevima ulica: Matrakčijina i Braće Zečevića; Karavdića i Čabravdića, Delahmetovića i Donja Mahala; Skopljaka i Braće Zečevića; Njegovića i Hadžihasanova; Pašagića i Pertac; Skopljaka i Donja Mahala.

Saobraćajna ogledala postavljena su također i u MZ Gračanica, Uvorići, (lokacija u blizini džamije), zatim na skretanju prema Tramošnjiku; u MZ Donje Moštre na lokalnom putu Moštre - Kondžilo (lokacija kod propusta), na lokalnom putu Moštre - Porječani (krivina prije mosta); u MZ Tušnjići na regionalnom putu Visoko - Kiseljak R 443.



## Odluka o razvrstavanju lokalnih cesta na području ZDK

Vlada Zeničko-dobojskog kantona na 187. sjednici, održanoj 15.10.2014. godine donijela je Odluku o razvrstavanju lokalnih cesta na području ZE-DO kantona.

Na području općine Visoko utvrđene su lokalne ceste (ukupno 79.20 kilometra) i to:

Naziv ceste	Nova kategorija/oznaka ceste	Naziv ceste	Nova kategorija/oznaka ceste
M221 - ČIFLUK	L 098-001	S. CIGLANA - VISPAK	L 098-015
BUCI - GODUŠA	L 098-002	R403 - KULA BANJER	L 098-016
VISOKO - PODVINCI	L 098-003	MALO ČAJNO - PRHINJE	L 098-017
R403 - PORJEČANI	L 098-004	PORJEČANI - GORNJI PORJEČANI	L 098-018
ARNAUTOVIĆI - DOBRINJE	L 098-005	R403 - B. MAHALA	L 098-019
UVORIĆI - MALI TRNOVCI	L 098-006	KONDŽILO - DŽINDIĆI	L 098-020
BRADVE - LIJEŠEVA	L 098-007	R403 - HLAPEČEVIĆI	L 098-021
CIGLANE - KOLOŠIĆI	L 098-008	M221 - GRAJANI	L 098-022
R403 - GORNJA ZIMČA	L 098-009	R403 - DUBRAVE	L 098-023
R403 - GORNJE MOŠTRE	L 098-010	M221 - DOLIPOLJE - VRELA	L 098-024
R403 - GORNJA SEOČA	L 098-011	M221 - ZBILJE	L 098-025
R403 - SRHINJE	L 098-012	R403 - OKOLIŠĆE	L 098-026
R403 - GORNJA VRATNICA	L 098-013	R403 - RADINOVIĆI	L 098-027
M221 - TUŠNJIĆI	L 098-014		

### OBAVJEŠTENJE O ODRŽAVANJU JAVNE GRADSKE RASVJETE


Održavanje javne gradske rasvjete i semafora povjereno je preduzeću "MUALVIS". Kvarove koje uočite možete prijaviti putem telefona broj: **732-552**.

### OBAVJEŠTENJE O ZIMSKOM ODRŽAVANJU PUTEVA

Radovi na zimskom održavanju gradskih ulica, trotoara i lokalnih puteva na području općine Visoko dodijeljeni su JKP "VISOKO" Visoko.

## Izgrađena javna rasvjeta na dionici Buci - Stuparići i u naselju Čekrekčije

Realizovani su projekti izgradnje javne rasvjete na dionici naselja Buci - Stuparići, te u naselju Čekrekčije, koji su planirani Programom kapitalnih infrastrukturnih ulaganja za 2014. godinu. Izvođač radova je firma "MUALVIS" d.o.o. Visoko, a sredstva su u cijelosti obezbijedena iz budžeta Općine Visoko. Ovo su prvi u nizu projekata realizacije izgradnje javne rasvjete na području općine Visoko.



## Izgrađena javna rasvjeta na Varoškom mostu

Sredstva za projekat izgradnje rasvjete na Varoškom mostu su u cijelosti obezbijeđena iz budžeta Općine Visoko. Izvođač radova je firma "SES" d.o.o. Sarajevo koja je odabrana na osnovu provedenog konkurentskog postupka sa dodatnom objavom.



## Završena izgradnja javne rasvjete u ulici Ljetovik II

U saradnji Općine Visoko i MZ Stari Grad završeni su radovi na izgradnji javne rasvjete u ulici Ljetovik II. Izvođač navedenih radova bila je firma "MUALVIS" d.o.o. Visoko, a radovi su u cijelosti finansirani iz budžeta Općine Visoko.



## Završena izgradnja javne rasvjete u Sarajevskoj ulici

Završen je projekt izgradnje produžetka javne rasvjete u Sarajevskoj ulici u dužini od 300 m, na dionici od JKP "VISOKO" do skretanja prema naselju Kula Banjer. Sredstva za realizaciju navedenog projekta u potpunosti su obezbijeđena iz budžeta Općine Visoko za 2014. godinu. Svi radovi su urađeni u skladu sa stručnim standardima.



## Izgrađena javna rasvjeta u naselju Tušnjici

Programom kapitalnih ulaganja u infrastrukturu iz budžeta Općine Visoko za 2014. godinu izgrađena je i javna rasvjeta u naselju Tušnjici. Izvođač radova je firma "MUALVIS" d.o.o. Visoko. Sredstva su u cijelosti obezbijeđena iz budžeta Općine Visoko. Svi radovi su urađeni u skladu sa stručnim standardima.





## AMBASADOR KRALJEVINE ŠVEDSKE I NAČELNICE OPĆINA IZ BiH U POSJETI OPĆINI VISOKO

U saradnji s Ambasadom Kraljevine Švedske i međunarodnom kooperativnom agencijom Saveza holandskih općina VNG International, Općina Visoko organizovala je sastanak na temu "Predstavljanje projekta ICLD i lična iskustva Načelnice Općine Visoko". Na radnom sastanku su bili ambasador Kraljevine Švedske u BiH gđin. Fredrik Schiller, konzul Kraljevine Švedske u BiH gđin. Pelle Person, projekt menadžer u Ambasadi Kraljevine Švedske u BiH (SIDA), gđin. Mario Vignjević, projekt menadžer u Cacity Development of Municipal Associations (CDMA), gđa. Biserka Šarkanović i gđica. Bojana Sekulić, kao i sve načelnice općina u Bosni i Hercegovini - Jasminka Begić (Doboj Jug), Divna Aničić (Mrkonjić

Grad), Mileva Komlenović (Kalinovik), Snježana Rajilić (Novi Grad). ICLD radi na omogućavanju realizacije općinskih partnerstava, provođenju programa međunarodne obuke, pruža savjetodavnu podršku SIDA-i u programima lokalne demokratije i vladine samouprave. Tokom sastanka, predstavljen je ICLD projekt i učešće načelnice Amre Babić u programu "Lokalni politički lideri - Jačanje žene u politici" kao jedine predstavnice iz BiH. Također, ovom prilikom su predstavljene druge komponente ICLD seminara i Programa općinske saradnje (Municipal Partnership Program), kao i prakse koje bi se mogle primijeniti u BiH. Prezentirani su i SIDA-ini planovi, te mogućnosti saradnje s institucijama Kraljevine Švedske.





## DELEGACIJA OPĆINE NOVI GRAD POSJETILA OPĆINU VISOKO

Delegacija Općine Novi Grad Sarajevo, predvođena načelnikom Općine Semirom Efendićem posjetila je Općinu Visoko i načelnicu Amru Babić. Razmjenjujući iskustva koja pridonose razvoju i boljem položaju lokalne zajednice, predstavnici općina istakli su potrebu za razmjenjivanjem iskustava iz oblasti privrede i funkcioniranja općinske administracije, uspostavljanjem međusobnog partnerstva s ciljem delegiranja pitanja od zajedničkog interesa, konsolidacije i usklađivanja postignutih standarda dobre uprave, kao i iznalaženja novih pristupa u rješavanju aktuelnih i budućih izazova u lokalnoj upravi.

Načelnik Općine Novi Grad, zahvalio se domaćinima istaknuvši da se ovim načinom razmjene iskustva i pozitivnih primjera, posebno što se tiče funkcioniranja općinske administracije među susjednim općinama, može unaprijediti daljnja saradnja.

„Konačnu korist od ovakvog vida međuopćinske saradnje trebaju imati naši građani, a svakako će razmjena iskustava, pronalaženje novih pristupa pri rješavanju trenutnih i budućih problema potaknuti razvoj privrede i unaprijediti funkcionisanje administracije“, kazala je načelnica Babić.

## DELEGACIJA OPĆINE VITEZ U POSJETI OPĆINI VISOKO

Delegaciju Općine Vitez predvođenu načelnikom Advanom Akeljićem ugostila je načelnica Amra Babić sa saradnicima.

Predstavnici općina razmijenili su iskustva koja doprinose razvoju i boljem položaju lokalne zajednice, ističući prvenstveno potrebu za razmjenom iskustava iz oblasti privrede i funkcionisanja općinske administracije, kao i uspostavljanjem međusobnog partnerstva s ciljem rješavanja pitanja od zajedničkog interesa.

Načelnik Akeljić se zahvalio domaćinima na gostoprимstvu i prisustvu obilježavanju godišnjice formiranja 1. Viteškog dobrovoljačkog odreda čiji su hrabri borci dali značajan doprinos odbrani općine Visoko u Bosne i Hercegovine.

Načelnica Babić na sastanku je kazala da će razmjena iskustava, pronalaženje novih pristupa pri rješavanju trenutnih i budućih problema potaknuti razvoj privrede i unaprijediti funkcionisanje administracije.



## NAČELNICA AMRA BABIĆ UGOSTILA DELEGACIJU PRVOG VITEŠKOG DOBROVOLJAČKOG ODREDA

Načelnica Amra Babić je ugostila delegaciju boračkih udruženja Armije BiH iz općine Vitez. Delegaciju su sačinjavali Hakija Đelilović, komandant Prvog viteškog dobrovoljačkog odreda, Besim Haskić predsjednik "Udruženja za zaštitu tekovina rata "Vitez, Nesad Hurem, ratni komandant i Edin Hakanović, nosilac Zlatne policijske značke.

21.05.1992. godine u Visoko je stiglo 230 nenaoružanih i neopremljenih pripadnika Prvog viteškog dobrovoljačkog odreda. U slijedećih 10-tak dana pridružilo im se oko 100 dobrovoljaca iz Busovače i Travnika. Na linijama odbrane Visokog ostali su do sredine oktobra 1992. godine. Četiri pripadnika su poginula, a preko 20 ih je ranjeno.

Predstavnici boračkih udruženja Armije BiH sa područja općine Vitez načelnici su poklonili dvije knjige - "Genocid u Ahmićima 1993." i "48 sati pepela". Obje knjige bave se temom ratnih dešavanja na području Općine Vitez u periodu od 1992 - 1995. godine.



## DELEGACIJA OPĆINE VISOKO NA OBILJEŽAVANJU 22. GODIŠNJICE 1. VITEŠKOG DOBROVOLJAČKOG ODREDA

Delegacija Općine Visoko na čelu s načelnicom Amrom Babić, prisustvovala je obilježavanju 22. godišnjice formiranja 1. Viteškog dobrovoljačkog odreda u mjesnoj zajednici Kruščica, općina Vitez.

Svojim prisustvom na ovom obilježavanju, delegacija Općine Visoko željela je odati počast 1. Viteškom dobrovoljačkom odredu čiji su hrabri borci dali značajan doprinos odbrani općine Visoko i Bosne i Hercegovine. Tom prilikom načelnici Babić uručena je zahvalnica i knjiga "Monografija šehida Viteza".





## PREDSTAVNICI ICLD-a I UČESNICE PROGRAMA POSJETILI VISOKO

Načelnica Amra Babić sa saradnicima, predsjedavajućom Općinskog vijeća Mirelom Mateša Bukva i potpredsjedavajućom OV Aidom Zerdo, ugostila je predstavnike Švedskog međunarodnog centra za lokalnu demokratiju (ICLD), Christer Åkesson i Kristin Ekström, kao i učesnice ICLD programa "Lokalni politički lideri – jačanje žene u politici", načelnicu općine Doboj Jug Jasminku Begić, predsjedavajuću Općinskog vijeća Novi Grad Edinu Gabela, vijećnicu OV Zenica Eminu Tufekčić, implementatoricu SIDA projekata Džemilu Taljanović i Anu Lopatić predstavnicu ICLD Pale.

Delegacija je obišla nacionalne spomenike u Visokom, Tabhansku džamiju, samostan Sv. Bonaventure, pravoslavnu crkvu Sv. Prokopija, arheološko područje Mile/Arnautovići, mjesto stanka bosanske vlastele i grobne crkve bosanskih vladara, kao i JKP "Gradska groblja" Visoko.





## TURSKI AMBASADOR CIHAD ERGINAY POSJETIO OPĆINU VISOKO

Općinu Visoko je posjetio ambasador Republike Turske u Bosni i Hercegovini Cihad Erginay gdje se sastao sa načelnicom Amrom Babić i njenim saradnicima.

Ambasador Turske sa načelnicom Babić razgovarao je o dosadašnjim projektima i saradnji sa Općinom Visoko i konstatovao da je Visoko primjer uspješne općine.

- Drago mi je što smo doprinijeli tome da građanima Visokog poboljšamo kvalitet pružanja zdravstvenih usluga i također damo doprinos u oblasti kulture, kao i u budućim ekonomskim projektima, naglasio je N.J.E. gospodin Cihad Erginay.

Općinska načelnica je poželjela dobrodošlicu ambasadoru Erginayu istaknuvši da je jedna od prvih posjeta novog ambasadora Republike Turske u BiH upravo posjeta Visokom što je potvrda podrške radu Općine.

Nakon sastanka ambasador Erginay je posjetio gradilište budućeg kulturnog centra i ambulantu porodične medicine «Tika» u Moštru.



## ŠEF TERENSKOG UREDA OSCE-A POSJETIO OPĆINU VISOKO

Cristian Barale, šef terenskog ureda OSCE-a u Travniku, posjetio je Općinu Visoko i održao radni sastanak sa načelnicom Amrom Babić i predsjedavajućom OV Mirelom Mateša Bukva.

Razlog posjete gospodina Cristian Barale-a bio je upoznavanje sa predstavnicima izvršne i zakonodavne vlasti općine Visoko.

Tokom sastanka, načelnica Amra Babić, izrazila je zadovoljstvo dosadašnjom saradnjom koja je ostvarena sa OSCE-om i izrazila spremnost Općine Visoko da učestvuje u budućim planiranim projektima.



## U VISOKOM ODRŽANA 5. SJEDNICA PREDSJEDNIŠTVA SAVEZA OPĆINA I GRADOVA F BiH

U Općini Visoko godine održana je 5. sjednica Predsjedništva Saveza općina i gradova Federacije BiH.

Savez općina i gradova F BiH je samostalna organizacija dobrovoljno udruženih općina i gradova u F BiH, osnovana u cilju razvoja lokalne samouprave i unapređenja i zaštite njihovih zajedničkih interesa.

Na sjednici je bilo riječi o aktivnostima Saveza, njegovim projektima u vezi razvoja lokalne samouprave, mikrofinansiranja i potporama za jačanje lokalne samouprave u Federaciji, a u cilju pružanja učinkovitijih usluga koje se provode kroz projekt UNDP-a.



## DELEGACIJA TURSKE OPĆINE BAJRAMPAŠA U POSJETI OPĆINI VISOKO

Općinska načelnica Amra Babić ugostila je delegaciju turske općine Bajrampaša predvođenu zamjenikom gradonačelnika Ahmedom Atufkčijom.

Prethodnih dana obilazili su područja ugrožena poplavama s ciljem pomoći stanovništvu BiH.

Na sastanku je dogovoreno da će Općina Bajrampaša u saradnji sa Općinom Visoko i Islamskom zajednicom Visoko upriličiti zajednički iftar za 2 000 ljudi, što je i realizovano 02. jula 2014. godine.





## DELEGACIJA SIDA-e POSJETILA OPĆINU VISOKO

Delegacija Švedske Agencije za međunarodni razvoj (SIDA) i ambasade Kraljevine Švedske u BiH posjetila je Općinu Visoko. Delegaciju su činili direktorica SIDA-e, Marie Bergström, konzul Ambasade Kraljevine Švedske u BiH, Pelle Person, sekretarica Ambasade, Pia Hallonstein, direktor Sektora reforme javne administracije i lokalne samouprave pri Ambasadi Kraljevine Švedske u BiH, Mario Vignjević i predstavnik Sektora za ekonomski razvoj pri Ambasadi Kraljevine Švedske u BiH Nataša Miskin.

Cilj ove posjete bilo je prezentiranje Općine Visoko i njenih kapaciteta, zajedničkih projekata koje su u prethodnom periodu realizovali Općina Visoko i SIDA, te novih projekata koji se fokusiraju na promociju poslovnih zona i najvećih privrednih subjekata u Visokom, upravljanje čvrstim otpadom i izgradnju transfer stanice, proširenje gradskog vodovodnog sistema prema MZ Moštre i MZ Gračanica, realizaciju GOLD USAID-SIDA projekta, kao i učešće načelnice Amre Babić u programu ICLD-a.

*Delegacija je sa predstavnicima Općine Visoko posjetila proizvodne pogone firme Frutti Funghi, a Zahvalnicu za dosadašnji doprinos gostima je uručio predstavnik Opšte poljoprivredno-proizvodno-prometno-uslužne zadruge BIOS.*





## NAČELNICA BABIĆ UGOSTILA DELEGACIJU IZ KUVAJTA

Načelnica Babić sa saradnicima ugostila je delegaciju Ambasade Kuvajta, koju su činili ambasador države Kuvajt, Nasser Riden Thamer Al Motairi, njegov zamjenik Adel Al Adgham, te predstavnici Saveza općina države Kuvajt.

**N**a sastanku su predstavljeni privredni potencijali Općine Visoko, mogućnosti za ulaganja, te otvorenost općinske administracije za investitore koji žele ulagati na području Općine Visoko.

Gosti su iskazali zadovoljstvo i prepoznali spremnost Općine Visoko i Općinske načelnice za kreiranje međusobnog partnerskog odnosa sa investitorima iz Kuvajta. Tim povodom su istakli svoju uvjerenost da će u narednom periodu Kuvajt biti značajno prisutan po pitanju investiranja i realizacije projekata na području općine Visoko.



## POSJETA I DONACIJE TURSKIH HUMANITARNIH ORGANIZACIJA

**P**redstavnici Udruženja IHH Trabzon Turska i predsjednici Sindikata državnih službenika HAK-IS odjeljenje Istanbul i Trabzon, posjetili su Općinu Visoko i uručili vrijednu donaciju.

Donacija će biti iskorištena u svrhu obezbjeđivanja 70 paketa prehrambeno-higijenskih artikala za najugroženije članove porodica šehida i poginulih boraca, te RVI i demobilisanih boraca.

Uz pomoć Omladinskog kruga IZ Visoko raspoređeno je dodatnih 150 paketa za socijalno ugrožene građane koje su obezbijedile humanitarne organizacije Avrupa Yardim Vakifi, Sadaka i Iyilikder, sve iz Republike Turske.





## AMBASADOR REPUBLIKE BUGARSKJE POSJETIO OPĆINU VISOKO

Ambasador Republike Bugarske u BiH Angel Alexandrov Angelev sa svojim zamjenikom Nikola-jem Kolevim posjetio je Općinu Visoko, gdje se susreo sa načelnicom Općine Visoko Amrom Babić i njenim saradnicima.

Na sastanku je razgovarano o saradnji Općine Visoko sa Bugarskom, zatim o razvoju Bugarske kao i o politici Republike Bugarske prema BiH, te o uspostavljanju bližih ekonomskih, turističkih i kulturnih veza.

Načelnica je istakla da joj je čast ugostiti N.J.E. ambasadora prijateljske Republike Bugarske u BiH, koja je zapravo prva zemlja na svijetu koja je priznala BiH.





## OPĆINU VISOKO POSJETILA DELEGACIJA KRALJEVINE BAHREIN

Načelnica Općine Visoko ugostila je delegaciju Kraljevine Bahrein koju su činili Ghanem AlBuainain ministar vanjskih poslova, Saleh Al Fudhala guverner oblasti al Muharek, direktor i vlasnik firme "Abrs Company" Ahmed Alabras i Mahmud Alabras.

Gostima su predstavljeni privredni potencijali općine Visoko, mogućnosti za ulaganja, te načini približavanja kapaciteta investorima. Osim što su zainteresirani za oblast poljoprivrede, gosti su svoje interesovanje iskazali i za poslovne prostore. Ono što je realizovano odmah jeste pomoć pri sanaciji poplavljenih područja i klizišta.

Također je dogovorena pomoć putem humanitarne organizacije iz Bahreina koja je usmjerena na Centar za socijalni rad, i ta pomoć će se institucionalno dijeliti onim kojima je najpotrebnija.

Gosti su zainteresovani da doniraju sušare i da pri tome obuču ljude da rade tu djelatnost, te izvrše otkup tih proizvoda. Kada je riječ o projektu vodosnadbijevanja, odnosno obezbjeđivanja sredstava za realizovanje, dobiveni su određeni kontakti sa Islamskom bankom koja je spremna finansirati takve projekte. Općina Visoko će aplicirati u istu banku da bi iskoristila tu mogućnost.

## SASTANAK NAČELNICE BABIĆ I PRIVREDNIKA SA AMBASADOROM BiH U KRALJEVINI DANSKOJ

Održan je nezvanični sastanak između načelnice Amre Babić i predstavnika preduzeća "BIOS", "Frutti- Funghi", "Vispak" i "Voćar piramida" iz Visokog, i ambasadora BiH u Kraljevini Danskoj, Kemala Muftića.

Sastanak je bio prilika da se razmijene mišljenja po planu jačanja saradnje u oblasti privrede, ali i razmotre modaliteti buduće saradnje. Na sastanku je ocijenjeno da postoje brojne mogućnosti za unapređenje saradnje, prije svega, u oblasti poljoprivrede ali i za povezivanje sa privatnim sektorom u Kraljevini Danskoj. Ambasador je rekao da dobri odnosi dvije zemlje treba da budu podržani kroz kontinuirano unapređenje i dinamiziranje privredne saradnje.



## OPĆINU VISOKO POSJETILA DELEGACIJA IZ SAUDIJSKE ARABIJE

Doktorice psihologije i ginekologije, te budući mladi doktori iz Saudijske Arabije (Jeddah) posjetili su Općinu Visoko. Delegacija iz Saudijske Arabije je upoznala domaćine o djelovanju i ciljevima svoje humanitarno-zdravstvene organizacije koja pomaže pri izgradnji i opremanju zdravstvenih ustanova širom svijeta.

Na sastanku se razgovaralo o mogućoj suradnji između Općine Visoko i ove organizacije. Gosti su imali priliku razgovarati i sa Fatimom Vranac, predstavnicom visočkog udruženja "Nit života" koje se bavi zaštitom zdravlja i pomoći ženama oboljelim od karcinoma.

Upriličena je posjeta JU „Dom zdravlja“ Visoko gdje je sa direktorom Senadom Karavdićem razgovarano o potrebama i mogućnostima nabavke opreme koja bi poboljšala kvalitetu pružanja usluga građanima Visokog.



## SASTANAK SA PREDSTAVNICIMA USAID-a I REZ AGENCIJE

Načelnica Amra Babić sa saradnicima u Općini Visoko održala je sastanak sa predstavnicima USAID SIDA GOLD projekta i Regionalne razvojne agencije za regiju Centralna BiH (REZ Agencija).

Na sastanku je bilo riječi o sufinansiranju projekta obuke za buduće zaposlenike kompanije ALMA-RAS d.o.o. Olovo. Projektom je predviđeno da na području općine Visoko ova firma otvori svoj proizvodni pogon. Investicija vrijedna cca 2,5 miliona sa realizacijom je počela u septembru 2014. a dugoročni cilj je zaposliti 400 osoba. Općina Visoko, kao partner u projektu, podržat će ovu investiciju zajedno sa USAID SIDA GOLD projektom, Federalnim zavodom za zapošljavanje, Kantonalnim zavodom za zapošljavanje, Vladom ZDK i REZ agencijom.



## ZASTUPNIK MEHMEDOVIĆ U ZVANIČNOJ POSJETI NAČELNICI BABIĆ

U zvaničnoj posjeti načelnici Općine Visoko boravio zastupnik u Parlamentarnoj skupštini BiH Šemsudin Mehmedović. Na sastanku je razgovarano o mogućnostima stvaranja boljeg privrednog ambijenta i investicijske klime uz koordinaciju svih nivoa vlasti, kao i problemima sive ekonomije i „rada na crno“.

Načelnica Babić i zastupnik Mehmedović razmijenili su dosadašnja iskustva, te je načelnica informisala gosta o aktivnostima koje Općina Visoko provodi, posebno o angažmanu u okviru GOLD projekta, saradnji sa IFC-om, projektima kapitalnih ulaganja u vodosnabdjevanje i izgradnju Centra za upravljanje otpadom, te ostalim planiranim aktivnostima iz oblasti lokalnog ekonomskog razvoja.





## U OPĆINI VISOKO ODRŽANA JAVNA TRIBINA O UČEŠĆU ŽENA U POLITIČKOM ŽIVOTU

Javna tribina na temu „Učešće žena u političkom životu“, održana je u Općini Visoko, a prisutnima su se obratile gošće iz turske vladajuće Stranke pravde i razvoja (AK Parti), predsjednica AŽ SDA BiH Nermina Kapetanović, kao i načelnica Amra Babić. Tribini je prisustvovala i predsjedavajuća Općinskog vijeća Visoko Mirela Mateša Bukva.

Načelnica Amra Babić je pozdravila gošće iz Republike Turske i mnogobrojne sugrađanke, te istakla da je ova tribina mjesto razmjene iskustava i osnaživanja žena u njihovom političkom djelovanju.

- Cilj ove javne tribine je mogućnost ostvarivanja saradnje posebno po pitanjima prava žena, obrazovanja, kulture i ostalih društvenih oblasti, kazala je Nermina Kapetanović, zastupnica u Domu naroda Parlamenta BiH.

U delegaciji iz Turske bile su još i potpredsjednice Asocijacije žena AK Parti: Meryem Goka, Fatma Berber, Šenel Pekuz, Sezer Katircioglu i Nurcan Cetin.



## NAČELNICA BABIĆ I REISU-L-ULEMA HUSEIN EF. KAVAZOVIĆ UČESNICI KONFERENCIJE U KUVAJTU



Na poziv ekscelencije Njegovog veličanstva emira šejh Sabah Ahmed El-Džabir Es-Sabah i Međunarodne islamske dobrotvorne organizacije IICO, načelnica Amra Babić i reisu-l-ulema u BiH Husein ef. Kavazović učestvovali su na svjetskoj konferenciji pod nazivom "Uloga žene u dobrotvornom radu - filantropiji".

Tokom ovog događaja upriličen je niz sastanaka sa predstavnicima državnih institucija države Kuvajt, eminentnim osobama iz javnog i političkog života, te ambasadorom Bosne i Hercegovine u Kuvajtu.



## OPĆINA VISOKO NA OTVARANJU 5. SARAJEVO BUSINESS FORUMA

Peta međunarodna investicijska konferencija Sarajevo Business Forum (SBF) 2014 održana je u zgradi Parlamenta BiH, a otvaranju je prisustvovala i načelnica Općine Visoko sa saradnicima.

SBF organizovala je Bosna Bank International (BBI) u saradnji s Islamskom razvojnom bankom s ciljem jačanja privredne saradnje i privlačenje međunarodnih ulaganja u jugoistočnu Evropu.

Međunarodna investicijska konferencija Sarajevo Business Forum (SBF) 2014 je bila regionalnog karaktera, a osim privrednika iz BiH, učešće su uzeli i poslovni ljudi iz Albanije, Crne Gore, Hrvatske, Makedonije, Slovenije i Srbije koji su imali priliku da prezentiraju svoje projekte investitorima i predstavnicima investicionih fondova iz bogatih zemalja Zaljewa.



## NAČELNICA SUDJELOVALA NA KONFERENCIJI O PRAVIMA ŽENA

U Sarajevu je održana konferencija "2015. kao godina prekretnica za prava žena u BiH" koju je organizirala Ženska mreža BiH - neformalna grupa organizacija civilnog društva i pojedinaca koji se bave pravima žena. Cilj susreta je bio da se kroz tri panela - "Ženski pogled na izbore 2014", "Politička platforma Ženske mreže BiH 2014-2018", te "40 odsto zastupljenosti žena u organima vlasti - san ili java?" diskutuje o političkom učešću žena u BiH i stanju prava žena u BiH uopšte. Na konferenciji je učestvovala i načelnica općine Visoko Amra Babić, te Ismeta Dervoz, bivša zastupnica u Parlamentarnoj skupštini BiH i Besima Borić, bivša zastupnica u Parlamentu Federacije BiH.



## PREDSTAVNIK SRPSKOG DOBROTVORNOG DRUŠTVA "DOBROTVOR" U POSJETI OPĆINI VISOKO

Načelnica Babić je održala sastanak sa predstavnikom dobrotvornog društva "Dobrotvor" iz Sarajeva.

Ovom prilikom predsjednik Upravnog odbora "Dobrotvor", gospodin Aleksa Čebić zahvalio se načelnici na pomoći za nabavku prehrambenih artikala socijalno ugroženim građanima Visokog, a u povodu Vaskrsa 2013., kao i 2014. godine, te uručio poklon - Monografija "Dobrotvor (1991-2011.) dvadeset godina humanitarnog rada".



## NAČELNICA OPĆINE VISOKO AMRA BABIĆ ODRŽALA PREDAVANJE U GAZI HUSREV-BEGOVOJ MEDRESI

U amfiteatru Gazi Husrev-begove medrese u Sarajevu održano je predavanje o temi "Javni prihodi u FBiH i njihova raspodjela". Gost predavač bila je načelnica općine Visoko, Amra Babić.





## SVEČANO OTVORENA AMBULANTA "TIKA" MOŠTRE

Ambulanta porodične medicine "TIKA" Moštre svečano je otvorena. Sredstva za građevinske radove u iznosu od 900.000 KM obezbijedila je Turska agencija za međunarodnu saradnju i koordinaciju (TIKA), a opremanje ambulante su finansirali Federalno ministarstvo zdravstva sa 500.000 KM i Općina Visoko sa 300.000 KM.



Svečanosti su prisustvovali član Predsjedništva BiH Bakir Izetbegović, zamjenik premijera Republike Turske Emrullah İşler, direktor TIKA-e Serdar Cam, šef TIKA-inog odjela za Balkan i Istočnu Evropu Ali Maskan, ministrica - savjetnik u Ambasadi Republike Turske u BiH Yasemin Eralp, direktor TIKA-e za BiH Zulkuf Oruc, načelnik općine Altindag Veysel Tiryaki, premijer i ministri Vlade ZDK, te mnogobrojni zvaničnici iz Turske i Bosne i Hercegovine.

Izgradnja ambulante počela je 2010. godine, a nastavljena je u martu 2013. godine. Krajem 2013. godine radovi su uspješno završeni, te je stavljena na raspolaganje za oko 15.000 stanovnika Moštra i okoline.

- „Veze između Bosne i Hercegovine i Turske, kao i njihovih naroda, izuzetno jačaju, te sam sigurna da će tih veza iz dana u dan biti sve više. Ovaj projekat će

poboljšati standard života i otvoriti pravac u dalji napredak i prosperitet. Mi smo mala država i mali ponosni narod, te smo zahvalni svima koji doprinose napretku i razvoju BiH. Stoga se posebno radujemo i nadamo budućim projektima koji će omogućiti razvoj proizvodnje.“ istakla je ovom prilikom načelnica Amra Babić.

Član Predsjedništva Bosne i Hercegovine, Bakir Izetbegović, u ime građana kojima će ambulanta biti na raspolaganju zahvalio je Vladi Turske i turskom narodu. - „Nas u Bosni i Hercegovini raduje i ponosni smo na impozantan napredak koji Turska ostvaruje unazad deset godina u globalnim okvirima, kao i njen sve veći potencijal da podrži BiH u njenom razvoju“, istakao je Izetbegović te dodao da jaka i stabilna Turska znači čvrst oslonac za Bosnu i Hercegovinu i da predstavlja konstruktivan faktor za regiju Balkana.

Zamjenik premijera Republike Turske, Emrulah İşler je kazao da je ljubav Turske prema Bosni i Hercegovini trajna, te da Turska država, narod i vlada nikad neće prestati da budu uz nas. „Svima u Bosni i Hercegovini želim puno mira, stabilnosti i napretka, a ovaj novo-izgrađeni objekat neka vam je sa srećom.“ istakao je İşler.




## UPRILIČENA SVEČANOST POVODOM IZGRADNJE KULTURNOG CENTRA

Nakon svečanosti otvorenja Ambulante "TIKA" Moštre, visoki zvaničnici i uvaženi gosti koji su bili na ovom događaju, prisustvovali su i svečanosti povodom izgradnje Kulturnog centra u naselju Prijeko, koja je upriličena isti dan.



Radovi na Kulturnom centru u Prijekom, koje finansira Općina Altındag iz Ankare, započeli su sredinom novembra 2013. godine i trenutno su u završnoj fazi. U sklopu Kulturnog centra, između ostalog, nalaziće se: kongresna dvorana, višenamjenski izložbeni salon, kino sala, prostorije za odgoj i obrazovanje, biblioteka i čitaonica, kao i multimedijalne prostorije. Savremeni Kulturni centar u Prijekom, završetkom izgradnje, ponudit će mogućnost održavanja brojnih kulturnih, zabavnih i drugih događaja, te time obogatiti kulturni i društveni život Visokog. Objekat će biti uklopljen u prelijepi ambijent parka naslonjenog na samu obalu rijeke Fojnice, što mu daje dodatnu vrijednost i ljepotu.





## NA GRADSKOM STADIONU LUKE SVEČANO OTVOREN NOVI TEREN SA UMJETNOM TRAVOM

Na Dan državnosti BiH, na gradskom stadionu Luke zvanično je i svečano otvoren novi teren sa umjetnom travom. Trebalo je nešto više od godinu dana za realizaciju ovog vrijednog projekta koji je bio podijeljen u tri faze: kupovina umjetne trave, priprema podloge, te postavljanje umjetne trave i završni infrastrukturni radovi.

“Drago mi je što sam bila dio ekipe koja je Visokom i omladini Visokog mogla pokloniti jedan ovakav kompleks, i što su ovako lijepe stvari obilježile prve dvije godine mog mandata. Nadam se da ćemo u naredne dvije godine, zajedno, zakonodavna i izvršna vlast Općine Visoko i sve pozitivne snage, svi entuzijasti, napraviti još puno za Visoko. Ovdje smo kako bismo gradu i omladini poklonili stadion sa umjetnom travom, ali isto tako gradu Visokom darujemo i obnovljeno rukometno igralište. U narednom periodu želimo vratiti rukometni klub Bosna na stadion Luke gdje mu je mjesto. Zahvaljujem se ljudima, ne samo za inicijativu koju su imali, nego i za sav angažman koji su pokazali. Mirza Laletović je jedan od glavnih inicijatora kojem bih posebno zahvalila za uloženi trud i nesebičnost prilikom realizacije ovog projekta” kazala je u svom obraćanju općinska načelnica Amra Babić.

### NOVE SJEDALICE NA GLAVNOJ TRIBINI STADIONA LUKE

Osim navedenih radova, na glavnoj tribini stadiona Luke urađena je demontaža starih sjedalica i postavljene su nove, izuzetno kvalitetne i otporne sjedalice donirane od strane Enesa Begovića i firme BEKTO Precisa d.o.o. Goražde. Pored adaptacije tribina izvedeni su i radovi na zaštiti kosina glavnog stadiona.





## SVEČANO OTVORENE PROSTORIJE I RUKOMETNI TEREN RK BOSNA VISOKO NA STADIONU „LUKE“

Obnovljene prostorije i rukometni teren na stadionu „Luke“ svečano su otvorili načelnica Babić, Hajrudin Handžić, direktor JP „Visoko Ekoenergija“ i Edin Bukva, predsjednik Uprave RK Bosna Visoko.

Općinska načelnica je poželjela da bude nastavljena tradicija uspjeha i što boljih rezultata visokih rukometaša, jer je ovaj sport ogledalo naše općine.

Predsjednik Uprave RK Bosna Visoko, Edin Bukva je naglasio da je za naredni period važno realizirati postavljanje gumene podloge na teren, što bi imalo za cilj olakšavanje rada i treniranja rukometaša.

Ovom otvorenju su prethodili radovi na obnovi prostorija, rekonstrukciji tribina i asfaltiranju rukometnog igrališta.

Radove na rekonstrukciji tribina izvodila je firma "Asfaltgradnja". Dio sredstava za rekonstrukciju tribina donirao je vlasnik firme "Muzuri", dok je drugi dio finansirala Općina Visoko. Izvršeno je i asfaltiranje rukometnog igrališta, a izvođač radova bila je firma "Mušinbegović" koja je većim dijelom i donirala izvedene radove. Također, izvršena je i sanacija rasvjetnih stubova. Radovi su završeni betoniranjem spoja igrališta sa tribinama i izradom ferobetona. Dio sredstava za izvođenje navedenih radova donirale su firme „Abras-comapany“ i „Ners Obrt“, te Ministarstvo za privredu ZDK i ministar Muhamed Husić.





## POLOŽEN KAMEN TEMELJAC ZA IZGRADNJU "STAMBENO -POSLOVNO-REKREACIONOG CENTRA VISOKO"



U naselju Gornja Zimča upriličena je svečanost povodom početka gradnje Stambeno-poslovno-rekreacionog centra Visoko, u čiju izgradnju firma "Abrás Company", vlasnika Ahmeda Alabresa iz Bahreina investira više od 20 miliona KM.

Svečanosti su prisustvovali predstavnici firme "Abrás Company", visoka delegacija Bahreina, predsjedavajući Predsjedništva BiH Bakir Izetbegović, načelnica Općine Visoko Amra Babić, te brojne zvanice i građani.

Ahmed Alabras, vlasnik firme „Abrás Company“ istakao je da Centar ne predstavlja samo građevine, bazene, sportske terene i šetališta već i nova radna mjesta.

U ovaj projekat je do sada uloženo više od 1,5 miliona KM, dok se do okončanja radova očekuje investiranje više od 20 miliona KM. Prednost u izvođenju građevinskih radova bit će data domaćim firmama.





Prije početka radova



Nakon završetka radova

## ZAVRŠENI RADOVI NA IZGRADNJI ŠETNICE UZ RIJEKU BOSNU

**R**adovi na izgradnji šetnice, započeti tokom juna 2014. godine su uspješno završeni, a obuhvatili su sljedeće: radove na popločavanju šetnice dužine 140 m, betonske radove na osiguranju kosina, radove na izradi ulaznog stepeništa, kao i radove na izradi električne rasvjete.

Postavljene su četiri klupe, betonske saksije cijelom dužinom šetnice, te 8 stubova javne rasvjete na dužini od 240 m.

Na osnovu provedenog postupka javne nabavke za izvođenje radova na izgradnji šetnice- završna faza, odbran je najpovoljniji ponuđač "Fazum - gradnja" d.o.o. Ilijaš.

"Agencija za vodno područje rijeke Save, Sarajevo" je finansirala izvođenje radova na uređenju inungacionog pojasa desne obale rijeke Bosne u cilju proširenja korita rijeke, kao i nastavak izgradnje obaloutvrde od ušća rijeke Bosne i Fojnice do Kožarskog mosta.



## ZAVRŠENO DEMINIRANJE NASELJA VRELA U MZ ČEKREKČIJE

Oružane snage BiH, kao izvođač radova na deminiranju u MZ Čekrekčije i predstavnici Civilne zaštite općine Visoko, uz prisustvo inspektora MAK-a kao korisnik na tom zadatku, 24.07.2014. godine potpisali su Zapisnik o primopredaji radova.

Oružane snage predale su projektni zadatak LZ Vrela površine 50.110 m<sup>2</sup> koji je rađen od kraja mjeseca marta do kraja jula 2014. godine.

Projekt je bio veoma zahtjevan. Na navedenom području nađeno je 33 komada mina i to: PMA (26 komada), PMR (3 komada), PMR-2AS (1 komad), PMA- 2 (3 komada).

Također, pronađena je i veća količina NUS-a, i to: TTM (15 komada), TKM (3 komada), ROB (4 komada), MB 60 mm (3 komada), MG 40 mm, OSA (1 komad), BRK (1 komad), KB1 (4 komada).



## DEMINIRAN TEREN U KASARNI "TEUFIK TUFO BUZA" U VISOKOM

Deminerski timovi Oružanih snaga BiH su u periodu od 18.08. do 19.09.2014. godine radili na deminiranju terena u kasarni „Teufik Tufo Buza“ u Visokom. U sklopu akcije deminiranja očišćena je ukupna površina od 5.495 m<sup>2</sup>. Na području kasarne pronađene su slijedeće mine: PMA-2 (215 komada), PMR-2AS (12 komada), NUS (3 komada).

## IZGRADNJA ODGOJNO-OBRAZOVNOG OBJEKTA U NASELJU PRIJEKO

Općinsko vijeće Visoko je na 21. sjednici dalo saglasnost za izgradnju objekta za obavljanje odgojno-obrazovne djelatnosti u naselju Prijeko.

Prethodno je načelnici Amri Babić firma „Abras Company“ uručila pismo namjere sa prijedlogom za izgradnju obdaništa u Prijekom. Vlasniku kompanije, Ahmedu Alabrasu je jedino u interesu da izgrađeni objekt kao trajno dobro (vakuf) ostane gradu Visokom, te da se u obdaništu omogući održavanje časa vjeronauke za djecu čiji roditelji to žele, kao i da se tokom ljetnog raspusta u prostorijama obdaništa organizuju kursevi arapskog jezika.

Načelnica je, u skladu sa svojim ovlaštenjima, poduzela niz aktivnosti s ciljem prihvatanja pisma namjere i donošenja potrebne Odluke Općinskog vijeća.

Odlukom Općinskog vijeća, dato je ovlaštenje načelnici Babić da sa firmom „Abras Company“ zaključi Ugovor o finansiranju izgradnje objekta, uz obavezu

upisa zabrane otuđenja objekta u zemljišno-knjižnoj evidenciji i zabrane promjene namjene objekta.

Firma „Abras Company“ se obavezala da će u cijelosti finansirati izgradnju objekta, snositi sve troškove izrade projektne dokumentacije i troškove vanjskog uređenja, a sve troškove vezane za izdavanje potrebnih dozvola, saglasnosti, troškove zaključenja Ugovora, nadzora i slično, snosit će Općina Visoko.

Općina Visoko se obavezala da će u odgojno-obrazovnoj ustanovi, smještenoj u objektu čija je izgradnja predmet ove Odluke, omogućiti dobrovoljno održavanje nastave iz predmeta vjeronauke. Izgrađeni objekt će se nakon izdavanja upotrebne dozvole upisati u zemljišnim knjigama kao vlasništvo Općine Visoko, udio 1/1 sa zabilježbom zabrane otuđenja objekta i zabrane promjene namjene objekta, te dati na upotrebu Javnoj ustanovi za obavljanje odgojno-obrazovne djelatnosti, a u skladu sa važećom regulativom.

## IZGRAĐENO OSAM DJEČJIH IGRALIŠTA NA PODRUČJU OPĆINE VISOKO

Na inicijativu Općine Visoko i "Abrax Company" d.o.o. Visoko, Služba za finansije, privredu i lokalni ekonomski razvoj izradila je projekt "Izvedba dječjih igrališta" prema kojem su izgrađena igrališta na osam lokacija na području općine Visoko. Svi radovi izvršeni su po građevinskim normama i standardima.

**U MZ Radovlje** dječje igralište je izgrađeno u sklopu nogometnog terena "Paljike", a upotpunjeno je klackalicama, ljuljačkama, toboganom, penjalicom, njhalicom i površinom sa čistim pijeskom za malu djecu. Montirane su dvije parkovske klupe i kanta za otpatke.

**U MZ Centar**, naselje Prijeko, dječje igralište se nalazi na postojećem sportskom terenu, te sadrži klackalicu, ljuljačku, penjalicu i njhalicu kao i parkovsku klupu.

**U MZ Stari Grad** na lokalitetu ul. Rašidovića, nakon izvršenog čišćenja i nasipanja terena tamponskim materijalom, postavljene su klackalice, ljuljačke, tobogan i njhalice. Montirane su parkovske klupe i kanta za smeće.

**U MZ Stari Grad** na lokalitetu starog rezervoara Klisa, nakon čišćenja i uređenja pristupnog puta postavljene su klackalice, ljuljačke, njhalice, te dvije klupe i kanta za smeće.

**U MZ Novo Naselje** novoizgrađeno dječje igralište nalazi se između dvije stambene zgrade, a sadrži ljuljačke, tobogan, klackalicu, penjalicu i površinu sa pijeskom za malu djecu. Montirane su i dvije parkovske klupe.

**U MZ Podvinci** na lokalitetu sportskog terena, dječje igralište je upotpunjeno ljuljačkama, toboganom, klackalicom, penjalicom i površinom sa pijeskom za malu djecu, kao i klupama i kantom za otpatke.



**U MZ Rosulje**, naselje Carica, postojeće dječje igralište upotpunjeno je ljuljačkama, toboganom, klackalicom, penjalicom i površinom sa pijeskom za malu djecu, kao i klupama i kantom za otpatke. Na postojeći stub rasvjete montiran je reflektor čime je osvijetljen park, te su montirane parkovske klupe i kanta za smeće.



**U MZ Kralupi** na lokalitetu Dvor, površina predviđena za zabavni park sadrži ljuljačke, tobogan, klackalice, penjalicu i površinu sa pijeskom za malu djecu. Park je upotpunjen klupama, kantom za otpatke i reflektorima.



## PRIJATELJ VISOKOG AHMED ALABRAS OBIŠAO DJEČJA IGRALIŠTA

Ahmed Alabras, prijatelj Visokog i donator pri izgradnji dječjih igrališta na području općine Visoko, sa saradnicima i predstavnicima lokalne zajednice obišao je izgrađena dječja igrališta. Od ukupno osam izgrađenih igrališta, posjetio je Klisu, Kralupe i Radovlje, gdje su predsjednici mjesnih zajednica uručili zahvalnice donatoru. Nakon obilaska terena, kompaniji Abras d.o.o. Visoko uručena je i zahvalnica Općine Visoko za sve ono što je u proteklom periodu uradila za Visoko i njegove stanovnike.



## IZGRAĐEN DJEČJI PARK U VISOČKOM NASELJU DAHIROVAC

Završena je izgradnja dječjeg parka u naselju Dahirovac koja je obuhvatala nabavku elemenata za dječje igralište i njihovo postavljanje, i to: kulu sa toboganom, duplu ljuljačku, klackalicu sa četiri sjedalice, vrtuljak sa jednodijelnom sjedalicom, njihalicu u obliku životinje za jednu osobu. Na ovaj način je u potpunosti realizirana donacija Ambasade Kraljevine Norveške za izgradnju dječjeg parka u naselju Dahirovac.



## UKLONJEN DOTRAJALI OBJEKT U NASELJU PRIJEKO

Po nalogu građevinskog inspektora i u organizaciji Odsjeka za inspekcijske poslove Općine Visoko, a uz saradnju privrednika, započelo je rušenje nekadašnjeg obdaništa u naselju Prijeko. Uklanjanju dotrajalog objekta nekadašnjeg obdaništa i raščišćavanju terena se pristupilo u cilju poboljšanja sigurnosti stanovnika naselja Prijeko.



## OSNOVAN ZDRAVSTVENI SAVJET OPĆINE VISOKO

Osnovan je Zdravstveni savjet općine Visoko čije su zadaće da planira i evaluira provođenje zdravstvene zaštite na području općine Visoko; daje mišljenja na planove i programe zdravstvene zaštite; predlaže mjere za poboljšanje dostupnosti i kvaliteta zdravstvene zaštite; prati povrede prava pacijenata i poduzima mjere za unapređenje tih prava; podnosi Općinskom vijeću godišnji izvještaj o svom radu.

Članovi Zdravstvenog savjeta su: Amra Omerbegović i Mirzeta Burko (predstavnicima Općine Visoko), prim.dr.Džemila Mustafić (stručno vijeće JU „Dom zdravlja“ Visoko), Hamdija Smailagić (predstavnik zdravstvenog sindikata), Ljubica Mlinarić (predstavnica pacijenata i Udruženja „Nit života“), Muhamed Murić (predstavnik pacijenata i Udruženja „ILHBBHCV“), Erma Dautović (predstavnica Crvenog križa Visoko), Melina Halilović UG Omladinska romska inicijativa „Budi mi prijatelj“), Hajrudin Brotlija (Udruženje RVI „Visoko 92“), Refik Mušija (Udruženje penzionera općine Visoko) i Armin Omanović (Udruženje „Sretna porodica“).



## OBILJEŽEN 1. MART - DAN NEZAVISNOSTI BOSNE I HERCEGOVINE

Obilježavanje 1. marta - Dana nezavisnosti Bosne i Hercegovine počelo je promocijom knjige „Bosanski feniks“, autora prof.dr. Envera Demirovića, koja je održana u Općini Visoko. Promotori djela su bili prof. dr. Ismet Dizdarević, prof. dr. Džemal Najetović, i mr. Selman Selhanović, a moderator TV voditelj Tarik Helić.



Upriličeno je polaganje cvijeća na Spomen-kosturnicu poginulim borcima iz NOAR-a i na Spomen-obilježje šehidima i poginulim borcima iz proteklog rata.



U Velikoj sali Općine Visoko, održana je Svečana sjednica Općinskog vijeća, a prigodnim govorom prisutnim se obratila predsjedavajuća OV Visoko, Mirela Mateša Bukva.

Na Svečanoj sjednici, kratkim historijskim časom i prigodnim govorom, obratio se i prof. Senad Hodović, direktor JU Zavičajni muzej Visoko. U izlaganju je naglašen kontinuitet postojanja BiH, koji seže daleko u prošlost.



Svečanost obilježavanja 1. marta - Dana nezavisnosti BiH, uveličali su i obogatili svojim nastupom učenici OŠ "Safvet-beg Bašagić" Visoko i učenici OŠ za muzičko obrazovanje "Avdo Smajlović" Visoko.





## U VISOKOM OBILJEŽEN MEĐUNARODNI DAN BORBE PROTIV MINA

Centralna manifestacija povodom obilježavanja Međunarodnog dana borbe protiv mina održana je na lokalitetu Vrela (MZ Čekrekčije) - općina Visoko, pod motom: „Korak više za sigurno okruženje, za razvoj i prosperitet BiH na putu ka Evropskoj uniji“.

Organizatori ove manifestacije su bili Centar za uklanjanje mina u BiH, Delegacija Evropske unije u BiH, Oružane snage BiH i Općina Visoko. Manifestaciji su

prisustvovali zvaničnici entitetskog nivoa, dužnosnici međunarodne zajednice, predstavnici donatora, međunarodnih i nevladinih organizacija.

Gosti na manifestaciji bili su u prilici prisustvovati pokaznoj vježbi koju su izveli pripadnici Deminerskog bataljona OSBiH, demonstrirajući vrhunsku sposobnost i opremljenost u manuelnom čišćenju područja koje je kontaminirano minama.

## OBILJEŽEN 7. APRIL - DAN OSLOBOĐENJA VISOKOG

U okviru obilježavanja 7. aprila – Dana oslobođenja Visokog, načelnica Amra Babić i predsjedavajuća Općinskog vijeća Mirela Mateša Bukva, upriličile su prijem za predstavnike Udruženja antifašista i boraca NOR-a Visoko, Društva „Josip Broz Tito“ i Koordinacionog odbora boračkih udruženja i organizacija općine Visoko. Nakon prijema, uslijedilo je polaganja cvijeća na Spomen-kosturnicu borcima NOAR-a i Spomen-obilježje šehidima i poginulim borcima.



## NA INICIJATIVU NAČELNICE BABIĆ, UDRUŽENJU "NIT ŽIVOTA" VISOKO PRISTUPILO 35 NOVIH ČLANICA

Povodom 7. aprila - Dana oslobođenja Visokog, članice Udruženje žena oboljelih od karcinoma dojke i drugih malignih oboljenja „Nit života” Visoko, organizovale su prodajnu izložbu rukotvorina u foajeu Gradskog kina Visoko.

Simbolično, tom prilikom, Udruženju “Nit života” pristupilo je 35 novih članica iz kolektiva Općine Visoko. Inače, godišnja članarina iznosi 20 KM, a iz Udruženja pozivaju sve zainteresirane sugrađanke da svojim članstvom pomognu rad i djelovanje Udruženja “Nit života”.



## AKCIJOM ČIŠĆENJA OBILJEŽEN DAN PLANETE ZEMLJE

Povodom obilježavanja Dana planete Zemlje, uz akciju "Let's Do It" učenici i nastavnici osnovnih škola s područja općine Visoko u saradnji sa Općinom Visoko i Udruženjem žena „Mozaik“ Visoko, akcijom čišćenja obilježili su ovaj značajan datum.

Općina Visoko je obezbijedila hranu i piće za učesnike akcije, kese za prikupljanje kao i odvoz smeća. Na području općine Visoko, akcija je bila održana u dva termina i to: 22. aprila za učenike osnovnih i srednjih škola, i 26. aprila za Mjesne zajednice i NVO organizacije i udruženja.



## OBILJEŽEN 3. MAJ - DAN OTPORA AGRESIJI

Promocijom monografije "Treći korpus Armije Republike Bosne i Hercegovine (1992-1995)" u velikoj sali Općine Visoko, počelo je obilježavanje 3. maja - Dana otpora agresiji. Promotori monografije su bili prof.dr. Faik Uzunović, general Sakib Mahmuljin, mr. sci. Hasib Mušibegović i prof.dr. Džemal Najetović.

Održana je i Svečana sjednica Općinskog vijeća Visoko, a prisutnim se obratila načelnica općine Visoko Amra Babić. Podsjetila je na historijski značaj ovog datuma, te između ostalog naglasila da je ovo prilika da se svi prisjetimo pojedinaca koji su vlastitim primjerom i životom pisali stranice historije Bosne, ali i institucija i organizacija koje su svojim radom nastojale da život ljudi olakšaju i učine normalnijim i podnošljivijim. Po završetku Svečane sjednice prisutni su pogledali projekciju ratnih dokumentarnih snimaka iz ratne arhive koje je pripremila Produkcijaska kuća Magazin plus.

Drugi dan Manifestacije "3. maj - Dan otpora agresiji" nastavljen je okupljanjem na Centralnom spomen obilježju šehidima i poginulim borcima općine Visoko gdje je upriličen i prigodan program. Učenik Gimnazije "Visoko" Faris Pinjo interpretirao je monodramu "Godine prevare", bh. glumca Emira Hadžihafizbegovića.

Predstavnici Koordinacionog odbora boračkih udruženja općine Visoko položili su cvijeće na Spomen obilježje nakon čega je započet "Marš linijama odbrane grada". U Maršu su učestvovali sportski klubovi i udruženja, kao i mnogobrojni građani općine Visoko i Vitez sa načelnikom Advanom Akeljićem. Tokom Marša, održani su i kratki časovi historije na značajnim tačkama linije odbrane, kao što su "Prije-ko- rezervoar" i na mjestima pogibije visočkih heroja odbrane. Marš je završen dolaskom u bivšu kasarnu "Ahmet Fetahagić", uz tradicionalni vojnički grah i sportske manifestacije.





## NAČELNICA AMRA BABIĆ "NAJEVROPLJANKA BIH 2014"

U organizaciji Evropskog pokreta u Bosni i Hercegovini, u Sarajevu je obilježen 9. maj, Dan Evrope. Tom prilikom održana je Svečana akademija "Vrijeme je za Evropu i regionalnu suradnju", na kojoj su uručena priznanja Evropskog pokreta u BiH za 2014. godinu istaknutim pojedincima i kolektivima iz naše zemlje, ali i zemalja šireg okruženja. Načelnici općine Visoko Amri Babić pripalo je priznanje "Najevropljanka BiH 2014".

Svečanoj akademiji su prisustvovali Specijalni predstavnik EU u BiH Peter Sorensen, Visoki predstavnik za Bosnu i Hercegovinu Valentin Inzko, predstavnici institucija BiH, RS i Federacije BiH, kao i predstavnici lokalnih zajednica, privrednika i medija.

"BiH treba evropeizirati. No, ona ima i mnogo dobrih vrijednosti, stoga i Evropu treba pobosančiti", ocijenio je Inzko. Glavna poruka obilježavanja Dana Evrope je da Bosna i Hercegovina ima jasnu perspektivu da postane članica Evropske unije, a to se može učiniti samo uključivanjem mladih ljudi, čime je naglašena važnost budućnosti u miru i prosperitetu za njih.



## OBILJEŽENA 22. GODIŠNJICA POGIBIJE VIŠOČKOG HEROJA TEUFIKA TUFE BUZE I SUBORACA

Polaganjem cvijeća i prigodnim programom ispred kasarne "Teufik Tufo Buza" prisutni prijatelji, suborci i članovi porodice odali su počast visočkom heroju. Komandir Teufik Tufo Buza, Amir Barjaktarević i Safet Subaša, poginuli su 16.06.1992. godine.

Predstavnici Općine, članovi boračkih udruženja, suborci i ostali građani općine Visoko, u sklopu obilježavanja godišnjice, obišli su i Spomen obilježje na mjestu pogibije Teufika Tufe Buze i Amira Barjaktarevića u mjestu Vrela - Krčevine, kao i Spomen obilježje Safetu Subaši na mjestu pogibije u mjesnoj zajednici Kralupi - Čifluk gdje su delegacije položile cvijeće, odali počast ratnim herojima, te su tom prilikom prisutnim održani i časovi historije.



## OBILJEŽEN DAN ŠEHIDA U VISOKOM

Prigodnim je programom obilježen Dan šehida na Spomen obilježju šehidima i poginulim borcima Visokog, a u organizaciji Općine Visoko, porodica šehida i poginulih boraca „Visoko 92“ i Medžlisa Islamske zajednice Visoko i Gračanica.

Okupljenim građanima pročitani su najbolji literarni radovi učenika osnovnih i srednjih škola, a prisutnima

se obratila i načelnica općine Visoko Amra Babić, kao i predsjednica Upravnog odbora Udruženja šehida i poginulih boraca „Visoko 92“, Lejla Šahinović.

Obilježavanje Dana šehida nastavljeno je na šehidskom mezarju na Gradskom groblju, a po protokolu, organiziran je obilazak po grupama svih mezarja, šehidskih spomen obilježja i spomen česmi na području općine Visoko.





## U VISOKOM ODRŽAN ZAJEDNIČKI IFTAR ZA VIŠE OD 2000 GRAĐANA

Konvoj pod nazivom "Bratstvo ne poznaje granice" petog dana ramazana (02.07.2014.) stigao je u Visoko i na Centralnom trgu u ulici Alije Izetbegovića okupio više od 2000 vjernika, koji su došli da skupa iftare.



Organizator zajedničkog iftara je Općina Bajrampaša u saradnji sa Općinom Visoko i Islamskom zajednicom Visoko, a cilj iftara na otvorenom bilo je zajedničko druženje i zbližavanje muslimana Balkana. Konvoj je sačinjavao tim od približno 150 ljudi, većinom studenata volontera, koji sa sobom imaju pokretnu kuhinju i sva jela pripremaju na licu mjesta. Na jelovniku su, uz boce vode, poslužene hurme, zatim kuhana riža i mesni gulaš, te slatko od tijesta kao i neizostavna Vispakova kafa napravljena u velikoj Zlatnoj džezvi.



U sklopu kulturnog programa koji je potrajao do 23 sata, nastupili su muzičari i plesači iz Turske, a program su obogatili i članovi KUD "Visoko".

Svečanosti su prisustvovali i predstavnici Općine Visoko, načelnici općina Vitez i Tešanj, predstavnici IZ Visoko, Franjevačkog samostana Visoko, predstavnici Agencije za međunarodnu saradnju i koordinaciju Republike Turske (TIKA), ambasade Republike Turske u

BiH, Turskog EUFOR LOT tima, predstavnici Turskog kulturnog centra „Yunus Emre“, privrednici sa područja općine Visoko i brojne druge ličnosti iz vjerskog i kulturnog života grada Visokog.

Povodom održavanja zajedničkog iftara načelnica Amra Babić je uputila izraze zahvalnosti organizatoru Općini Bajrampaša Istanbul, Policijskoj stanici Visoko, firmi "Vispak", JKP „Visoko“, brojnim zvanicama i gostima, a posebno građanima općine Visoko koji su u velikom broju prisustvovali iftaru.

Kapaciteti organizatora sa 2000 spremljenih iftara bili su nedovoljni da podmire potrebe svih prisutnih, pa su i visočki ugostitelji u skladu s mogućnostima pritekli u pomoć, ćevabdžinice „MALA-GROUP“ i „IHTIJAREVIĆ“, te ljetne bašte „Kosmos“ i „Milano“.

Zamjenik gradonačelnika općine Bajrampaša Gokhan Balekoglu zahvalio je načelnici Babić rekavši da Općina Bajrampaša već deset godina provodi ovaj projekat.

Veliki broj medija je pratio ovaj događaj, a slike iz Visokog obišle su ne samo cijeli region, već i svijet.





## KOLONA S TABUTIMA 175 SREBRENIČKIH ŽRTAVA ISPRAĆENA IZ VISOKOG U POTOČARE

Sa Gradskog groblja Visoko ispraćena je kolona s tabutima 175 srebreničkih žrtava genocida koje su ukopane 11. jula 2014, godine u Memorijalnom centru Srebrenica – Potočari.

Ispraćaju najmanjeg broja identificiranih žrtava u odnosu na protekle godine prisustvovalo je više stotina građana koji su suzama, bolom, jecajima i molitvama ispratili kamion sa posmrtnim ostacima žrtava genocida u Srebrenici. Najmlađa žrtva koja će smiraj naći u Memorijalnom centru u Potočarima je Senad Beganović, rođen 1980. godine, a najstariji je Hurem Begović rođen 1916. godine.

Ukupan broj do sada ukopanih žrtava srebreničkog genocida u Memorijalnom centru je 6241. Na ispraćaju srebreničkih žrtava iz Visokog načelnica Babić je istakla da je sjećanje vrlina civiliziranih i kulturnih naroda, te da su ovi tabuti, bijeli šehidski nišani diljem Bosne i Hercegovine, Memorijalni centar u Potočarima - naša sjećanja, naši dokazi, naša historija i naša obaveza da ne odustanemo.



## SVEČANO OBILJEŽEN 29. AVGUST - DAN OPĆINE VISOKO

**S**večanost obilježavanja 29. avgusta - Dana Općine Visoko započela je polaganjem cvijeća na Spomen kosturnicu borcima NOAR-a i na Spomen obilježju šehidima i poginulim borcima.

U nastavku programa obilježavanja Dana općine Visoko, održana je svečana sjednica Općinskog vijeća te su dodijeljena javna priznanja za 2014. godinu.

### OVOGODIŠNJI DOBITNICI POVELJE OPĆINE VISOKO SU:

- Mr.sci. Hasib Mušibegović, brigadir Armije RBiH, za postignute rezultate i značajan doprinos u organizovanju otpora agresiji na BiH, odbrani općine Visoko, kao i na društvenom i humanitarnom radu, te afirmaciji općine Visoko.

- Rimsko-germanska komisija Njemačkog arheološkog instituta iz Frankfurta na Majni i Institut za prahistoriju i ranu historiju Univerziteta „Kristijan Albreht“ iz Kila, za značajan doprinos unapređenju arheološke nauke u Bosni i Hercegovini i realizaciji projekta istraživačkih radova na lokalitetu neolitskog naselja Okolište koje se nalazi na području općine Visoko.

- „Povelja općine za životno djelo“ za 2014. godinu dodijeljena je posthumno Salihu Traki, profesoru arapskog jezika, za postignute rezultate i značajan doprinos u oblasti obrazovanja, nauke i kulture, te afirmaciji općine Visoko.

- „Povelja o proglašenju počasnim građaninom općine Visoko“ za 2014. uručena je prof.dr. Asifu Šabanoviću, za postignute rezultate i značajan doprinos u oblasti obrazovanja i nauke, te afirmaciji općine Visoko.


### Zahvalnice su dobili načelnik bratske Općine Altındag Veysel Tiryaki, kao i Općina Altındag.

Na svečanoj sjednici održan je i historijski čas koji je vodila Vesna Salihbegović i podsjetila prisutne na značaj i veličinu Visokog u historijskom smislu.

Općinska načelnica Amra Babić čestitala je svima 29. avgust - Dan općine Visoko, podsjetivši prisutne da se uz ovaj dan sa dužnim poštovanjem prisjećamo svih pojedinaca, institucija, privrednih kolektiva, organizacija i udruženja koji su svojim radom i zalaganjem dali doprinos razvoju općine Visoko.



## U VISOKOM SVEČANO OBILJEŽEN DAN DRŽAVNOSTI BiH



**Obilježavanje 25. novembra - Dana državnosti BiH, započelo je polaganjem cvijeća na Spomen-kosturnicu poginulim borcima iz NOAR-a i na Spomen-obilježju šehidima i poginulim borcima iz proteklog rata.**

Program obilježavanja Dana državnosti nastavljen je u Velikoj sali Općine Visoko, gdje je održana Svečana sjednica Općinskog vijeća, a prisutnim se obratila predsjedavajuća OV Visoko, Mirela Mateša - Bukva. Na svečanoj sjednici, općinska načelnica Amra Babić je u svom prigodnom govoru, ukazala na kontinuitet postojanja Bosne i Hercegovine, te podsjetila da je prije 71 godinu, 25. novembra 1943. godine u Mrkonjić Gradu održano prvo zasjedanje Zemaljskog antifašističkog vijeća narodnog oslobođenja Republike Bosne i Hercegovine - ZAVNOBIH.

- „Za građane BiH, multietničnost i multikulturalnost su najveće civilizacijske tekovine i vrijednosti. One imaju duboke korijene i garant su opstojnosti naše domovine. Dok god bude patriota ovakve orijentacije, onih koji poštuju pravo drugog i drugačijeg, biće i BiH. Svi oni koji misle drugačije trebaju znati da u BiH plodno tlo nikada nije našao fašizam ni u jednom obliku, da totalitarni um ovdje može opstati samo nakratko i da se bosanskohercegovački duh iznova vraća oličen u neuništivom karakteru ljudi koji vjekovima ovdje žive zajedno“, naglasila je načelnica Babić.

*Svečanost obilježavanja Dana državnosti Bosne i Hercegovine, svojim nastupom i prigodnim programom obogatili su učenici OŠ "Safvet-beg Bašagić" Visoko i učenici OŠ za muzičko obrazovanje "Avdo Smajlović" Visoko.*



## VISOČKI UČENICI POSJETILI KASARNU "RAJLOVAC"

Povodom obilježavanja "Dana Oružanih snaga BiH", 1. decembra, u kasarni "Rajlovac" upriličena je manifestacija "Dani otvorenih vrata". Načelnica Babić omogućila je za oko 100 učenika visočkih škola prevoz i priliku da se djeca upoznaju s pripadnicima Oružanih snaga BiH. Dječju pažnju najviše su privukle razne vrste naoružanja, deminerske opreme, te obilazak lokaliteta na kojem se nalazi Helikopterski skvadron Zračnih snaga. Prilikom druženja simulirane su razne taktičke situacije koje su rješavane uz primjenu borilačkih vještina.



## ČESTITKA VISOČKIM KADETIMA NK BOSNA

Općinska načelnica Amra Babić uputila je iskrene čestitke kadetima nogometnog kluba Bosna Visoko, koji su na najbolji način predstavili općinu Visoko i osvojili prvo mjesto na međunarodnom nogometnom turniru u Berlinu, održanom u aprilu 2014. godine.

## NAČELNICA BABIĆ UGOSTILA REUFA AŽDAHIĆA

Načelnica Amra Babić ugostila je Reufa Aždahića, Visočanina sa holandskom adresom stanovanja koji je i ove godine sa prijateljima iz kluba "Red Giants" došao u Visoko kako bi donirao veliku količinu sportske opreme za visočke klubove, Sportski savez, osnovne i srednje škole. Uručio je i donacije za igralište na stadionu Luke i salu Partizan, namještaj, te igračke za JU Predškolski odgoj i obrazovanje. Općinska načelnica je zahvalila Reufu Aždahiću na dosadašnjem radu, te je dogovoren nastavak saradnje u budućim projektima.



## NAČELNICA BABIĆ UGOSTILA DOKTORA NAUKA AZRU KADIĆ



Općinska načelnica Amra Babić primila je, povodom stečenog zvanja doktora nauka, gđicu Azru Kadić, koja je doktorirala na Filozofskom fakultetu u Sarajevu na temu: "Program zaštite čovjekove okoline u funkciji odgoja i obrazovanja u razrednoj nastavi". Cilj sastanka je bio iskazivanje podrške akademskom dijelu građanstva, a razgovarano je i o mogućnostima kako da ovaj dio građanstva učestvuje i da svoj doprinos razvoju lokalne zajednice.

## PRIJEM POVODOM PRAVOSLAVNOG BOŽIĆA

Povodom pravoslavnog Božića, Općinska načelnica Amra Babić, predsjedavajuća Općinskog vijeća Mirela Mateša - Bukva i dopredsjedavajuća OV Visoko Aida Zerdo, upriličile su prijem za jereja Marka Maleša, paroha kakanjskog, koji opslužuje crkvenu pravoslavnu zajednicu i pravoslavni hram u Visokom. Paroh Marko Maleš upoznao je načelnicu Babić sa dešavanjima unutar visočke pravoslavne zajednice. Tokom prijema, Općinska načelnica uputila je čestitku građanima općine Visoko, pripadnicima pravoslavne vjeroispovijesti, uz želje da Božić provedu u zdravlju, sreći i ljubavi sa svojim porodicama, prijateljima i komšijama.



## PRIJEM ZA VOLONTERE PRIMLJENE U 2013. GODINI



Općinska načelnica Amra Babić upriličila je sastanak sa volonterima koji su u 2013. godini primljeni u Općinu Visoko radi stručnog osposobljavanja za samostalni rad. Tom prilikom 10 volontera primilo je uvjerenje o uspješno obavljenom volonterskom radu, koji se računa u pripravnički staž i radno iskustvo kao uslov za rad na određenim mjestima ili za polaganje stručnog ispita.

## ČESTITKA TAKMIČARIMA IZ ENGLESKOG JEZIKA

Općinska načelnica Amra Babić je čestitala najuspješnijim učenicima sa željom za uspjeh na kantonalnom i drugim takmičenjima. Takmičenje iz engleskog jezika učenika IX razreda osnovnih škola s područja općine Visoko, održano je 22.03.2014. godine u OŠ „Kulin Ban“ Visoko. Najbolje rezultate postigli su sljedeći učenici:

**Prvo mjesto, s istim brojem bodova:** Dželilović Ferhad, OŠ „Kulin Ban“ Visoko, Purišević Faris, OŠ „Safvet-beg Bašagić“ Visoko, Karavdić Mirna, OŠ „Safvet-beg Bašagić“ Visoko;

**Drugo mjesto:** Sudžuka Dženeta, OŠ „Alija Nametak“ Buci;

**Treće mjesto:** Meco Imran, OŠ „Safvet-beg Bašagić“ Visoko.

## ČESTITKA NAJUSPJEŠNIJIM NA TAKMIČENJU IZ FIZIKE

Općinska načelnica Amra Babić uputila je čestitke najuspješnijim učenicima VIII i IX razreda visočkih osnovnih škola na takmičenju iz fizike, sa željom za uspjeh na kantonalnom i drugim takmičenjima. Takmičenje je održano 8. marta 2014. godine u Osnovnoj školi "Mehmedalija Mak Dizdar" Dobrinje.

**Najbolje rezultate VIII razreda postigli su sljedeći učenici:**

1. Dedić Elma, OŠ „Safvet-beg Bašagić“ Visoko;
2. Hajrić Mustafa, OŠ „Mehmedalija Mak Dizdar“ Dobrinje;
3. Lemeš Amina, OŠ „Musa Ćazim Ćatić“ Veliko Čajno.

**Najbolje rezultate IX razreda postigli su sljedeći učenici:**

1. Sudžuka Dženeta, OŠ „Alija Nametak“ Buci;
2. Hindija Ajla, OŠ „Mehmedalija Mak Dizdar“ Dobrinje;
3. Karavdić Mirna, OŠ „Safvet-beg Bašagić“ Visoko.

## NAČELNICA AMRA BABIĆ NA PROSLAVI ĐURĐEVDANA

Povodom tradicionalnog romskog praznika Đurđevdana, Udruženje građana ORI „Budi mi prijatelj“ Visoko, 05.05.2014. godine, je upriličilo prigodnu manifestaciju na igralištu iza OŠ „Kulin Ban“. Riječ je o aktivnosti pod nazivom „Igre bez granica“ koja se implementira u saradnji sa organizacijom World Vision. UG ORI „Budi mi prijatelj“ zajedno sa Udruženjem Roma „Amaro Kham - Naše Sunce“ Visoko su u okviru obilježavanja Đurđevdana organizovali druženje u naselju Carica gdje je upriličena tradicionalna – omaha. Poseban gost za visočke Rome bila je općinska načelnica Babić koja je tom prilikom svim Romima čestitala praznik.



## PRIJEM ZA PREDSTAVNIKE RK "BOSNA" VISOKO

Općinska načelnica je upriličila prijem u Maloj sali Općine Visoko za predstavnike RK "Bosna" Visoko, a razgovarano je o povratku RK "Bosna" Visoko u Premijer ligu BiH, o radu kluba i finansiranju u 2014/2015. godini. Predstavnici RK "Bosna" Visoko informisali su načelnicu o trenutnim aktivnostima, budućim planovima, radu omladinskih selekcija i općenito funkcioniranju kluba s posebnim akcentom na finansijsku situaciju. Polazeći od značaja sporta za zdravlje građana, socijalnu integraciju, sportski prestiž i afirmaciju, moral i druge vrijednosti od općeg interesa, a u želji da, ne samo održi već i otvori nove perspektive razvoja i u ovoj oblasti, naglašeno je opredjeljenje Općine Visoko da i ubuduće podržava transparentan rad klubova koji djeluju na prostoru općine Visoko.



## PRIJEM U OPĆINI VISOKO ZA NAIDU DEDIĆ



Od 13. do 21. jula 2014. godine glavni grad Kazahstana, Astana, bio je domaćin Međunarodne olimpijade iz fizike. Na ovo prestižno takmičenje, među mladim fizičarima iz 80-ak država, plasirala se i Naida Dedić, učenica trećeg razreda Gimnazije Visoko. Načelnica Općine Visoko upriličila je prijem za Naidu Dedić, i tom prilikom istakla da plasman na Međunarodnu olimpijadu znači dostići visok rang znanja, te da Naidin uspjeh treba da bude primjer svima kako se radom, trudom i odricanjem može postići mnogo.

## PRIJEM U OPĆINI VISOKO ZA HAFIZA FARISA EF. BEGIĆA

Načelnica Amra Babić upriličila je prijem za hafiza Farisa ef. Begića, jednog od najmlađih hafiza i imama u BiH. Faris ef. Begić je od 2014. godine glavni imam u džematu visočke Mjesne zajednice Vratnica. Prijemu je uz predstavnike Općine Visoko, prisustvovao i glavni imam Medžlisa Islamske zajednice Visoko, Ibrahim ef. Hadžić.

Faris Begić (1993) sin Šefke i Rašide, iz mjesta Kološići kod Visokog, završio je Gazi Husrev-begovu medresu u Sarajevu. Faris je treći hafiz u porodici Begić, jer su starije sestre Adha i Amina prije postale hafize. Student je Fakulteta islamskih nauka u Sarajevu.

„Uspjeh koji je Faris ef. Begić ostvario je rezultat odricanja, truda i upornosti, i pravi je primjer za druge mlade ljude da krenu tim putem, te da shvate da vrijedi živjeti ispravan život pun vrlina, a ovaj prijem je pokazatelj da Općina Visoko prati sve uspjehe naše omladine“, naglasila je načelnica Amra Babić.





## UPRILIČEN PRIJEM ZA UČENIKE - DOBITNIKE NAGRADA ZA NAJUSPJEŠNIJE LITERARNE I LIKOVNE RADOVE

Načelnica Amra Babić upriličila je prijem za učenike osnovnih i srednjih škola općine Visoko koji su osvojili nagrade po kriterijima Konkursa za izbor najuspješnijih literarnih i likovnih radova „Sjećanje na šehide“ za 2014. godinu. Načelnica je istakla da se ovaj Konkurs raspisuje niz godina, te da se na ovaj način odaje počast djeci, njih 38, koja su u toku agresije 1992-1995. poginula na području općine Visoko. Učenicima nagrađenih radova načelnica je uručila skromne nagrade.

U konkurenciji učenika iz osnovnih škola, Amri Menzilović iz OŠ „Mula Mustafa Bašeskija“ je pripalo prvo mjesto za najbolji literarni rad, a drugo mjesto Lamiji Zerdo iz OŠ „Alija Nametak“. Treće mjesto podijelile su Nejra Vračo iz OŠ „Mula Mustafa Bašeskija“ i Mensur Ahmić iz OŠ „Alija Nametak“. Prvo mjesto za najbolji likovni rad podijelile su Šerifa Softić iz OŠ „Mula Mustafa Bašeskija“ i Amina Smailagić iz OŠ „Safvet-beg Bašagić“. Drugo mjesto podijelile su Emma

Krivdić iz OŠ „Mula Mustafa Bašeskija“ i Petra Marušić iz OŠ „Safvet-beg Bašagić“. Treće mjesto su podijelile Lejla Hido iz OŠ „Safvet-beg Bašagić“ i Lejla Džafić iz OŠ „Alija Nametak“. U konkurenciji učenika iz srednjih škola, prvo mjesto za najbolji literarni rad osvojila je Amina Hodžić iz MSS „Hazim Šabanović“, a drugo mjesto Amra Mušija iz Medrese „Osman ef. Redžović“. Prvo mjesto za najuspješniji likovni rad osvojila je takođe Amra Mušija iz Medrese „Osman ef. Redžović“.

## ČESTITKE VISOČKIM GIMNASTIČARKAMA

Općinska načelnica Amra Babić, u ime Općine Visoko i u svoje lično ime, uputila je iskrene čestitke visočkim gimnastičarkama, Iman Karavdić za osvojenu zlatnu medalju, drugoplasiranoj Hani Trubljanin, te Hani Lendžer i Farah Dželilović, kao i treneru, Amini Lepić na postignutim rezultatima na Međunarodnim smotrama u Budvi.

## PRIJEM POVODOM RAMAZANSKOG BAJRAMA

Općinska načelnica Amra Babić, zajedno sa predsjedavajućom Općinskog vijeća Mirelom Mateša - Bukva, zamjenicom predsjedavajuće Općinskog vijeća Aidom Zerdo i predstavnicima Općine, upriličila je prijem za predstavnike Medžlisa IZ Visoko i Medžlisa IZ Gračanica povodom Ramazanskog bajrama. Na prijemu je bilo govora o radu Medžlisa, budućoj suradnji sa Općinom Visoko, a čelni ljudi oba Medžlisa zahvalili su načelnici Amri Babić na podršci u radu vjerskih zajednica, ali i na angažmanu općinske administracije kada je u pitanju pomoć socijalno ugroženim kategorijama stanovništva na području općine Visoko.



## PRIJEM ZA PREDSTAVNIKE ŠKOLE FUDBALA "VISPORT" VISOKO

Općinska načelnica Amra Babić upriličila je prijem za predstavnike Škole fudbala „Visport“ Visoko sa trenerom Edinom Muzaferijom. Visočka Škola fudbala „Visport“ je u konkurenciji 26 gradova osvojila prvo mjesto u finalu Sportskih igara mladih BiH, koje se održalo u sportskoj dvorani „Ramiz Salčin“ u Sarajevu, te su zatim predstavili naš grad i na Sportskim igrama mladih u Splitu gdje su osvojili drugo mjesto. Načelnica Amra Babić tom prilikom je uputila iskrene čestitke, uz želje da sa puno sportske sreće i dostojanstveno predstavljaju naš grad i na budućim takmičenjima.



## ČESTITKE MALIKU KURTU I FARUKU GARIBU

Načelnica Amra Babić, u ime Općine Visoko i u svoje lično ime, uputila je iskrene čestitke Visočanima Maliku Kurtu i Faruku Garibu koji su se na 20. Sarajevo film festivalu takmičili u konkurenciji Teen Arena, te po odluci žirija osvojili specijalnu nagradu za svoja dva projekta - kratki film "Flappy Attack" i spot "We are happy from Visoko".

## SASTANAK NAČELNICE BABIĆ SA UČESNICIMA XII MULTIETNIČKIH LIKOVNIH SUSRETA MLADIH



Društvo za toleranciju je u okviru Foruma „Most prijateljstva“ održalo XII Multietničke likovne susrete mladih u Visokom od 20. do 27. avgusta 2014. godine, gdje je sudjelovalo 30 mladih iz BiH, Mađarske, Makedonije i Srbije, a iz Visokog je učestvovalo devet članova Odreda izviđača Visoko. Domaćin Multietničkih likovnih susreta mladih bio je Planinarski dom "Zbilje". Sa mladima je radila i akademski slikar Sonja Ardan iz Srbije. Podršku za ove Susrete pružila je Općina Visoko i načelnica Babić. Cilj druženja bio je da se mladi upoznaju uz aktivan rad na slikanju, radionicama upoznavanja i predstavljanja sebe i sredine iz koje dolaze, kako bi umanjili stereotipe sa kojima i dalje svakodnevno živimo.

## ČESTITKA ZA TAEKWONDO KLUB "BOSNA" VISOKO

Općinska načelnica Amra Babić, u ime Općine Visoko i u svoje lično ime, uputila je čestitke na uspjehu i osvojenim medaljama visočkom TKD klubu „Bosna“, Nedimu Bečaru, novom prvaku Balkana, kao i treneru Edinu Kajeviću - Kaji, čiji je taekwondo klub u sastavu reprezentacije Bosne i Hercegovine učestvovao na Balkanskom prvenstvu u taekwondou u Sloveniji (Maribor), gdje su ostvarili izvrsne rezultate i dostojanstveno predstavili svoj grad, kao i Bosnu i Hercegovinu, osvojivši pet medalja. Na ovom izuzetno jakom prvenstvu, u konkurenciji deset balkanskih zemalja, nastupilo je preko 400 takmičara. Zlatnu medalju osvojio je Nedim Bečar, a bronzane Kadir Ramović, Džejlana Kovačević, Mirza Osmanbegović i Almina Mušinbegović.



## PRIJEM ZA MATURANTE- DJECU ŠEHIDA I POGINULIH BORACA

U Maloj sali Općine Visoko upriličen je prijem za maturante školske 2013/2014. - djecu šehida i poginulih boraca općine Visoko. Prijemu su prisustvovali maturanti Šejla Bučuk, Ahmija Hamzić, Dževad Jusić, Ahmed Karalić i Amra Mušija.

**N**a inicijativu Asocijacije Fatma i Organizacije porodica šehida i poginulih boraca '92 ovaj tradicionalni prijem predstavlja priliku za obilježavanje završetaka drugog ciklusa obrazovanja i odgoja, kao i ulazak u novu životnu etapu punoljetnosti naših mladih sugrađana.

Načelnica Babić je poručila jednoj od posljednjih generacija maturanata da uvijek streme visokim ciljevima.

"Koliko nam je drago toliko je i žao, ovu brigu za vas smatram privilegijom. Meni je uvijek bolno pričati sa

djecom šehida. Imajte na umu da za vas sad počinje bitka za budućnost. Ta bitka se dobija samo znanjem, a istina o vašim bližnjim je zauvijek utkana u svakog od vas i niko je ne može promijeniti niti izbrisati. Ona je na našim spomenicima i grobljima", kazala je tokom razgovora sa maturantima, Općinska načelnica Babić.

Načelnica je maturantima čestitala na uspjehu i zaželjela dobro zdravlje, sreću i uspjeh u daljem životu, radu i obrazovanju. Maturantima su tom prilikom uručena i skromna novčana sredstva.

## ČESTITKA AŠIDI ČATIĆ

**N**ačelnica Amra Babić u ime Općine Visoko i u svoje lično ime uputila je iskrene čestitke Ašidi Čatić, učenici Gimnazije „Visoko“ koja je na 53. takmičenju mladih matematičara – Federalnom prvenstvu učenika srednjih škola u matematici ostvarila izvrstan rezultat osvojivši 2. mjesto.

## ČESTITKA ZA „CONFERO“ I FARISA PINJU

**O**pćinska načelnica Amra Babić, u ime Općine Visoko i u svoje lično ime, uputila je iskrene čestitke za uspjeh i osvojenu nagradu Udruženju mladih ljubitelja scenskih umjetnosti „Confero“ i Farisu Pinju, dobitniku Specijalne nagrade žirija 12. Festivala srednjoškolskog dramskog stvaralaštva u Konjicu.

## ČESTITKA MEVLINU HADŽIOSMANOVIĆU

**N**ačelnica Amra Babić, u ime Općine Visoko i u svoje lično ime, uputila je iskrene čestitke Visočaninu Mevlinu Hadžiosmanoviću koji na 66. Međunarodnoj izložbi inovacija (IENA) u Nürnbergu (Njemačka), nagrađen bronзанom medaljom za izumljene kocke za zaštitu od riječnih poplava koje bi se najavom ili nalezom poplave, blagovremeno mogle poslagati duž obala, i postupno automatski puniti nadolazećom vodom.



## UČENICI GENERACIJE VIŠOČKIH OSNOVNIH I SREDNJIH ŠKOLA NA PRIJEMU KOD NAČELNICE BABIĆ

Svečani prijem za učenike generacije 2013/2014. godine svih osnovnih i srednjih škola sa područja višočke općine upriličen je u Maloj sali Općine Visoko.

Prijemu su prisustvovali, učenici generacije srednjih škola, Amra Strika i Bakir Delić iz Medrese "Osman-ef. Redžović", Fabio Badrov iz Franjevačke klasične gimnazije, Sumejja Halilović iz Gimnazije "Visoko" i Emina Smajlović iz MSS "Hazim Šabanović". Među prisutnima su bili i direktori, te nastavnici ovih učenika.

Učenici generacije osnovnih škola sa područja općine Visoko su Mirna Karavdić iz OŠ "Safvet-beg Bašagić", Eldina Cama iz OŠ "Kulin Ban", Kaid Trako iz OŠ "Musa Ćazim Ćatić" Veliko Čajno, Nejra Hindija iz OŠ "Mula

Mustafa Bašeskija" Donje Moštre, Ajla Hindija iz OŠ "Mehmedalija Mak Dizdar" Dobrinje, Dženeta Sudžuka iz OŠ "Alija Nametak" Buci i Amina Džinalić, učenica generacije Muzičke OŠ "Avdo Smajlović" Visoko.

Načelnica je svim učenicima iskazala svoju iskrenu podršku, te poželjela sreću u daljnjem nastavku školovanja i izboru budućih škola. - "Želim vam prije svega puno zdravlja, zatim puno sreće. Uspjeh sigurno slijedi, jer ste do sad pokazali da radite, da ste vrijedni i da ćete ga ostvariti", rekla je načelnica Amra Babić.

Učenici su se kratko predstavili i izrazili svoje želje kada je riječ o svojim daljnjim opredjeljenjima, a tom prilikom svima je uručen i novčani poklon.

## ČESTITKA NAČELNICE AMRE BABIĆ SVIM PRVAČIĆIMA

Svim đacima prvacima sretan početak obrazovanja, a ostalim učenicima, nastavnom osoblju i roditeljima, sretan početak nove školske godine, poželjela je načelnica Amra Babić. Povodom početka nove školske godine načelnica Babić je posjetila OŠ „Musa Ćazim Ćatić“ u Gračanici gdje je prvačićima čestitala sretan početak obrazovanja. Na području općine Visoko u školskoj 2014/2015. godini upisano je 465 prvačića, a svi prvačići su dobili čokoladu i prigodnu čestitku od načelnice Amre Babić.



## ČESTITKA ZA MEĐUNARODNI DAN STUDENATA I SREDNJOŠKOLACA

Povodom Međunarodnog dana studenata i srednjoškolaca, u svoje ime i u ime općinske administracije, svim studentima, srednjoškolcima, te njihovim profesorima kao i svim učesnicima u obrazovnom procesu, načelnica Amra Babić uputila je najiskrenije čestitke uz želju da svojim znanjem, mladošću i željom za obrazovanjem, budu pokretači boljeg života i presudan činilac u razvoju naše zemlje.



## NAČELNICA BABIĆ POSJETILA JU „DOM ZDRAVLJA“ VISOKO

Načelnica općine Visoko Amra Babić je sa šefom Odsjeka za lokalni ekonomski razvoj Emirom Fejzovićem posjetila JU “Dom zdravlja” Visoko. Tom prilikom sastala se sa novim direktorom ove ustanove, dr. Senadom Karavdićem.

**S**tanje u ovoj instituciji, problemi, aktivnosti, te planovi za naredni period bile su teme održanog sastanka.

Novoimenovani direktor JU “Dom zdravlja” Visoko, dr. Senad Karavdić naveo je da je na sastanku razgovarano o budućoj saradnji Općine Visoko i JU “Dom zdravlja”.

- „Zvanični posjet načelnice Amre Babić sa saradnikom Emirom Fejzovićem iskoristio sam da razgovaramo o obavezama osnivača, tj. Općine Visoko prema Javnoj ustanovi „Dom zdravlja“ Visoko, te o našim projektima koje želimo aplicirati, a koje možemo ostvariti uz pomoć općinskih službi i načelnice Babić. Također smo razgovarali i o projektima koje ćemo aplicirati prema našim inozemnim prijateljima, pri čemu nam mogu pomoći konekcije koje Općina Visoko ima sa njima“, istakao je tom prilikom direktor, dr. Senad Karavdić.

Dogovoreno je da se u narednom periodu zajedničkim angažmanom općinskih službi i uposlenika Doma zdravlja da doprinos podizanju zdravstvene zaštite na veći nivo.

Općinska načelnica je istakla da je cilj posjete bio da dr. Karavdiću čestita imenovanje i iskaže podršku Općine Visoko u njegovom daljem radu i radu ove ustanove.

- “Zajednički cilj nas i menadžmenta bit će pružanje bolje usluge građanima, opremanje JU „Dom zdravlja“ Visoko novom opremom. Želimo popraviti kvalitet usluga u ovoj ustanovi. Vrijeme ispred nas je puno šansi, a na nama je da ih zajedno iskoristimo“. rekla je načelnica Babić.

Načelnica Amra Babić je u pratnji direktora Senada Karavdića obišla jednu od ambulanti Doma zdravlja gdje je imala priliku razgovarati sa uposlenicima i pacijentima.



## TRADICIONALNI PRIJEM POVODOM KURBAN-BAJRAMA

Općinska načelnica Amra Babić, predsjedavajuća Općinskoga vijeća Mirela Mateša - Bukva kao i dopredsjedavajuća OV Aida Zerdo, sa saradnicima, upriličili su tradicionalni prijem povodom Kurban-bajrama za predstavnike Medžlisa IZ Visoko i Medžlisa IZ Gračanica. Na prijemu se razgovaralo o radu Medžlisa, budućoj saradnji sa Općinom Visoko, kao i o aktivnostima organizovanim na području općine Visoko povodom obilježavanja ovog praznika. Predstavnici Medžlisa su istakli kako je Kurban-bajram prilika za susret sa životnom stvarnošću, za solidarisiranje sa drugima, a iskazali su također i svoje zadovoljstvo saradnjom između Medžlisa i Općine Visoko, te se zahvalili načelnici Babić na podršci u radu.



## ČESTITKA ZA REZULTATE NA OPĆIM IZBORIMA 2014

Općini Visoko je održana press konferencija povodom objavljivanja zvaničnih rezultata Općih izbora 2014. godine. Predsjednica Općinske izborne komisije Visoko (OIK), Aida Karavelić i načelnica Amra Babić su čestitali kandidatima koji su ostvarili najbolje izborne rezultate, i koji će u narednom periodu predstavljati interese Visočana u Parlamentu FBiH i Skupštini Zeničko-dobojskog kantona. U Skupštinu Ze-Do kantona iz Visokog ušli su: Senad Karavdić (SDA), Meldina Ugarak (SBB), Kemal Mušinbegović (SBB), Amir Ganić (A-SDA), Lejla Imamović (DF), Mufid Bečarević (A-SDA), Senad Trako (BPS). U Parlament FBiH ušli su: Mirza Ganić (SDA) i Jasmina Zubić (SDP).

## UPRILIČEN TRADICIONALNI BOŽIĆNI PRIJEM

Općinska načelnica Amra Babić je povodom katoličkog blagdana Božića, upriličila tradicionalni prijem za fra Josipa Ikića, gvardijana Franjevačkog samostana Visoko i fra Franju Radmana. Pored načelnice Babić, prijemu su prisustvovala predsjedavajuća Općinskog vijeća Mirela Mateša - Bukva, dopredsjedavajuća OV Aida Zerdo, sekretar OV Zekija Omerbegović i pomoćnica načelnice Edina Ferizović. U ugodnom razgovoru, gvardijan fra Josip Ikić upoznao je načelnicu sa dešavanjima unutar visočke katoličke zajednice. Načelnica je uputila čestitku građanima općine Visoko, pripadnicima katoličke vjeroispovijesti, uz želje da Božić provedu u zdravlju, sreći i ljubavi sa svojim porodicama, prijateljima i komšijama.



## OPĆINSKA NAČELNICA UGOSTILA EDINA KAJEVIĆA-KAJU

Načelnica Amra Babić upriličila je prijem za vlasnika Ginisovog rekorda, Edina Kajevića-Kaju. Trener i predsjednik TKD "Bosna" Visoko oborio je rekord u razbijanju kokosovih oraha u jednoj minuti, razbivši laktom ruke njih 40. Dosadašnji rekord držao je Amerikanac sa 21 razbijenim orahom. Općinska načelnica je uputila iskrene čestitke prvom Visočaninu vlasniku Ginisovog rekorda, naglasivši da je ovaj događaj primjer pozitivne promocije Visokog u regiji i svijetu.

## JAVNA USTANOVA „GRADSKA BIBLIOTEKA“ VISOKO

Osnovna djelatnost Biblioteke jeste nabavka, obrada, čuvanje i zaštita knjižnog fonda, te davanje istog korisnicima.

U JU „Gradska biblioteka“ Visoko obrada knjižnog fonda radi se u sistemu COBISS, te se u proteklom periodu intenzivno radilo na obradi bibliotečke građe i obogaćivanju lokalne i uzajamne baze podataka.

Rad sa korisnicima obavlja se po 10 sati dnevno u oba odjeljenja.

U svrhu zaštite kulturnohistorijskog naslijeđa, prikuplja se, obrađuje i čuva građa za zavičajnu zbirku koja ima informaciono-dokumentacionu vrijednost.

Javna ustanova „Gradska biblioteka“ Visoko u toku 2014. godine održala je nekoliko manifestacija u cilju popularizacije knjige i biblioteke.

Povodom 1. marta- Dana nezavisnosti Bosne i Hercegovine, u Općini Visoko održana je promocija knjige „Bosanski feniks“ autora prof.dr. Envera Demirovića. Promotori ovog djela su bili prof.dr. Ismet Dizdarević, prof.dr. Džemal Najetović i mr. Selman Selhanović.

Održana je promocija monografije „Treći korpus Armije RBiH (1992-1995.)“. Ovu promociju monografije organizovala je Općina Visoko u saradnji sa Javnom ustanovom „Gradska biblioteka“ Visoko.

Predstavljena je knjiga „Genocid u Ahmićima 1993“, autora doc. dr. Rasima Muratovića. Promotori su bili prof.dr. Smail Čekić, prof.dr. Rasim Muratović i predsjednik Skupštine Udruženja žrtava rata 92- 95. "16. april", Bahtija Ahmić.



U Gimnaziji „Visoko“ održano je predavanje na temu „Informacijska pismenost“. Bibliotekari visočke biblioteke su prisustvovali Međunarodnom sajmu knjiga koji je održan u Sarajevu.

U okviru manifestacije „Visočko ljeto 2014“ i u saradnji sa BZK „Preporod“ Visoko održana je tribina o životu i djelu prof.dr. Hazima Šabanovića i Saliha ef. Trake.

Održana promocija knjige „Hava majka Prijedorčanka“ autora Admira Muhića. Promotori su bili Ferid Krak, zamjenik načelnika općine Cetingrad, Dževad Ponjević, prof. bosanskog jezika, Elmedina Muftić, novinar.


Održana promocija knjige „Riječ po riječ“ autora Bajre Perve. Promotori su bili prof. dr. Jusuf Ramić, Mensur ef. Pašalić i mr. Amra Babić.

Povodom Dana državnosti Bosne i Hercegovine održana je promocija knjige „Inat bosanskog goluba“ autora Muhameda Mahmutovića.

Održana je promocija knjige „Sevdalinka and Bosniak folk poetry“ (Sevdalinka i bošnjačka narodna poezija) autora prof. dr. Enesa Kujundžića.

U svrhu osavremenjavanja biblioteke, nabavke bibliotečke i tehničke opreme nabavljen je metalni ormar za arhivsku građu iz fonda zavičajne zbirke, te dva manipulativna stola u odjeljenjima za djecu i odrasle čitaoce.

Bibliotekari JU „Gradska biblioteka“ Visoko, u cilju stručnog usavršavanja, prisustvovali su na nekoliko značajnih konferencija i seminara.



## JAVNA USTANOVA ZA PREDŠKOLSKI ODGOJ I OBRAZOVANJE

Aktivnosti koje je Javna ustanova za predškolski odgoj i obrazovanje realizovala u 2014. godini su:

Novogodišnja priredba sa podjelom paketića za djecu koja borave u vrtiću/cjelodnevnom boravku, zatim za djecu koja pohađaju obavezni predškolski odgoj i djecu čiji roditelji se nalaze na evidenciji Zavoda za zapošljavanje.

Realizacija programa obaveznog predškolskog odgoja i obrazovanja u svim školama na području Općine Visoko i JU za predškolski odgoj i obrazovanje, u saradnji sa Ministarstvom obrazovanja ZDK. Programom je u 2014. godini obuhvaćeno 253 djece.

Odgajateljice su prisustvovalе seminaru u organizaciji Pedagoškog zavoda Zenica „Ishodi učenja maternjeg jezika za djecu 21.vijekā“, te je počela saradnja ustanove sa dipl. logopedom surdiaudilogom.

Održana svečana priredba povodom obilježavanja Dana žena kao i završne svečanosti sa podjelom diploma za djecu koja su pohađala program predškolskog odgoja i obrazovanja u Projektu „Povećajmo mogućnosti djeci u BiH za rano učenje“.

Realizirane su radionice za roditelje u prostorijama ustanove, te za odgajatelje u okviru projekta „Ishodi učenja maternjeg jezika za djecu 21. vijeka“.

Posjetio nas je sugrađanin Reuf Aždahić i uručio vrijednu donaciju u igračkama i namještaju.

Održan je muzičko-scenski nastup djece na ljetnoj pozornici povodom manifestacije „Visočko ljeto 2014“.

Prigodnim aktivnostima je obilježena tradicionalna „Dječja nedjelja“.



Održale su se radionice - priprema zimnice. U sklopu posjete predstavnice Unicef-a radi evaluacije projekta „Povećajmo mogućnosti djeci u BiH za rano učenje“, organizirane su radionice za djecu koja su učestvovala u projektu, te razgovor sa njihovim roditeljima i odgajateljima.

Održane su radionice pod nazivom „Mojoj dragoj BiH“ povodom obilježavanja „25. novembra“, Dana državnosti Bosne i Hercegovine, kao i likovne radionice, te radionice za pripremu zdravih domaćih supica i priloga. Djeca su uz pomoć zanatlija učestvovala i u izradi svirala.

Djeca su posjetila Zavičajni muzej Visoko, grnčara Emsedina Ohrana iz Liješeve, te čibučara Vehaba Halilovića iz Goduše.

Organiziran je bajramski ručak uz pomoć roditelja i donatora, a bajramski poklon za svako dijete je obezbijeđen od strane načelnice Babić.

Starija jaslička grupa je učestvovala u predstavi „Plumb Bo-Bo Zu“ odigranoj u Gradskom kinu Visoko.

Povodom obilježavanja „Svjetskog dana štednje“ organizovana je posjeta UniCredit i Sparkasse bankama.

Djeca su nastupila sa muzičko-scenskom tačkom „Planeta Zemlja“ na otvaranju manifestacije „Jesen u Visokom“.

Svečanom priredbom obilježeno je 40 godina rada ustanove. Organizovana je posjeta lovcima u skladu sa planiranom mjesečnom temom, a zatim i posjeta Franjevačkoj gimnaziji povodom obilježavanja Božića.



## JAVNA USTANOVA „CENTAR ZA SOCIJALNI RAD“

Pomoć od Centra za socijalni rad može tražiti svaki pojedinac i porodica koji se nađu u stanju socijalne potrebe, a koji sami ne mogu prevazići problem bez pomoći društvene zajednice.

Centar obavlja i poslove posredovanja i ostale poslove srodne redovnim poslovima u saradnji sa nevladinim sektorom (u pružanju pomoći ranjivim skupinama ljudi) kao što su Udruženja „Human-apel Internacional“ Sarajevo, Omladinski krug međžliisa Islamske zajednice, fondacija „Život“ Ilijaš, kao i lokalnim privrednicima koji su učestvovali u projektima pružanja pomoći ugroženom stanovništvu.

U 2014. godini podneseno je 468 zahtjeva za koje su odobrena sredstva za najugroženije porodice od strane Općine Visoko, u ukupnom novčanom iznosu od 48.058 KM, a odobrena su i sredstva od strane Ministarstva za rad, socijalnu politiku i izbjeglice Ze-do kantona u ukupnom novčanom iznosu od 11.176,73 KM za 80 korisnika.

Nastavljeno je pružanje besplatne pravne pomoći po ugovoru sa Kantonalnim zavodom za besplatnu pravnu pomoć Zenica.

Centar aktivno provodi realizaciju projekta „Obilazak i pružanje pomoći osobama u starijoj životnoj dobi koje žive same“.

U saradnji sa nevladinom organizacijom „Human-apel International“ Sarajevo, oko 600 kilograma ovčjeg mesa je podijeljeno na 150 porodica sa područja općine Visoko, inače korisnika stalne novčane pomoći i porodica koje žive u lošoj materijalnoj situaciji.



Centar je aktivno učestvovao u aktivnostima pružanja podrške i pomoći porodicama koje su se našle u stanju socijalne potrebe uzrokovane elementarnom nepogodom izazvanom obilnim padavinama u maju 2014. godine.

Tokom proteklog perioda radilo se na uvezivanju podataka na nivou Federacije Bosne i Hercegovine kojima raspolažu centri za socijalni rad, odnosno na uvođenje korisnika koji ostvaruju pravo posredstvom centara u jedinstvenu bazu podataka u programu Sotac.

Završena je revizija dječjeg dodatka za 1015 korisnika navedenog prava za 1877 djece koja su na evidenciji.

Nastavljena je saradnja sa Fondacijom „Život“ Ilijaš posredstvom koje su donirana sredstva u novčanom iznosu od 1.000,00 KM, a koja su utrošena za kupovinu peći na ogrjev za socijalno ugroženu porodicu sa područja općine Visoko.

Također, od Fondacije „Život“ Ilijaš donirana su sredstva za jednu porodicu, za priključak na vodovodnu mrežu u iznosu od 500,00 KM.

JU Centar za socijalni rad je u 2014. realizirao projekat „Dječja nedjelja“.

Iz robnih rezervi Federacije BiH posredstvom Centra izvršena je podjela mlijeka i sira za 200 porodica.

Uz pomoć sugrađanke Emire Haki-rević koja živi u Americi, donirana su sredstva od strane gospodina Shaik Bajraka, državljanina Amerike u iznosu od 4.000,00 KM, te su ista uručena u iznosima od po 100,00 KM za 40 porodica.

Uz veliko zalaganje općinske načelnice Amre Babić u pružanju pomoći socijalno ugroženom stanovništvu naše općine, donirana su sredstva u novčanom iznosu od 35.000 eura od strane vlasnika firme Abras company d.o.o., gospodina Ahmeda Alabrasa, za tri projekta: „Nabavka ogrjeva socijalno najugroženijem stanovništvu općine Visoko“, „Humanitarna pomoć socijalno najugroženijem stanovništvu općine Visoko“ i „Zaštita zdravlja socijalno najugroženijeg stanovništva općine Visoko“.

Javna ustanova Centar za socijalni rad Visoko potpisala je Memorandum sa Udruženjem građana „Mladi volonteri“ Visoko u projektu otvaranja Javne kuhinje na području općine Visoko, koja je u 2014. godini počela sa pružanjem svojih usluga socijalno ugroženom stanovništvu.

## JAVNA USTANOVA „CENTAR ZA KULTURU I EDUKACIJU“

Javna ustanova „Centar za kulturu i edukaciju“ Visoko je u toku 2014. godine uspješno i kvalitetno planirala, organizovala i realizovala aktivnosti iz osnovne djelatnosti, a u cilju zadovoljavanja kulturnih potreba građana u lokalnoj zajednici.

U Javnoj ustanovi „Centar za kulturu i edukaciju“ Visoko realizovana su kulturna dešavanja kao što su: pozorišna predstava „Režim“, predstava u režiji Farisa Pinje „Pamela, mrzim te“, performans u režiji Rasima Pavice „Islamofobija ili smijem li reći ko sam?“, prezentacija „10 godina postojanja i rada srednjoškolske teatarske grupe Confero“, te pozorišne predstave za učenike osnovnih škola.

Uspješno su izvedene predstave umjetničke grupe „Satya“, omladinska scena Sarajevo - predstava „Ja sam životinja“, pozorišna produkcija „Almanah“ Sarajevo, Monodrama Josipa Pejakovića „Oj živote - Ućerivanje“.

U organizaciji Udruženja građana „Damar omladine“ Visoko urađeno je osam radionica. Udruženje građana „Nit života“ je organizovalo dvodnevnu prodajnu izložbu rukotvorina; Udruženje građana „Humani ljudi“ MZ Kološići - film „Begovica“; Udruženje građana „Bedem“ - projekat „Etnografija moštanskog kraja“.

Održana je i manifestacija „Najuspješniji sportisti i sportski radnici općine Visoko 2013“.

Franjevačka klasična gimnazija Visoko organizovala je „Koncert za mir“ koji su realizovali Interkulturalni zbor mladih Visoko i Kamerni zbor mladih iz Koblenza.



U organizaciji KUD „Visoko“ održani su humanitarni koncert „Melodije proljeća“, kao i koncert bosanskih derviških ilahija, Tesavvufski hor i ansambl Tekije Mesudijja.

U sklopu manifestacije „Visočko ljeto 2014“ održani su: Prodajno-edukativna izložba u foajeu kina u organizaciji UG „Mozaik“, UG „Nit života“, UG „Visočke sevdalije“ i UG „Pokret zlatne ruke“. U organizaciji UG Teatar „Total“ - pozorišna predstava „Čekajući Godoa“. Sarajevski ratni teatar „Sartr“ Sarajevo izveo je pozorišnu predstavu „Bio je lijep i sunčan dan“. Prikazani su igrano-animirani 3D filmovi za djecu i odrasle „Nindža kornjače“, „Ćurke na slobodi“, „Robocop“, „Zvončica - gusarska vila“, „Čudesni Spider-Man 2“, „Pčelica Maja“, i film „Drakula, neispričana priča“.

Za vrijeme kulturne manifestacije

„Dani Zaima Muzaferije 2014“, „Kamerniteatar 55“ Sarajevo izveo je pozorišnu predstavu „Bajka koju idiot priča“, a UG Teatar „Total“ pozorišnu predstavu „Policajci“.

Prikazan je dokumentarni film „Logori smrti“, održana promocija knjige „Rađanje lidera“ Recep Tayip Erdogan, te realizovan video-link Visoko - Konya.

Održana je prezentacija projekta „Poslovna zona Ozrakovići“.

Od ostalih manifestacija održan je „Pokušaj obaranja Guinnessovog rekorda u razbijanju kokosovih oraha laktom“ kao i Centralna svečanost povodom 450 godina od smrti Nasuh Matrakči Visočanina.

Narodno pozorište - Kodex balet Sarajevo izvelo je baletsku predstavu „Novogodišnja bajka“ za učenike osnovnih škola.



## JAVNA USTANOVA „ZAVIČAJNI MUZEJ VISOKO“

**J**U Zavičajni muzej Visoko je pored osnovne djelatnosti-prikupljanja, zaštite, obrade, čuvanja, te zaštite kulturno-historijske baštine, naučno istraživačkog rada, pedagoške aktivnosti i izdavaštva, u toku 2014. godine organizovao nekoliko projekata, izložbi i promocija.

Povodom Svjetskog dana Roma, JU Zavičajni muzej Visoko je organizovao izložbu fotografija na kojim je predstavljen život Roma.

Obilježena je 10. godišnjica srednjoškolske scene Udruženja mladih ljubitelja scenskih umjetnosti „Confero“. Organizovana je izložba fotografija, dramskih tekstova, plakata i afiša svih do sada izvedenih predstava.

Za Dan Armije R BiH - 15. aprila, JU Zavičajni muzej Visoko je organizovao promociju knjige „Ruski i grčki plaćenici u ratu u BiH“ autora Aziza Tafro, majora u penziji.

Zavičajni muzej je uzeo učešće u obilježavanju manifestacije Evropska noć muzeja - 17. maja i Međunarodni dan muzeja - 18. maja u okviru ICOM-ove međunarodne kampanje, pod sloganom „Noć i dan muzeja“ organizujući u saradnji sa OU „Bedem“ dvodnevnu manifestaciju „Etnografija moštarskog kraja“.

Javna ustanova Zavičajni muzej Visoko je dostavio temu i motiv „Kulturno historijsko naslijeđe - Visoko, Mili – Arnautovići, kruniceno mjesto bosanskih vladara“ kao aplikaciju na Program BH Pošte za izdavanje poštanskih maraka za 2014. godinu.



Potpisan je Ugovor o saradnji između Javne ustanove Zavičajni muzej Visoko i Fondacije „Arheološki park: Bosanska piramida Sunca“.

Ostvareni projekti iz oblasti kulture su: Izložba likovnih radova Anela Lepića i otvaranje festivala umjetnosti i kreacije „Many men show“, promocija knjiga akademika prof.dr. Ibrahima Pašića „Tračko ime Bosna i Tračani u Bosni“ i „Gotizmi i ilirizmi u Kulinovoj povelji“, izložba crteža i akvarela Ismeta Mujezinovića, promocija kataloga „Tragovi 2014“ i otvaranje tradicionalne kulturne manifestacije „Dani Zaima Muzaferije“.

Stručni tim Muzeja uradio je dopunjenu formu studije koja je proslijedena Zavodu za urbanizam i prostorno uređenje Ze-do kantona.

Ostvarena je saradnja sa ICOM-om (International council of museums).

Muzej je dao prijedlog za dodjelu Povelje Općine Visoko njemačkim institucijama: Rimsko - germanskoj komisiji Njemačkog arheološkog instituta iz Frankfurta na Majni i Institutu za prahistoriju i ranu historiju Univerziteta u Kilu.

Muzej je učestvovao u projektu „Volontiraj-kreditiraj“, a uposlenici su takođe učestvovali u pripremanju prigodnih predavanja u saradnji s Općinom Visoko prilikom obilježavanja državnih praznika i Dana općine Visoko kao i prilikom posjeta različitim delegacijama općini Visoko.

Realizovan okrugli stol na temu „Nasuh Matrakčija Bošnjak - naučnik, književnik i minijaturist“ u saradnji sa BZK „Preporod“ Visoko i Orijentalnim institutom Sarajevo, pod pokroviteljstvom Općine Visoko.



## JAVNA USTANOVA KULTURNO-SPORTSKI CENTAR „MLADOST“

U 2014. godini u JU KSC „Mladost“ Visoko klubovi koji koriste dvoranu su za trenažni dio svih selekcija koristili oko 1350 sati, a za rukometne, košarkaške i malonogometne utakmice oko 130 sati.

Održana su dva turnira u košarci, u organizaciji KK "Horog" D. Moštre, i u rukometu, u organizaciji RK "Bosna" Visoko.

Prostore dvorane koristi Karate klub "Visoko" koji su do sad za trenažni dio koristili oko 554 sati. Jedan od sadržaja JU KSC „Mladost“ Visoko je i stoni tenis. Otvorena je nova kuglana i koriste je članovi Kuglaškog kluba "Bosna" Visoko, kao i rekreativci.

Od manifestacija organizovane su: "Salavat tebi Poslaniče" u organizaciji



IZ Visoko, humanitarni koncert za Elmu Mušinbegović, turnir u malom nogometu- Policija ZDK, svečana prozivka maturanata Gimnazije Visoko i MSŠ „Hazim Šabanović“, Sportske igre mladih, Međunarodni rukometni turnir šampiona u organizaciji RK „Bosna“, 7. otvoreno karate

prvenstvo u organizaciji KK „Visoko“, Međunarodni turnir u kuglanju za slijepa i slabovidna lica, Državno prvenstvo BiH u ritmičkoj gimnastici u organizaciji KRG „Visoko“. U prostoru dvorane Održan je Centralni predizborni skup SDA Visoko, te Sajam „Jesen u Visokom 2014“.

## JKP „GRADSKA GROBLJA“ D.O.O. VISOKO

Javno komunalno preduzeće „Gradska groblja“ d.o.o. Visoko je u periodu januar - decembar 2014. godine obavljalo poslove iz okvira registriranih djelatnosti, koje se odnose na pružanje komunalnih usluga od javnog interesa, a tiču se zadovoljavanja onih potreba urbanog društva koje su nezamjenjiv uslov života i rada građana, državnih organa, privrednih i drugih subjekata, kao i one djelatnosti koje doprinose uspješnom obavljanju djelatnosti od posebnog društvenog ili javnog interesa.

Vršene su aktivnosti na obavljanju pogrebnih i pratećih djelatnosti, uređenju i održavanju gradskog groblja, te redovnom održavanju javnih zelenih površina u skladu sa usvojenim Programom komunalnih djelatnosti za 2014. godinu.

Kao i u ranijim godinama, JKP „Gradska groblja“ d.o.o. Visoko je



povjereno organiziranje zajedničkog ukopa žrtava genocida u Memorijalnom centru „Srebrenica-Potočari“, te je u 2014. godini izvršen zajednički ukop za 175 žrtava genocida sa područja općine Srebrenica.

Dana 12.05.2014. godine, Rješenjem Općinskog suda u Zenici broj: 43 0 St 100487 13 St, otvoren je stečajni postupak nad Javnim komunalnim preduzećem „Gradska groblja“ d.o.o. Visoko.

Cijeneći značaj ovog javnog komunalnog preduzeća, intencija otvaranja stečajnog postupka jeste provesti nužan postupak prestrukturiranja, revitalizacije i konsolidacije poslovanja, sa utvrđivanjem prioriteta koji se odnose na neupitnost daljeg obavljanja djelatnosti. U tom smislu, dalji angažman ovog javnog komunalnog preduzeća u pružanju komunalnih usluga nije doveden u pitanje. Preduzeće i dalje obavlja sve komunalne djelatnosti radi kojih je osnovano.

## JAVNA USTANOVA „DOM ZDRAVLJA“ VISOKO

U Javnoj ustanovi „Dom zdravlja“ Visoko u 2014. godini otvoren je Centar za mentalno zdravlje u okviru projekta Federalnog ministarstva zdravstva.

Otvorena stomatološka ordinacija u ambulanti porodične medicine TIKa – Moštre, te Centar za rani rast i razvoj djece, koji je opremljen adekvatnom opremom i obavljena je edukacija kadra.

Izvršena je zamjena RTG cijevi vlastitim sredstvima u vrijednosti od 30.000,00 KM.

Higijensko-epidemiološka služba je za vrijeme trajanja elementarnih nepogoda provodila sve potrebne aktivnosti u koordinaciji sa Općinskim štabom Civilne zaštite, Kantonalnim zavodom za javno zdravstvo i Kantonalnim ministarstvom zdravstva.

Imenovan je novi direktor JU "Dom zdravlja" Visoko, dr. Senad Karavdić.

Kupljeno je terensko vozilo za potrebe prevoza bolesnika na hemodijalizu.

Federalno ministarstvo zdravstva je uručilo donaciju računarske opreme, kao i namještaj i opremu za dvije ambulante porodične medicine.

U Ambulanti porodične medicine Moštre izvršena je podjela prvih elektronskih zdravstvenih kartica za određeni broj pacijenata.

Obavljena je edukacija za 30 ljekara i medicinskih tehničara u JU „Dom zdravlja“ Visoko iz kardiopulmonalne reanimacije od strane specijalista urgentne medicine.



Obavljena je planska jesenja deratizacija u saradnji sa Zavodom za javno zdravstvo Ze-do kantona.

JU „Dom zdravlja“ Visoko je za 10 pripravnika zdravstvene struke omogućila obavljanje pripravničkog staža.

Formiran je intersektoralni tim u cilju uspostave novih i jačanja postojećih aktivnosti sa fokusom na djecu s invaliditetom.

Potpisan je ugovor između AKAZ (Agencija za kvalitet i akreditaciju u zdravstvu u FBiH) i Zavoda zdravstvenog osiguranja ZDK kojim je dogovorena edukacija za odabrane timove porodične medicine Ze-do kantona.

Ostvaren je veliki broj posjeta ovoj ustanovi, kako od strane predstavnika Federalnog ministarstva zdravstva, Kantonalnog zavoda za javno zdravstvo, Kantonalnog ministarstva zdravstva, tako i od načelnice Općine sa saradnicima, novim imenovanog ambasadora Republike Turske u BiH, nj.e. Čihad Erginay-a, te većeg broja domaćih i inostranih predstavnika humanitarnih i nevladinih organizacija, kao i predstavnika farmaceutskih kuća.

Formiran je novi cjenovnik za cijene ljekarskih uvjerenja čime su dosadašnje cijene pojedinih usluga izjednačene ili niže u odnosu na susjedne zdravstvene ustanove.




## JP „VETERINARSKA STANICA VISOKO“ D.O.O. VISOKO

JP „Veterinarska stanica Visoko“ u 2014. godini pored svojih redovnih aktivnosti, zbog pojave nekoliko zaraznih bolesti poseban akcent usmjerila je na preventivno djelovanje i zaštitu stanovništva i životinja na području općine Visoko.

Povećane su preventivne aktivnosti na terenu s ciljem sprječavanja širenja bruceloze na našu općinu, kao i broj dijagnostički ispitanih životinja. Sve životinje su pokazale negativan rezultat na prisustvo bruceloze.

Kako u protekle dvije godine nije bilo sterilizacije pasa lualica, evidentiran je povećan broj ovih životinja, te stoga i broj napada na ljude. Od početka 2014. bilo je 5 napada pasa lualica na stada ovaca, gdje je preko 50 ovaca stradalo. S tim u vezi pokrenuti su pregovori sa engleskom organizacijom za zaštitu životinja „Dogs Trust“ oko organiziranja sterilizacije pasa na području naše općine.

Na području općine Visoko postoje privredni subjekti koji se bave pro-



izvodnjom suhomesnatih proizvoda. Svi registrovani proizvođači su pod nadzorom veterinarske stanice, te se u vezi s tim vrši kontrolisano odlaganje otpada u saradnji sa komunalnim preduzećem.

Najveći problem predstavljaju neregistrirani proizvođači, te nesavjesni građani koji bacaju smeće na divlje deponije. Stvaranjem divljih deponija dolazi i do povećanog broja životinja koje tu traže hranu. Zbog djelovanja vremenskih prilika takve deponije postaju izvor zaraze, uzimajući u obzir da životinje predstavljaju dodatnu opasnost od širenja zaraze.

U saradnji sa Udruženjem „Behar“ izvršen je redovni pregled pčelinjaka i ispitivanje na nozemozu, varou i američku gnjiloću. Pregledano je 25 pčelinjaka (oko 300 košnica). Ispostavilo se da je nekoliko pčelinjaka zaraženo nozemozom, što je rezultat loših vremenskih uslova u proljeće. Zalaganjem pčelara i uposlenika JP „Veterinarska stanica Visoko“ većina oboljelih pčelinjaka je sanirana, te izliječena od nozemoze.

Pojačane DDD mjere izvršene su kod svih proizvođača namirnica animalnog porijekla, a koje se nalaze u blizini tokova rijeka.

## JAVNO PREDUZEĆE „VISOKO EKOENERGIJA“ D.O.O VISOKO

U toku prvih pet mjeseci 2014. godine snabdijevanje stanovništva općine Visoko i industrije gasom bilo je uredno, bez prekida i bilo kakvih tehničkih problema, a naši korisnici potrošili su 2.332.806 Sm<sup>3</sup> gasa što je u odnosu na isti period u 2013.godini, kada je potrošeno 2.451.344 Sm<sup>3</sup> gasa manje za 118.538 Sm<sup>3</sup> gasa ili za 5,08 %. Osnovni razlog ovog smanjenja potrošnje gasa je znatno blaža zima u odnosu na 2013. godinu.

JP Visoko Ekoenergija d.o.o Visoko je u ovom periodu radilo na projektu MHE na rijekama Bosni i Fojnici,



a urađena je prethodna studija o istraživanju potencijala za gradnju MHE na području općine Visoko, rijeka Bosna - Geodetski snimak

profila (situacija 1:200, poprečni presjeci na svakih 100 metara i uzdužni presjek na svih 21.276 m toka u općini Visoko), a rijeka Fojnica

- Geodetski snimak profila (situacija 1:200, poprečni presjeci na svakih 100 metara i uzdužni presjek na svih 12.500 metara toka u općini Visoko) i Predstudija opravdanosti hidroenergetskog korištenja vodotoka Fojničke rijeke na području općine Visoko.

Na 17. sjednici Općinskog vijeća Visoko donesena je Odluka o utvrđivanju postojanja javnog interesa općine Visoko za izgradnju elektroenergetskih objekata na rijeci Bosni na području općine Visoko, i na osnovu ove Odluke i pomenute prethodne studije, poslan je zahtjev za dodjelu Koncesije za

izgradnju MHE na rijeci Bosni na području općine Visoko, koji je upućen Federalnom ministarstvu energije, rudarstva i industrije na ruke ministra gospodina Erdal Trhulja.

Intezivno se radilo na sanaciji stanja i tehničkom poboljšanju uslova rada na predajniku Kruščica, te je iskrčeno rastinje unutar i oko kruga predajnika Kruščica i rastinje na putu dužine oko 800 metara koji vodi ka ovom objektu, zatim je saniran put i osposobljen za prilaz sa običnim putničkim vozilom. Ugrađeno je i izrađeno 85 metara ograde oko objekta, postavljen video nadzor, potpuna

sanacija elektro opreme u objektu i rješavanje problema hlađenja objekta, urađen je Glavni projekat električnih instalacija, vatrodjave i gromobrnska instalacija, urađen je i Geodetski elaborat – Ažurna geodetska podloga antenskog stuba Kruščice, a trenutno je u toku obnavljanje Ugovora sa korisnicima predajnika Kruščica.

Započeti su razgovori u vezi izrade Projekta za izgradnju fotonaponske elektrane snage 10 kW i izradi studije o potrebama, mogućnostima i ekonomskoj opravdanosti uvođenja prirodnog gasa kao goriva za pogon vozila na području općine Visoko.

## JP „RADIO I TELEVIZIJA VISOKO“ D.O.O. VISOKO

U okviru RTV Visoko organizirane su dvije radne jedinice: Radio Visoko i Televizija Visoko.

U 2014 godini Televizija Visoko je realizirala informativnu emisiju „Aktuelnosti“ kao i tematske emisije „Drugo poluvrijeme“, „Albatros“, „Mjesne zajednice“, „Vi rahat look“, „U društvu sa...“ i „Zdrav život i ekologija“. Na programu Televizije Visoko zastupljeni su i programski sadržaji produkcijskih kuća kao što su: „Naša realnost“, „Tv liberty“ i „Putopisi“. U okviru sportskih sezona emitiraju se komentatorske utakmice NK „Bosna“ i RK „Bosna“ na domaćem terenu.

U 2014. godini na programu TV Visoko uvedeni su i novi programski sadržaji: EU integracije BiH (desetominutni dokumentarni filmovi o životu u Evropskoj uniji). U saradnji s Produkcijom Visoki emitira se serijal dokumentarnih filmova o prirodnim ljepotama BiH: „Osjećam se k'o da sam u raj“, „Kraška polja“, „Okolište-neolitska metropola“, „Duvanjsko



polje- početak ili kraj jedne zemlje“...

U saradnji s Turističkom zajednicom ZDK, Uredom u Visokom, zastupljeni su promotivni spotovi Visokog, kao i ostalih općina u Kantonu. Novost je i emitiranje mjesečnog magazina TV Justice (pregled najznačajnijih suđenja za ratne zločine pred Sudom BiH), kao i serijal „Naša snaga“ Ministarstva odbrane BiH.

U saradnji s prof. dr. Enverom Imamovićem emitiran je serijal emisija o srednjovjekovnoj državi Bosni i dinastiji Kotromanić. RTV Visoko je aktivno pratila aktivnosti

Općinskog štaba Civilne zaštite Visoko tokom poplava koje su zahvatile BiH. U pripremi su emisije o srednjovjekovnim lokalitetima na području Visokog: Stari grad Visoki, krunidbeno mjesto bosanskih kraljeva Mili, crkva Kulina bana u Muhašinovićima i kraljevski dvor u Moštru. Uspješno su realizovani projekti: Ramazanski program, zatim program povodom Bajrama, te Visočko ljeto.

Uspješno je realizovan projekat „Opći izbori 2014“ - svakodnevne emisije Izborna hronika, Debate i komercijalni dio oglašavanja.

Kamere TV Visoko su popratile „Dane organske proizvodnje“, sajam „Jesen u Visokom“, manifestaciju „Dani Zaima Muzaferije“. U cilju prevazilaženja teške finansijske situacije ponovo je pokrenut serijal „BH gradovi“ na komercijalnoj osnovi. Realizovan je „Božićni

program“ i razmjenom obezbjeđen Novogodišnji program.

Radio Visoko je u toku 2014. godine realizovao i „Vijesti“ koje se baziraju isključivo na sadržajima iz Visokog i o Visokom, zatim rubrike „Jutarnji servis“, „Mali oglasi i obavještenja“ i

„Kuhajmo zajedno“, radijsko izdanje „Aktuelnosti“, kao i emisije „Muzički portret“, „Duh Islama“, „Prođoh Bosnom kroz gradove“ i „Generacija dom“. Radio Visoko je također aktivno pratio Izborno kampanju za vrijeme održavanja „Općih izbora 2014“.

## JAVNO KOMUNALNO PREDUZEĆE „VISOKO“ D.O.O. VISOKO

JKP „Visoko“ d.o.o. Visoko u toku 2014. godine u kontinuitetu je obavljalo svoje funkcije u oblastima vodosnadbijevanja, kanizacionih sistema, oblasti odvoza, prikupljanja i transporta komunalnog i industrijskog otpada i oblasti čistoće.

Na izvorištu "Vrutak" rađeno je na glavnim pumpnim postrojenjima i na sistemu za hlorisanje. Obavljeni su radovi na automatskom upravljanju - "SCADA" sistemu. Detektirani su kvarovi, te je rađeno saniranje istih.

Ažurirana je evidencija korisnika. Izvođeni su radovi na uređajima za regulaciju pritiska, kao i zamjeni neispravnih vodomjera. Sve aktivnosti se obavljaju u kontinuitetu, kao i izrada tehničkih rješenja sa svim fazama rada za gradske ulice, te priprema za rekonstrukciju planiranih ulica.

JKP „Visoko“ brine se da cjelokupan sistem bude u funkciji, posebno nakon zimskog perioda, a prije generalnog pranja ulica i trotoara vrši se plansko čišćenje kanalizacije, svih slivnih rešetki, svih revizionih okana, svih cjevovoda sa usisavanjem materijala, nakon čega se vrši generalno pranje.

JKP „Visoko“ izrađuje improvizovane rešetke, s ciljem zaštite života i zdravlja ljudi, kao i materijalnih dobara, sanira i rekonstruiše slivnike koji nisu u funkciji, te vrši manje planske rekonstrukcije u cilju poboljšanja funkcionisanja sistema.



JKP „Visoko“, iako u teškoj ekonomskoj situaciji zbog niza objektivnih okolnosti, sve svoje funkcije u potpunosti i na vrijeme obavlja.

Vodovodni sistem je prije poplava, u toku poplava, kao i poslije poplava u potpunosti funkcionisao bez problema. Što je i najvažnije, voda je u kontinuitetu bila kvalitetna za piće.

Kanizacioni sistem funkcioniše bez problema, iako je intenzivirana krađa slivnih rešetki i poklopaca koja je dodatno ugrožavala funkcionisanje sistema.

Odvoz smeća je u kontinuitetu tekao bez prekida. Radovi na čistoći ulica i trotoara su obavljani prema zahtjevu naručioca Općine i Civilne zaštite - izvršeni su kvalitetno i na vrijeme.

JKP „Visoko“ je intenziviralo radove nakon poplava - za spašavanje kuća, zatim uradilo pripreme radove za porušeni most u naselju Uvorići, istražne radnje za saniranje klizišta, odnosno čišćenje terena od smeća u naselju Klisa.

Izvršeni su radovi na Kolektoru, te polaganje zaštitnih cijevi za elektro i signalne kablove. Nakon ovih radova izvršeno je popločavanje pješačke staze iznad Kolektora. Urađene su pripreme radnje - sliv rijeke Radovaljke, za testiranje bunara od aeroderoma i uzimanje uzoraka za analizu vode. Vršeno saniranje kvarova u ulicama u kojima nisu zamijenjene dotrajale cijevi, kao i prikaz cijevi na kojima dolazi do istjecanja vode u zemlju. Potrebno je nastaviti rekonstrukciju po planu, kako bi vodosnadbijevanje bilo kvalitetnije, i smanjili gubici vode. Izrađen je Muhašinovički potok kroz krug Asfaltgradnje, u cilju zaštite od poplava, kao i saniranje Muhašinovičkog potoka iznad autoputa. Očišćena je hala u privrednoj zoni Topuzovo polje, i izvedeni radovi na priključku vodovoda i kanalizacije, kao i drenažnog odvoda na objektu Multimedijskog centra u naselju Prijeko.



## SASTANAK SA PREDsjedNIKOM ZADRUŽNOG SAVEZA FBIH

Općinska načelnica Amra Babić održala je sastanak u kojem su prisustvovali predsjednik Zadružnog saveza FBiH Husein Hasić, glavni zadružni revizor Nagib Hadžić, direktor Zemljoradničke zadruge „Visoko“ Genjac Sabrija i Općinski pravobranilac Melina Hodžić Travančić. Povod ovom sastanku bio je sačinjeni Izvještaj o vanrednoj zadružnoj reviziji u Zemljoradničkoj zadruzi „Visoko“, te mogućnosti

nastavka poslovanja Zemljoradničke zadruge „Visoko“ u budućem periodu. Također, na sastanku je razgovarano o obavezi postupanja Zemljoradničke zadruge „Visoko“ u skladu sa Uputstvima iznesenim u nalazu glavnog zadružnog revizora, te je donesen zaključak da se do donošenja konačne odluke o mogućnostima i uvjetima nastavka poslovanja Zemljoradničke zadruge „Visoko“ zaustavi otuđivanje zadružne imovine.

## OPĆINA VISOKO, MUSLIM AID I BIOS POTPISALI UGOVOR SA 25 KORISNIKA PLASTENIKA

Općini Visoko je potpisan ugovor sa humanitarnom organizacijom Muslim Aid BiH, Opštom zadrugom BIOS i 25 korisnika plastenika.

Riječ je o zaključivanju Ugovora o međusobnim pravcima i obavezama ugovorenih strana u realizaciji projekta “Plastenička proizvodnja kao pomoć poboljšanju finansijskog stanja dijela socijalno ugroženih porodica na teritoriji općine Visoko”. Korisnicima su podijeljeni certifikati kojima se potvrđuje osposobljenost za rad.

Načelnica Babić je istakla da je ovim ugovorom obaveza Opšte zadruge BIOS da otkupi sve proizvedene viškove, a to je pravi motiv za rad i dobra injekcija kućnim budžetima.

“Ovaj projekt je dobar način doprinosa razvoju proizvodnje i podsticanja pojedinca da vlastitim zalaganjem stvore radno mjesto, te tako osiguraju finansijske prihode sebi i svojim porodicama”, rekla je načelnica Babić.





## FORMIRANI PRIVREDNI I POLJOPRIVREDNI SAVJETI

**O**držana je prva sjednica novoformiranih savjeta Općinske načelnice - Privrednog i Poljoprivrednog savjeta, a cilj sastanka je bio da se sa predstavnicima privatnog sektora uspostavi stabilna, dugoročna i kvalitetna saradnja koja će poticati i biti pokretač razvoja općine i stvaranja boljeg poslovnog okruženja.

Privredni savjet je radno i savjetodavno tijelo čiji je osnovni zadatak razmatranje pitanja vezanih za privredu i donošenje prijedloga i smjernica za poboljšanje privrednog i investicionog ambijenta u općini Visoko.

Privredni savjet čine: Malik Čabaravdić (predsjednik), Mustafa Uzunalić, Amir Zukić, Šukrija Čakić, Elvedina Semić, Rusmir Hrvić, Vildana Džafić, Madžid Avdagić, Alija Bojčić, Fuad Kadić, Izet Smajević i Suada Koljenović, tehničko lice Savjeta.

Poljoprivredni savjet je savjetodavno tijelo čiji je osnovni zadatak razmatranje pitanja vezanih za poljoprivredu, donošenje prijedloga i smjernica za poboljšanje stanja u ovoj oblasti. Poljoprivredni savjet čine: Nermin Kadrić (predsjednik), Refik Kurgaš, Mersid Dervišbegović, Edin Zukan, Sulejman Selimović i Amira Džafić, tehničko lice Savjeta.

## ODRŽAN SEMINAR O ORGANSKOJ PROIZVODNJI

**U** Općini Visoko od 8. do 10. septembra 2014. godine održavao se seminar iz oblasti organske proizvodnje. Predavači su bili stručnjaci iz oblasti poljoprivrede, Nezir Tanović, profesor sa Agromediteranskog fakulteta u Mostaru, mr. Omer Kurtović, direktor Federalnog zavoda za poljoprivredu i mr. Ahmedin Salčinović.

Cilj seminara bio je jačanje svijesti o značaju organske proizvodnje, kao i načinu pristupanja organskoj proizvodnji i certifikacije organskih proizvoda. Predavač, prof. Tanović je rekao da je organska proizvodnja jedan od rijetkih potencijala i resursa u kojima Visoko kao i Bosna i Hercegovina, ima prednosti.

„Ovim seminarom želimo podučiti ljude šta znači organska proizvodnja u ekološkom, ekonomskom i zdravstvenom aspektu, te da ih uputimo na nužnost standardizacije i posebno značaj certifikacije organskih proizvoda koji se plasiraju na tržište“, naglasio je tom prilikom prof. Nezir Tanović.





## IZLOŽBENO-PRODAJNI SAJAM "DANI ORGANSKE PROIZVODNJE"

U organizaciji Saveza udruženja organskih proizvođača ORGANSKO FBiH, a pod pokroviteljstvom Općine Visoko, u ulici Alije Izetbegovića otvoren je izložbeno-prodajni sajam "Dani organske proizvodnje".

Na sajmu je učestvovalo 26 proizvođača, a na ovoj tradicionalnoj, osmoj po redu manifestaciji, posjetitelji i kupci su mogli, pored visočkih proizvoda, pronaći na štandovima i proizvode iz Bosanske Krupe, Bihaća i drugih gradova Federacije BiH.

Prilikom otvaranja sajma prisutnima se obratio predsjednik Saveza udruženja organskih proizvođača FBiH, Sejad Herceg, koji je istakao da je ova manifestacija doprinijela razvoju organske proizvodnje i u Visokom, te da pruža priliku proizvođačima da predstave svoje proizvode i podijele iskustva o uzgajanju organskih proizvoda.

Na ceremoniji otvaranja uručena je zahvalnica Općini Visoko za pokroviteljstvo Sajma i priznanje firmi "MOBIS PHARM" za postignute rezultate u organskoj proizvodnji.



## ODRŽANO PREDAVANJE O UZGOJU JAGODIČASTOG VOĆA

Predavanje na temu "Uzgoj i prednosti uzgoja jagodičastog voća", održano je u Općini Visoko pod pokroviteljstvom "Službe za finansije, privredu i lokalni ekonomski razvoj" Općine Visoko, a u saradnji sa firmama "BIOS" i "Frutti - funghi". Teorijsku edukaciju je održao mr. sc. Adnan Maličević sa Poljoprivredno-prehrambenog fakulteta Univerziteta u Sarajevu, najavivši da bi jagodičasto voće moglo biti perspektiva razvoja općine Visoko.



## POLJOPRIVREDNO-PREHRAMBENI SAJAM "JESEN U VISOKOM"

Jubilarni, 10. po redu izložbeno-prodajni sajam poljoprivredno-prehrambenih proizvoda "Jesen u Visokom" ponudio je posjetiteljima osim proizvoda, predavanja, i bogat kulturno-umjetnički program.

Izlagачi su ponudili proizvode od mlijeka, voća i povrća, zatim med, ljekovito bilje, čajeve, suhomesnate proizvode, rukotvorine, te razne ukrasne predmete. Na sajmu su predstavljena 53 izlagачa iz Visokog, Breze, Banja Luke, Novog Travnika, Višegrada, Gradačca, Vareša, Kaknja, Zavidovića, Sarajeva, Sanskog Mosta, Olova, Bihaća, Mostara, Janje...

Sajam su svečano otvorili načelnica Općine Visoko Amra Babić i ministar poljoprivrede, šumarstva i vodoprivrede Zeničko-dobojskog kantona, Bojan Bošnjak.

U kulturno-zabavnom dijelu otvaranja manifestacije, prisutni su uživali u muzičkim nastupima Farisa Pinje i Tarika Begića, djece iz JU za predškolski odgoj i obrazovanje, kao i folklorne sekcije KUD "Visoko".

Na Sajmu je upriličena i nagradna igra- Izbor najtežih poljoprivrednih proizvoda- kultura i to za 4 kategorije: najteži krompir, mrkva, tikva i kupus.

Sva tri dana trajanja Sajma održavana su i edukativna predavanja poljoprivredno-privredne tematike, kao i radionice za izradu rukotvorina koje su upriličile žene iz visočkih udruženja žena - „Pokret zlatne ruke“, „Nit života“ i „Mozaik“. Sajam je uljepšan i nastupom muzičke grupe "Urban sevdah".

Organizator manifestacije bila je Općina Visoko, a pokrovitelj Ministarstvo poljoprivrede, vodoprivrede i šumarstva ZDK. Sponzori sajma bila su visočka preduzeća "Bios", "Frutti Funghi", "Voćar-Piramida" i "Ideal".



## AKTIVNOSTI NA IZRADI MONOGRAFIJE 3. KORPUSA ARMIJE R BiH

Općinska načelnica Amra Babić održala je sastanak s generalom Sakibom Mahmuljinom i predsjednikom Saveza ratnih vojnih invalida Zeničko-dobojskog kantona, Benjaminom Predžićem. Također, ovom sastanku prisustvovao je i predsjednik Organizacije RVI Visoko '92 i predsjedavajući Koordinacionog odbora boračkih organizacija Visoko Hajrudin Brotlija. Cilj sastanka je bio upoznati načelnicu Amru Babić s aktivnostima na izradi Monografije Trećeg korpusa Armije RBiH. Tokom sastanka analizirane su dosadašnje aktivnosti na izradi monografije, te definirane smjernice za promociju iste u Visokom.



## UPRILIČENA PROMOCIJA KNJIGE "RUSKI I GRČKI PLAĆENICI U BiH"



Povodom 15. aprila, Dana Armije RBiH u organizaciji Zavičajnog muzeja Visoko, u Velikoj sali Općine Visoko upriličena je promocija knjige penzionisanog majora Aziza Tafre pod nazivom "Ruski i grčki plaćenici u ratu u BiH". Promotori knjige bili su prof. Senad J. Hodović, prof.dr. Nedžad Ajnadžić, a moderator mr. Adil Žigić. Autor je istakao da je ovo prva knjiga koja detaljno razrađuje tematiku pomenutih plaćenika u ratu u BiH, te da je cilj knjige da se rasvijetli cijeli niz događaja koji su se dešavali tokom rata 92-95. oko dobrovoljaca koji su dolazili ratovati u BiH.

## PROMOCIJA KNJIGE "GENOCID NAD BOŠNJACIMA 1992-1995."

U Općini Visoko održana je promocija knjige "Genocid nad Bošnjacima 1992-1995.". Promociju je organizovao Osnovni odbor "Mladi Muslimani" iz Visokog. Zbornik radova pod nazivom „Genocid nad Bošnjacima 1992–1995.“ nastao je kao rezultat okruglog stola održanog u Sarajevu 22. decembra 2012. godine, i u njemu se uglavnom nalaze članci koji obrađuju zločin, agresiju i genocid koji je počinjen nad Bošnjacima od strane srpskog agresora. Promotori knjige bili su Anes Džunuzović i prof. dr. Džemal Najetović.

## ODRŽANA PROMOCIJA KNJIGE "GENOCID U AHMIĆIMA 1993."

Održana je promocija knjige "Genocid u Ahmićima 1993.", autora doc. dr. Rasima Muratovića, a promotori su bili prof. dr. Smail Čekić, prof.dr. Rasim Muratović i predsjednik Skupštine Udruženja žrtava rata 92- 95. "16. april" Bahtija Ahmić. Autor je istakao da su zločini nad Bošnjacima u Ahmićima, 16. aprila 1993. godine, izvršeni organizirano i sistematski, i da je ono što se dogodilo u Ahmićima ušlo u historiju kao jedna od najstrašnijih ilustracija nečovječnosti i jedan od najstravičnijih zločina počinjenih nad Bošnjacima.



## PROMOVIRANA KNJIGA BAJRE PERVA "RIJEČ PO RIJEČ"



Novinar, publicista i urednik Bajro Perva je u organizaciji Općine Visoko i JU Gradska biblioteka Visoko, u Velikoj sali Općine Visoko promovirao svoju knjigu "Riječ po riječ". Kroz najinteresantniju formu u novinarstvu, intervju, autor je čitateljima predstavio sugovornike i različite teme iz društvene zbilje. S ukupno 75 intervju knjiga predstavlja skup misli ljudi različitih profila: akademikima, pčelarima, književnicima, načelnicima, ljudima s četiri razreda osnovne škole, kao i sa običnim građanima. Bajro Perva je na promociji rekao da knjiga predstavlja realnost u kojoj živimo. Autor je također govorio i o načelnici Amri Babić čiji je intervju uvršten u ovu zbirku. Promotori knjige su bili još i prof. dr. Jusuf Ramić, profesor emeritus sa Fakulteta islamskih nauka iz Sarajeva, te Mensur ef. Pašalić, predsjednik Ilmije u BiH.

## OTVORENA GALERIJA „FUAD ŠEČEROVIĆ MMXIV“

U Visokom je otvorena umjetnička galerija "Fuad Šečerović MMXIV", u kojoj su predstavljena djela nastala dugogodišnjim radom profesora Šečerovića.

Na svečanom otvorenju Galerije profesor Šečerović zahvalio se svima koji su mu pomogli u realizaciji ovog projekta. Predstavljani su izložci koji su nastajali od 1965. godine: skulpture u željezu i korijenu drveta, rezbarija u drvetu, kamenu i metalu, levhe i heraldika srednjovjekovne Bosne. Izuzetno bogatu kolekciju eksponata svi zainteresirani mogu pogledati u Galeriji koja se nalazi u visočkom naselju Gornje Rosulje.



## ODRŽANA PROMOCIJA KNJIGE "INAT BOSANSKOG GOLUBA"



Općini Visoko je povodom obilježavanja 25. novembra- Dana državnosti BiH, a u organizaciji JU „Gradska biblioteka“ Visoko, upriličena promocija romana „Inat bosanskog goluba“ autora Muhameda Mahmutovića, novinara, kolumniste i književnika. Promotori su bili prof.dr. Safvet Halilović, prof.dr. Selma Rizvić i Sejfudin Tokić, predsjednik Bošnjačkog pokreta za ravnopravnost naroda. Govorili su o važnim segmentima u životu i djelu autora, kao i o metodologiji kojom je ovo djelo stvarano. Autor je uz knjigu "Inat bosanskog goluba" napisao i "Bogatstvo beskućnika", "Pokošeni cvjetovi Krajine", "Pacijenti".



## ODRŽANA MANIFESTACIJA „VISOČKO LJETO 2014“

Dani trgovine, u okviru manifestacije „Visočko ljeto 2014“ trajali su od 30. jula do 5. augusta, okupivši brojne trgovce ali i hiljade posjetilaca iz raznih krajeva Bosne i Hercegovine. Drugi dio manifestacije, kulturno zabavni i sportski program „Visočkog ljeta 2014“ održan je u periodu od 25. do 29. augusta.

Dani kulture i sporta otvoreni su prodajno-edukativnom izložbom članica visočkih udruženja „Mozaik“, „Nit života“, „Visočke sevdalije“ i „Pokret zlatne ruke“ te likovnom kolonijom „Ada“.

U okviru ove manifestacije nastup su imala djeca iz JU za predškolski odgoj i obrazovanje, zatim KUD Visoko sa gostima, održana je i „Noć duhovne muzike“, a nastupe su imali Adnan Jakupović, Denijal Ahmetović, Armin Muzaferija, te Urban sevdah bend i Heaven bend.

Predstavljene su knjige „Tračko ime Bosna i Tračani u Bosni“ i „Gotizmi i Ilirizmi u Kulinovoj povelji“, koje su dio naučno-istraživačkog projekta „Predslavenski korijeni Bošnjaka“ autora Ibrahima Pašića.

U okviru manifestacije održana je promocija bosanske kuhinje i tradicije, zatim pozorišne predstave „Čekajući Godoa“ UG Teatar „Total“ Visoko, „Bio je lijep i sunčan dan“ teatar „SARTR“, „Islamofobija ili smijem li reći ko sam“ Udruženja mladih ljubitelja scenskih umjetnosti „Confero“.

Najmlađi su uživali u igrano-animiranom 3D filmu „Nindža kornjače“.

Posjetioци su također imali priliku prisustvovati predstavljanju Općine Altindag.

Sportski program „Visočkog ljeta 2014“ upotpunila je promocija konjičkih sportova, basket turnir, međunarodni turnir u fudbalu, turnir u šahu za slijepe i slabovidne, takmičenje u stonom tenisu za osobe sa invaliditetom, fudbalski turnir „Jusuf ef. Trgo“, memorijalni turnir u malom nogometu „Jusuf Skopljak - Sesa - Lazo“, turnir u streljaštvu, šahovski turnir invalidnih osoba ZDK, ritmička gimnastika, te je održana i noć posvećena karateu i taekwondou.





## ODRŽANA MANIFESTACIJA „DANI ZAIMA MUZAFERIJE“

U Visokom je od 27. do 29.11.2014. godine održana manifestacija „Dani Zaima Muzaferije“ koju je organiziralo Udruženje građana „Ars-tragovi“.

“Dani Zaima Muzaferije” tradicionalno se održavaju kako bi se očuvala uspomena na ovog velikog glumca, ali i da bi se podstakle druge sredine u BiH, da po uzoru na Visoko naprave manifestacije u čast svojih značajnih sugrađana.

Poznati glumac Mustafa Nadarević je u Zavičajnom muzeju Visoko svečano otvorio 11. “Dane Zaima Muzaferije”, te istakao da je srećan zbog ovog događaja koji čuva uspomenu na velikog glumca i umjetnika.

Nakon svečanog otvorenja manifestacije, posjetitelji su imali priliku pogledati dvije predstave, te izložbu crteža. Teatar „Total“ (koji je Zaim Muzaferija utemeljio 1954. godine) premijerno je izveo predstavu Slavomira Mrožeka “Policajci”, u režiji Jasenka Muzaferije. Prikazana je i predstava “Bajka koju idiot priča” Kamernog teatra 55, u režiji Emira Kapetanovića. Posjetitelji manifestacije pogledali su oko 30 crteža velikog umjetnika Ismeta Mujezinovića iz fundusa Umjetničke galerije Bosne i Hercegovine.





## SVEČANO OTVORENA NOVA KUGLANA U KSC "MLADOST"

**N**ova, renovirana kuglana svečano je otvorena u sklopu KSC "Mladost". Kuglanu je otvorila načelnica Amra Babić, a svečanosti je prisustvovao i kuglaški klub "Medveščak" iz Hrvatske, kao i trostruki svjetski prvak u kuglanju, Nikola Dragaš.

Predstavnici KK "Bosna" Visoko zahvalili su načelnici Babić na podršci koju je Općina Visoko pružila kuglaškom klubu, te također na učešću Općine Visoko u projektu modernizacije kuglane u iznosu od 22.000 KM.

Uručene su zahvalnice svim donatorima koji su pomogli izgradnju nove kuglane, a zatim je uslijedilo odigravanje prijateljskog meča između KK "Bosna" i KK "Medveščak".

Općinska načelnica je predstavnicima kluba čestitala na dosadašnjim sportskim uspjesima i afirmaciji Visokog, kao i uspješno završenoj realizaciji ovog veoma značajnog projekta.



## Visočkim ulicama prošli takmičari utrke sarajevo grand prix 2014

**U** okviru Sarajevo Grand Prix 2014, biciklističke utrke koja se održala u sklopu obilježavanja 100. godišnjice od početka Prvog svjetskog rata, visočkim ulicama prošlo je oko 140 takmičara iz preko 20 zemalja svijeta, među kojima i šampioni Tour de France. Učesnici utrke su došli iz pravca Ilijaša-Vratnice, zatim preko Betonskog mosta, vozili su ulicom Alije Izetbegovića, Tabhanskom, ulicom Kralja Tvrtka, Mule Hodžića i dalje u pravcu Kiseljaka. Mjesto završetka utrke bilo je plato ispred zgrade Parlamentarne skupštine u Sarajevu.





## OBILJEŽENA MANIFESTACIJA "POZDRAV PROLJEĆU 2014"

Načelnica Amra Babić je prisustvovala manifestaciji "Pozdrav proljeću 2014". Tom prilikom joj je uručena članska karta Odreda izviđača "Visoko", kao i dio izviđačke opreme. Povodom obilježavanja ove manifestacije održana je i akcija na sportskim terenima stadiona Luke na koju se odazvala većina sportskih klubova iz Visokog, a podržala ju je i načelnica Babić. U toku akcije je renoviran košarkaški teren i očišćen rukometni teren.



## Održano 1. Državno prvenstvo BiH u ritmičkoj gimnastici

U organizaciji Gimnastičkog saveza BiH i kluba ritmičke gimnastike "Visoko", a pod pokroviteljstvom Općine Visoko i Vlade ZDK, u KSC "Mladost" u Visokom održano je 1. Državno prvenstvo BiH u ritmičkoj gimnastici. Prvenstvo je otvorila prof.dr. Snežana Bijelić, predsjednica Gimnastičkog saveza BiH, istaknuvši da je ovo prvi put da se takmičenje održava na zajedničkom nivou pod pokroviteljstvom jedinstvenog državnog saveza.

Na takmičenju su učestvovali klubovi iz Banja Luke (Allegro), Tuzle (Sloboda), Visokog (Visoko) i Sarajeva (Bosna Gym, Hana - Semizovac, Željezničar - Moštre, Arabesque, Victoria i Olimpik). Učesnice su se takmičile u A, B i C programu i grupnim vježbama.





## U VISOKOM ODRŽANE SPORTSKE IGRE MLADIH

Četvrte Sportske igre mladih uz moto „Fer igra za fer djetinjstvo“, održane su i u Visokom kao i u 24 bh. grada, a u saradnji sa Košarkaškim savezom Bosne i hercegovine, uz finansijsku podršku USAID-a.

Sportske igre mladih u KSC Mladost u Visokom otvorila je načelnica Amra Babić, a Općina Visoko je po drugi put bila pokrovitelj ove najveće sportske manifestacije u državi koja se održala i u našem gradu. Takmičenje su otvorili nogometaši uzrasta 2002. i mlađi, nakon čega je uslijedio turnir u košarci kod poligona iza MSŠ „Hazim Šabanović“, dok su u međusobnim duelima susrele odigrale omladinske ženske i muške rukometne selekcije, a turnir su zatvorili takmičari godišta 1998. i mlađi.

Visočka Škola fudbala „Visport“, rukometaši RK „Bosna“ i lokalni košarkaški tim su ostvarili najbolje rezultate na ovom takmičenju, te se plasirali u finale Sportskih igara koje je održano u Sarajevu.

Škola fudbala „Visport“ Visoko je nakon trijumfa na takmičenju Sportske igre mladih BiH, kao jedini predstavnik BiH učestvovala na Balkanskim sportskim igrama mladih, prvenstvu koje se održalo u Splitu, gdje su osvojili srebrnu medalju. Također, igrači „Visporta“ su učestvovali i u atletici na 60 metara. Almin Buza (2005. godišta) osvojio je bronzanu medalju, a potom je u istoj disciplini učestvovao i Faris Hasić koji je osvojio srebrnu medalju.

## ODRŽAN 11. MEMORIJALNI TURNIR „MIDHAT AHIĆ“

U KSC „Mladost“ održan je 11. malonogometni memorijalni turnir „Midhat Ahić“. U finalnoj utakmici ekipa Mali Raj je savladala ekipu Stari Grad Sarajevo i tako postala pobjednik turnira. Turnir je trajao pet dana, uz učešće 20 ekipa. Za najboljeg igrača turnira proglašen je Nermin Kahvedžić iz ekipe Mali Raj. Najbolji strijelac je bio Edin Dudo (ELLTEH Caffè Harry), a najbolji golman Sedin Šahman (Stari Grad Sarajevo). Nagrada „Memorijal Midhat Ahić“ za ovu godinu dodijeljena je Faruku Vili - Tafi (ELLTEH Caffè Harry). Najboljoj ovogodišnjoj ekipi pehar i fudbalsku loptu uručila je Edina Ferizović ispred Općine Visoko koja je bila generalni sponzor turnira.





## MANIFESTACIJA „NAJUSPJEŠNIJI U SPORTU OPĆINE VISOKO 2014“

**T**radicionalna manifestacija „Najuspješniji u sportu općine Visoko 2014“ održana je u Gradskom kinu Visoko. Na manifestaciji je upriličena svečanost dodjele nagrada i priznanja najuspješnijim sportistima i sportskim radnicima sa područja općine Visoko koji su promovirali visočki sport i ostvarili izuzetne rezultate u 2014. godini. Manifestaciju je organizovao Sportski savez općine Visoko. Pokrovitelj i sponzori manifestacije su bili: Općina Visoko, „IGM“, „Bios“, „Visoko Ekoenergija“, a medijski pokrovitelj JP RTV Visoko.

### Sportski savez općine Visoko nagrade je dodijelio u sljedećim kategorijama:

Najuspješniji sportista senior u muškoj konkurenciji: Faruk Vražalić (rukomet).

Najuspješnija sportistkinja seniorka u ženskoj konkurenciji: Almina Mušinbegović (taekwondo).

Najuspješniji junior: Senahid Bulut (karate).

Najuspješnija juniorka: Hana Lendžer (ritmička gimnastika).

Najuspješniji trener: Mirza Handžić (rukomet).

Najuspješnija seniorska sportska organizacija (muška): Kuglaški klub „Bosna“ Visoko.

Najuspješnija seniorska sportska organizacija (ženska): Taekwondo klub „Bosna“ Visoko.

Najuspješnija juniorska sportska organizacija: Škola fudbala „Visport“ Visoko (kadeti).

Nagrada za životno djelo: Halid Džudžo, Muhamed Salčinović.

Donatori - prijatelji sporta: „Sports for Children“ - fondacija iz Holandije, Zijad Breščić, Refik Kurgaš,

Nermin Kadrić, „Prevent Visoko“, „Visoko Ekoenergija“.

Sportski radnik: Asim Limo (nogomet), Muhamed Kadić (šah), Rašid Trgo (nogomet).

Jubilej: 35 godina - Karate klub „Visoko“ Visoko.

Sportski novinar: Jasmin Tajić.

Najuspješniji sportista po granama sporta: Nedim Bečar (taekwondo), Senahid Bulut (karate), Abdulah Uzunović (šah), Nihad Džino (streljaštvo), Dženan Ganić (kuglanje).

Sportska nada: Farah Dželilović (ritmička gimnastika), Lana Lončar (rukomet), Almin Buza (nogomet), Nadina Lopo (ritmička gimnastika), Abdulah Zukić (karate).

Najuspješniji sportista u muškoj konkurenciji (sport za osobe sa invaliditetom): Kemal Kardaš.

Najuspješniji sportski radnik (sport za osobe sa invaliditetom): Elmedin Jusić.

Specijalne nagrade za razvoj školskog sporta podijeljene su svim visočkim osnovnim školama, a za najuspješniju je proglašena OŠ „Mula Mustafa Bašeskija“ Donje Moštre.

Pedagog tjelesnog odgoja: Rasim Aščalić - OŠ „Kulin Ban“.

Posebna nagrada za doprinos razvoju sporta: Edin Kajević.

## FEBRUARSKI PROTESTI U VISOKOM

U februaru 2014. godine, u više gradova diljem BiH održani su socijalni protesti. Demonstracije su počele 5. februara u Tuzli, a potom nastavljene u drugim gradovima. Nekoliko stotina građana Visokog okupilo se ispred zgrade Općine kako bi izrazili nezadovoljstvo ekonomsko-socijalnom situacijom u BiH. Većina protestanata je mirno promatrala nekolicinu "ratobornih", koji su jajima i kamenjem svoje nezadovoljstvo iskalili na zgradi Općine Visoko. Protest je trajao tri sata, a pripadnici Policijske stanice Visoko postupali su korektno prema demonstrantima.

Nakon protesta održana je Vanredna sjednica Općinskog vijeća pod nazivom „Aktuelna socio-ekonomska situacija i problemi radnika neprivatiziranih, djelomično privatiziranih i privatiziranih preduzeća s područja općine Visoko“.

U cilju uspostave socijalnog dijaloga sa predstavnicima sindikata, načelnica je održala sastanak sa privrednicima s područja općine Visoko, kao i sa predstavnicima sindikata firmi KTK, Vitex i Bosnafurnir. Jedan od rezultata ovih susreta je i dogovor o kupovini plinskog kotla od strane JP "Visoko Ekoenergija" kako bi se omogućilo radnicima Vitexa da sačuvaju svoja radna mjesta i posao.



### Reagovanje načelnice Babić povodom februarskih protesta

Načelnica Babić smatra potpuno opravdanim iskazivanje građanskog nezadovoljstva i težnju za promjenama stanja u kojem se kao društvo nalazimo.

- "Velik i složen administrativni aparat, podijeljene nadležnosti, neefikasno upravljanje javnim sredstvima i javnom imovinom, kriminal u javnom sektoru i privatizaciji, nelegalno bogaćenje, ratno profiterstvo - zaustavili su investicije i onemogućili razvoj i napredovanje, a od svega navedenog izlaz predugo tražimo. Lično sam u okviru nadležnosti, zajedno sa Općinskim vijećem, pokrenula aktivnosti u tom pravcu i očekujem političku podršku i konsenzus kako bismo što brže došli do rezultata", naglasila je načelnica Babić ističući činjenicu da je u Visokom bilo i ima kriminala, posebno u ovim segmentima, te da nadležne institucije konačno trebaju da procesuiraju i sankcionišu odgovorne.

- "Svi koji su odgovorni nemaju moju podršku i za nas ne smije biti zaštićenih i nedodirljivih. Dijelim sudbinu svog naroda, shvatam potrebu da se napokon kaže DOSTA, no problem je što su protesti izmakli kontroli, te prešli u nasilje. Moramo priznati da smo imali nered, ciljano usmjerene na urušavanje institucija, simbola vlasti i države BiH, uništavanje zajedničke imovine, ugrožavanje javnog reda i mira, te bezbjednosti građana", istakla je načelnica Babić.

Načelnica je pozvala građane da ukoliko su nezadovoljni njenim radom, radom općinske administracije ili Općinskog vijeća, isto definišu, i dijalogom pokušaju riješiti probleme ako su u nadležnosti općinskog nivoa vlasti, te da učine sve kako bi zaštitili javnu imovinu i živote ljudi od napada instruiranih, nedobronamjernih pojedinaca i grupa čiji je cilj da ostvare svoje lične i političke interese.



## Sastanak sa visočkim privrednicima nakon februarских protesta

Općinska načelnica Amra Babić održala je sastanak sa privrednicima općine Visoko. Tema sastanka bila je informisanje privrednika o februarским dešavanjima na području općine Visoko, aktivnostima Policijske uprave, kao i aktivnostima općinske načelnice i Općinskog vijeća, a sa ciljem stabilizacije stanja i podizanja nivoa sigurnosti ljudi i imovine na viši nivo.

U konstruktivnoj raspravi učešće je uzeo veliki broj privrednika i doneseni su sljedeći zaključci: Formirati

operativni tim od 5 članova privrednika koji će zajedno sa općinskom načelnicom nastaviti socijalni dijalog sa predstavnicima sindikata i ponuditi prijedloge neophodnih mjera za prevazilaženje teške socio-ekonomske situacije na području općine Visoko, potom u svim privrednim subjektima poduzeti dodatne mjere protivpožarne zaštite i zaštite imovine, kao i sigurnosti ljudi, s posebnim akcentom na preventivno djelovanje, te edukaciju okruženja u smislu stišavanja nemira i normalizacije stanja.



## Sastanak sa sindikatima preduzeća KTK, Vitex i Bosnafurnir

Općinska načelnica Amra Babić je u sklopu aktivnosti vođenja socijalnog dijaloga održala sastanak sa predstavnicima sindikata preduzeća KTK, Vitex i Bosnafurnir, a povodom teške situacije u kojoj se nalaze uposlenici.

Tema sastanka bila je upoznavanje prisutnih s aktivnostima načelnice Babić i Općinskog vijeća Visoko u proteklom periodu, koje su poduzete na rješavanju problema s kojima se susreću radnici navedenih preduzeća.

Zaključeno je da, iako svi navedeni problemi nisu u nadležnosti Općine, ipak su zajednički problemi, te se u narednom periodu moraju intenzivirati pritisci lokalnog

nivoa na nadležne organe i institucije, u cilju njihovog ublažavanja i konačnog rješavanja.

Dogovoreno je da se na tematsku sjednicu Općinskog vijeća pod nazivom "Aktuelna socio-ekonomska situacija i problemi radnika neprivatiziranih, djelomično privatiziranih i privatiziranih preduzeća s područja općine Visoko", pozovu predstavnici nadležnih institucija za rješavanje problema nevezanog staža, zdravstvene zaštite, nelegalne privatizacije, kao i nadležni predstavnici viših nivoa vlasti, te da Općinsko vijeće donese zaključke koji će ići u pravcu rješavanja pomenutih problema.



## ODLUKA O PROGLAŠENJU STANJA PRIRODNE I DRUGE NESREĆE NA PODRUČJU OPĆINE VISOKO

Obilne kišne padavine koje su zahvatile općinu Visoko prouzrokovale su prve probleme u noći 13. na 14.05.2014. godine. Tim povodom je na inicijativu Službe civilne zaštite hitno sazvana vanredna sjednica OŠCZ (Općinski štab civilne zaštite). Zbog velikih poplava izazvanih kišnim padavinama donesena je Odluka o proglašenju stanja prirodne i druge nesreće na području općine Visoko, te se odmah pristupilo provođenju neophodnih aktivnosti.

### AKTIVNOSTI OŠCZ VISOKO ZA VRIJEME POPLAVA

OŠCZ bio je u stalnom zasjedanju sve do donošenja Odluke o proglašenju prestanka stanja prirodne i druge nesreće na području općine Visoko, 03.06.2014. godine.



OŠCZ u navedenom periodu imao je 18 vanrednih sjednica, od kojih je većina održana u proširenom sastavu. Na sjednicama su se svakodnevno podnosili izvještaji o stanju na području općine Visoko na osnovu kojih su donošeni prijedlozi, odluke i naredbe.

Sjednicama su prisustvovali direktori javnih preduzeća i javnih ustanova, predstavnici općinskih službi i nevladinog sektora, kao i članovi komisija za procjenu šteta. Na 8. sjednici OŠCZ u proširenom sastavu bili su prisutni i predsjednici savjeta mjesnih zajednica.

U cilju pripreme sjednica OŠCZ, općinska načelnica s resornim službama organizovala je sastanke sa privrednicima općine Visoko i predstavnicima nevladinog sektora. Nakon svake sjednice OŠCZ održavane su press konferencije s ciljem informisanja stanovništva općine Visoko.

Na web stranici Općine svakodnevno su objavljivani izvještaji sa sjednica Općinskog štaba civilne zaštite, kao i potrebna saopštenja.

Operativni centar prihvatao je pozive za pomoć i prosljeđivao ih OŠCZ i drugim nadležnim strukturama, te koordinirao sa povjerenicima civilne zaštite na terenu.

Organiziran je sastanak sa visočkim privrednicima na kojem su prisutni upoznati sa posljedicama poplava. Veliki broj privrednika stavio je na raspolaganje mehanizaciju, opremu i materijalne resurse, te je dogovorena koordinirana aktivnost u vezi sa sanacijom šteta na području općine Visoko i pružanja pomoći drugim općinama.



U cilju samoorganizovanja stanovnika općine Visoko na provođenju mjera samozaštite i otklanjanju posljedica prouzrokovanih elementarnom nepogodom - poplavama, OŠCZ ostvario je koordinaciju sa svim Savjetima mjesnih zajednica kao i povjerenicima CZ u mjesnim zajednicama. Savjeti mjesnih zajednica bili su uključeni u aktivnosti OŠCZ koje su se provodile s ciljem saniranja nastalih šteta.

### ZAJEDNIČKI ANGAŽMAN I MAKSIMALNO ZALAGANJE NA SANACIJI POSLJEDICA POPLAVA

Tokom cijelog perioda stanja prirodne i druge nepogode na području općine osigurano je 24 satno dežurstvo Profesionalne vatrogasne jedinice uz dodatni angažman dobrovoljaca. Već prvog dana angažovani su na iscrpavanju vode iz podruma Franjevačkog samostana, a narednih dana taj angažman je proširen na brojne privredne subjekte: Kotex, BTS, Albex, Ugarak, Kent, te mnogobrojne stambene objekte pojedinačnog i zajedničkog stanovanja.

Intervencija evakuacije stanovništva u Dobrinju i Gornjem Moštru vršena je pomoću novonabavljenog čamca za spašavanje.

Komunalno preduzeće JKP „VISOKO“ početkom padavina koje su prouzročile vanredne prilike, te izazvale poplave i druge nedaće, organizovalo je konstantan rad na održavanju vodovodnih sistema, kanalizacionih sistema i odvodnje, odvozu otpada, i bilo svakodnevno na raspolaganju službi Civilne zaštite.

Shodno zaključku OŠCZ dio članova štaba obišao je teren priobalja rijeka Bosne i Fojnice, od Čekrekčija do Dobrinja, s ciljem eventualnog uočavanja minsko - eksplozivnih sredstava, te je postavljeno i 100



plakata upozorenja o opasnostima. Otkriveno je i uklonjeno: tri tromblonske mine, jedna protivtenkovska mina i 16 ručnih bombi.

Svakodnevno je vršen higijensko-epidemiološki nadzor i uvid u protokol lokalnih vodnih objekata kao i fiziko hemijske i mikrobiološke analize vode o čemu je građanstvo redovno informisano.

Predstavnici Higijensko-epidemiološke službe JU „Dom Zdravlja“ Visoko izvršili su protivepidemijsku interventnu sistemsku dezinfekciju, dezinfekciju i deratizaciju.

Federalni zavod za agropedologiju izvršio je uzorkovanje i analizu tla i utvrdio da nema onečišćenja tla organskim i neorganskim polutantima.

Naredbom Općinskog štaba civilne zaštite, preduzeće Asphaltgradnja d.o.o. Visoko je izvršilo prokop Muhašinićkog potoka od trapezastog otvorenog kanala do šahta separacije u dužini od 180 m, širine 60 cm i dubine od 100-130 cm. Kanal je spojen na šaht separacije sa propustom od 150 cm do taložnika i dalje do rijeke Bosne.

Općinski štab civilne zaštite je donio zaključak da se na područjima svih mjesnih zajednica uradi čišćenje

potoka od naplavina prouzrokovanih padavinama, te da se izvrši uklanjanje naplavina kako bi se postigao bolji protok u riječnim koritima.

Agencija za slivove rijeke Save je pokrenula aktivnosti na uklanjanju naplavina na rijeci Bosni izazvanih odlaganjem smeća, uzurpacijom zemljišta i skretanjem vodotoka od strane nesavjesnih građana.

FŠCZ (Federalni štab civilne zaštite) iz robnih rezervi Federacije odobrio je općini Visoko 5000 litara dizel goriva i 5000 litara benzina za rad mehanizacije pri sanaciji šteta.

UG „Eko-Viking“ Visoko - jedinica za spašavanje na vodi i pod vodom, pored ostalih neprekidnih aktivnosti tokom poplava, svoj puni angažman postigla je kada je zajedno sa PVJ izvršila većinu evakuacija stanovnika Gornjeg Moštra i Dobrinja. Narednih dana je svoj rad nastavila na teritoriji općine Maglaj.

Stanovništvo je organizovano provodilo akcije kao što su koordinirana aktivnost građana (FK Stari Grad) i Profesionalne vatrogasne jedinice na čišćenju šetališta „Sicilija“, te akcija čišćenja desne obale rijeke Bosne, preko puta Općine, koju je provelo Sportsko ribolovno društvo „Visoko“.

## PROCJENA ŠTETA NASTALIH DJELOVANJEM PRIRODNIH NEPOGODA NA PODRUČJU OPĆINE VISOKO

Materijalne štete koje je izazvala ova prirodna nepogoda na području općine Visoko su procijenjene na oko 1,4 milion KM direktnih šteta.

Rješenjem općinske načelnice formirana je Komisija za procjenu šteta nastalih djelovanjem prirodnih i drugih nesreća na području općine Visoko. Zaključkom Općinskog štaba civilne zaštite naloženo je formiranje stručnih komisija za procjenu šteta i to: Komisija za procjenu šteta na građevinskim objektima; Komisija za procjenu šteta na poljoprivrednim usjevima; Komisija za procjenu šteta na javnoj infrastrukturi.

Šteta u poplavljenim stambenim i privrednim objektima procijenjena je na oko 292.000 KM. Šteta uzrokovana klizištima na stambenim i privrednim objektima procijenjena je na oko 108.000 KM, tako da ukupna procijenjena šteta iznosi oko 400.000 KM.

Dvije stručne komisije za procjenu šteta na poljoprivrednim usjevima su izvršile obilazak terena na osnovu 216 pristiglih prijava o pričinjenim štetama. Po obilasku terena pristupili su izradi preliminarne procjene štete. Šteta je pričinjena na ukupnoj površini od 56,37 ha, a iznos štete je procijenjen na oko 500.000 KM.

Komisija za procjenu šteta nastalih djelovanjem od prirodnih i drugih nesreća, klizišta i oštećenja na javnoj infrastrukturi je konstatovala da je procijenjena šteta također oko 500.000 KM.

Na području općine Visoko evidentirano je oštećenje na osam



mostova, od čega pet na lokalnim cestama i to Ramadanovci-Goduša dva mosta, Buci-Dvor dva mosta, jedan most preko rijeke Bosne u naselju Porječani, i tri na nekategorisanim putevima. U naselju Uvorići oštećen je most na rijeci Gorušici, kao i u naselju Podvinci.

Na području općine Visoko je evidentirano 29 klizišta. Od toga su četiri klizišta zahtijevala veće intervencije i to Vratnica-Haldija, Vratnica-Isakovići, Porječani-Grabovi i Klisa.

### REVITALIZACIJA POLJOPRIVREDNIH USJEVA

Usljed elementarne nepogode najveća šteta na području općine Visoko nastala je na poljoprivrednim usjevima, a naročito na području Moštranskog i Mokronošskog polja.



U cilju revitalizacije poljoprivrednih usjeva i dezinfekcije zemljišta ugroženog poplavama, Općinski štab CZ angažovao je Opću zadrugu „Ideal“. Prema izvještaju Opće zadruge „Ideal“ izvršena je dezinfekcija tla na područjima Gornjeg i Donjeg Moštra, Porječana, Topuzovog polja, naselja Luke, B. Mahale, Dobrinja i Buzića.

Izvršena je dezinfekcija cca 680 dula zemljišta, kao i dezinfekcija zasađa maline i jagodičastog voća, u saradnji sa preduzećem „Frutti-Funghi“.

Općina Visoko je nabavila 34 tone sjemenskog krompira koji je podijeljen u 23 mjesne zajednice na osnovu evidencije koju su bili dužni sačiniti predsjednici MZ. Podijeljeno je i 350 kg silažnog kukuruza koje je Općina dobila iz rezervi ZDK, a prema utvrđenim pravilima za 36 korisnika.



## PRIKUPLJANJE POMOĆI UGROŽENOM STANOVNIŠTVU

Općinski štab civilne zaštite je donio Zaključak da je jedini ovlašteni subjekt ispred Općinskog štaba civilne zaštite za prikupljanje pomoći ugroženom stanovništvu Crveni križ Visoko, te je na inicijativu načelnice Babić organiziran sastanak sa predstavnicima nevladinih organizacija i organizacija civilnog društva koje su otpočele aktivnosti prikupljanja humanitarne pomoći.

U saradnji sa privrednicima i humanitarnim organizacijama obezbijedena je pomoć u saniranju posljedica poplava za najugroženije stambene objekte, a bilo je i pojedinačnih pomoći koje nisu ostvarene preko OŠCZ.

Općinska načelnica je uputila dopise sindikatu i uposlenicima jedinstvenog organa uprave, uposlenicima i menadžmentu javnih preduzeća i ustanova, te Kolegiju Općinskog vijeća, sa prijedlogom za izdvajanje dijela sredstava plata i naknada na namjenski račun OŠCZ u cilju solidarnisanja sa nastradalim u ovoj nepogodi.

OŠCZ je otvorio namjenski transakcijski račun za pomoć stanovništvu ugroženom poplavama. Na namjenski račun štaba CZ uplaćeno je ukupno 13.550,00 KM iz zemlje i 2.173,52 KM iz inostranstva.

Prilikom obilaska poplavljenog područja i klizišta na području općine Visoko, načelnica Amra Babić je uručila 30 prehrambenih paketa evakuiranim porodicama.

Centar za socijalni rad je podijelio 38 paketa za 19 porodica sa područja općine Visoko.

Organizacija World Vision BiH donirala je 30 paketa pomoći općini Visoko. Tom prilikom uručene su kabanice i gumene čizme, te hrana i flaširana voda.



## POMOĆ IZ VISOKOG ZA NAJUGROŽENIJE OPĆINE U BIH

Formiran je Koordinacioni odbor i imenovan pridruženi član Štaba civilne zaštite općine Visoko, Adnan Mević. Osnovni cilj aktivnosti formiranog Koordinacionog tijela bio je pružanje pomoći što većem broju ljudi, te su u svim mjesnim zajednicama, prostorijama Medžlisa islamske zajednice i nekih nevladinih organizacija formirani punktovi za prikupljanje doniranih artikala.

Sva prikupljena pomoć dopremana je u centralno skladište u krugu bivše kasarne „Ahmet Fetahagić“. Veliki broj građana, privrednih subjekata i privatnika uključio se u akciju doniranja pomoći, te je koordinirano veliki dio pomoći otpremljen u druge bh. gradove i općine.

Ukupno je prikupljeno: 10 tona stočnog brašna, 8 tona brašna, 3000 litara vode, 1000 pakovanja tjestenine, 1300 litara mlijeka, 1200 litara ulja, 7000 komada pašteta i drugih konzervi, 700 kilograma riže, 800 kilograma šećera, 500 paketa odjeće, 800 deka, 300 pakovanja dječje hrane, 1000 sapuna, 2500 pelena, i mnogo drugih artikala prehrambene i higijenske namjene, kao i alata, čizama i sl. Spremljeno je preko 2000 lanč paketa, te oko 500 hljebova.



Pri distribuciji prikupljene humanitarne pomoći veliki doprinos su svojim angažmanom dali pojedinci i privredni subjekti općine Visoko ustupajući svoja vozila i pružajući usluge prevoza. Na raspolaganje su se stavili Elvir Špiodić, preduzeće „Metalik“, Sudžuka Nermin, preduzeće „Vinex“, preduzeće „Muzuri“, preduzeće „Denim“, preduzeće „Interdekor“, Aida Babić, Bajro Hodžić, Haris Konjičanin, Organizacija porodica šehida i poginulih boraca, te mnogi drugi.

Također, mnogobrojne grupe su uputile materijalnu pomoć ali i radom dale doprinos sanaciji šteta u drugim gradovima (RK Bosna, Izviđački odred, OPŠIPB, učenici Gimnazije, stanovnici B. Mahale...).

Humanitarna pomoć je otpremljena za općine Žepče, Maglaj, Odžak, Olovo, Doboj, Doboj Istok i Bijeljino, te naselja Željezno Polje Nemila, Starina i Topčić Polje.

Iz Visokog je upućena pomoć i u opremi strukturama civilne zaštite općina Vareš, Žepče i Odžak.

Tokom provođenja aktivnosti na prikupljanju i distribuiranju humanitarne pomoći odziv građana je bio izuzetan, a ostvarena je vrlo dobra saradnja u radu Općinskog štaba civilne zaštite, Koordinacionog tima nevladinog sektora i Crvenog križa općine Visoko.

Načelnica Babić je čestitala i izrazila zahvalnost svima koji su dali svoj doprinos u navedenim aktivnostima.

## PREDSJEDAJUĆI PREDsjedNIŠTVA BIH BAKIR IZETBEGOVIĆ POSJETIO OPĆINU VISOKO



Predsjedavajući Predsjedništva BiH, Bakir Izetbegović sa saradnicima posjetio je općinu Visoko i najugroženija područja zahvaćena poplavama u Visokom. Izetbegović se od načelnice Amre Babić informisao o situaciji u Visokom i poplavljenim područjima. Tom prilikom načelnica Babić je izrazila zadovoljstvo što nije bilo ljudskih žrtava i dodala kako je najveća šteta prčinjena na poljoprivrednim dobrima, te da su svi kapaciteti Općine Visoko, civilne zaštite i policije stavljeni na raspolaganje građanima.











### KANCELARIJA ZA PRIVREDNIKE



Pružanje pomoći privrednim društvima i poduzetnicima iz oblasti obrta, ugostiteljstva, trgovine i drugih djelatnosti u rješavanju postupaka i upućenih zahtjeva općinskim službama.



Saradnja sa udruženjima privrednika, poljoprivrednika i drugim udruženjima koja se bave privredno-razvojnim aktivnostima, a u cilju podrške privrednom razvoju na području općine Visoko.



Ušteda vremena privrednim subjektima i otklanjanje administrativnih barijera u određenim upravnim i administrativnim postupcima u organu uprave.



Stvaranje više različitih baza podataka u cilju promovisanja privrednog razvoja na području općine visoko.

### KONTAKTIRAJTE NAS:

**Stojimo Vam na raspolaganju svakim radnim danom.**

**Obratite nam se, a mi ćemo Vam odgovoriti u najkraćem mogućem roku.**

 Alije Izetbegovića 12A  
Kancelarija 28, III sprat

 032/ 732 - 546

 e-salter@visoko.gov.ba

 visoko.gov.ba



# OPĆINA VISOKO

